

I - PALLI

A. PALLI



BIBLIOTECA LUCCHESI-PALLI

III.^a SALA

SCAFFALE

13

PLUTEO

I

N.^o CATENA

35



Grande Sala A.S.

III 13-I-35

III 12 I 35



COLLEZIONE

DI TUTTI I POEMI IN LINGUA
NAPOLETANA.

TOMO QUINTO.

LA CIUCCEIDE.



2044

L A

CIUCCEIDE

O P U R O

LA REGGIA DE LI CIUCCE
CONZARVATA

POEMMA ARROJECO

DI NICOLO' LOMBARDI


CAPORUOTA NELLA REGIA UDIENZA
DI TRANI.



N A P O L I MDCCLXXXIII.

PRESSO GIUSEPPE MARIA PORCELLI
Con Licenza de' Superiori.







**A CCHI HA GOLIO DE LEJERE
STA CHELLETA.**

SI tutte quante ll' uommene volessero
Farse lo fatto lloro, e lassà correre
Lo Munno, comme va, senza ntricarese
De li guaie d' aute; no nse sentarriano
Tanta fracasse, quanta se nne sentono,
E agnuno potarria stampare, e scrivere
Chello, che le jarria pe lo vellicolo,
Senza paura de l' ammola fuorsece,
Che mmanc' uno nne fanno passà vergene.
Ma pecchè rregna sto mmarditto vizio
Ntutto lo Munno, e mmasseme ccà a Nnapole;
Nche se nzonn' uno de caccià na storia,
E ssia, de le mmalizie de le ffemmene,
O puro chella de Trastullo Perteca,
Subbeto siente dì: Tutte li pullece
Hanno la tossa: s' è boluto mettere
Isso puro co ll' aute mprotacopej:
Va sacce mo, che nne vorrà pretennere
Co ffa ssa chella? e itagliano, e spetacciano
No poverommo, e spisso senza caosa.

Or io mo, p' avetare sso fastidio,
 Che sti tale peglià se potarriano,
 Vedenno, nzicco nzacco, ascì sta chelleta;
 Te voglio dì, comme mme mise a scrivere
 Sta mmesca pesca, e ccomme a cchisto termene,
 A sforza, so benuto de stamparela.
 Aie da sapè, ch' a ll' unnece, o a li dudece
 De chillo mese, che li Ciucce arragliano,
 Paricchie galantuommene de Napole,
 Che ncopp' a l' Arenella se trovavano,
 Chi a ssanarse lo picetto, e cchi lo stommaco;
 Se devano buon tiempo; e, ccomm' è ssolato
 De farese ncampagna, se nn' ascevano.
 La matina pe ttiempo, e sse nne jevano
 Cammenanno, e spassanno tutte nzemmora.
 Ma pecchè lo ffa sempe sto sarcizio,
 Senza avè no casuorchio, addò posarese,
 Sarria na cosa, de fa scì lo spireto;
 Non dico a cchille llà, che se rejevano
 A mmala ppena, e steano mieze sisete,
 Ma a cchi co na montagna pò fa a ppunia.
 E stà cchiù ttuosto de na preta marmora:
 Pe cchesto, dapò avè gerata ll' isola,
 Quann' erano chei' ore marvezzerie,
 Che ncignava lo Sole a avè de ll' aseno,
 Devano funno 'ncasa de no Miedece,
 Che, pe ffuì li frate malenconece,
 Nc' era juto ngeggetta a ppeglià ll' ario:
 No bello viecchio, e de li meglio Miedece,
 Che ssò, a lo juorno d' oie, pe ttutta Napole:
 Va pe ttutte le ccase de sti Principe,

Trase

Trase a tutte li meglio Monasterie ;
 E' Bbice-cancelliero a lo Collegio ,
 S' abbusca le mmognole co lo cuofano ,
 E sse chiamma Jatano de l'Auterie .
 Lo riesto cieri vierze te lo ddiceno ,
 Che ttuove dinto a sto Pdemma Arrojeco .
 Ora no juorno , mente se trovavano
 Tutte nziemo a sta casa , e ttascorevano ,
 Spara uno de la mmorra : Pe spassarece
 Veramente ccà ncoppa , non porriamo
 Fa , nfra de nuie , na specie d'Accademmia ,
 No a dderitto , ma p' abburlare , e tridere ?
 Ch' accossì potarriamo devertirece ,
 E spassarce sti frate , che nce scannano .
 Facimmola , decettero d' accordo
 Tutte quante : Facimmola , facimmola ,
 Lo buono viecchio , ca mme va a lo ggenio :
 E ddapò ciento chelle , e ciento chiacchiare
 De lo ccomme , e lo cquanno , resorvettero
 De farla agn' otto juorne , e le mettettero
 Lo nomme d'Accademmia de ll' Asene :
 Co na legge , che ttutte componessero
 Matrecale , e Canxune ncoppa a ll' Asene ;
 E cconcruso accossì , se diè prencipio ,
 Ncapo de ll' otto juorne , a ffa ssa vernia .
 Io non mme nce trovaje , ca steva a Nnapole
 Co li malanne mieie ; ma pecchè mm' erano
 Tutte quante Cardasce , mme mmitajeno ,
 Ed io , pe le sservì , jette a ssentirele .
 Tanto cchiù , ca nce tengo na casuppola
 Ncoppa a cchella montagna , pe spassareme

Quanno stò co li frate, e mme vā a ggenio;
Ma pecchè n'è la mia, non pozzo dicere
A lo commanno tuo. Si vuole venirece,
Paga ssa Terza, e statte felecissemu.
Arrevato che ffuie, pe ffavorireme:
Te nce volimmo, accommenzaieno a ddicere
Tutte quante l'ammice. Io, comm' a n' aseno:
Comme volite. Mme mettie a ccomponere,
E nn'ascie sta schesfenzia. E ppecchè subbetto
La nova se spannie pe tutta Napole,
Ca ncoppa a l'Arenella se cantavano
Le ggrolie de li Ciucce; a pprecepizio
Venne cchiù de n' ammico a ffarce razia;
E, nzentirce arraglià, no nce facettero
Na facce storta, e nno le despiacettemo.
Arraglia sta settimana, arraglia si' autà,
Ncauzaieno li dolore; e ccomme jevano
Crescenno le ssemmane, aecossì ghievano
Crescenno chille, che nce favorevano.
E dduie, nfra ll'aute, a chi, nzi che lo gliuommaro
De chesta vita mià non vene a rrompere
Chella, che l'arravoglia, aggio da essere
Schiavo vennuto, vogliano, o non bogliano,
Mme facettero tanta de le ggrazie,
Che nn' anchiettero quase meza Napole.
E a lo rreto mme dissero: Feniscela,
Ch' avimmo resolute de stamparla.
Che bbolite stampà? mme vene a rridere,
Nzentirclo di schitto: si' ata vernia
Nce mancarria d'avè a ssenti pe Nnapole.
No nce vò auto: s' ha da stampà proprio.

E tar-

E ttorna co la stampa. E ttanta fujeno
 Sti sì, e sti nò, sti dicome, e sti dissete;
 Ch' all' utemo: Nce nn' aie da dà nà Copia;
 E nnuie te la stampammo. Ora vedennome
 Co le spalle a lō muro, ca la Copia
 Non potea fa de manco de non darla,
 Fice virtù, comme se sole dicere,
 De la necessetate. Chesta è ppropeto
 La veretà. Si tu nme lo bbuoie credere;
 Cridelo, ca la ncarre, e te rest' obbreco;
 Si nò, pur' accossì, e bbà felecissemo.
 Ma, primma che te lasso, n' ata chiacchiara
 Te voglio dì: Si non te va a lo ggenio
 Quarche ccosa, che ttuove int' a sta chelleca,
 Masseme a lo pprencipio, te suppreco,
 Co ddicce ventrecella, a ccompatireme:
 Primmo, pecchè fu ffatta nfra lo termene
 De tre mmise, e sse sà pe' ttutta Napole.
 Agghiugne: la materia è ttroppo steteca,
 Vasta dì, ca se parla sempe d' Asene.
 Pe' ttierzo: no mm' è pparzo de mpizzarece
 Carche nnammoramiento, ch' è chell' ancora,
 Addò se fanno forte tutte ll' uommene,
 Che bbonno tirà a llungo carche fabbola;
 E pp' utemo, fuie fatta pe' spassarece
 Nfra nuje, e nnuie; ca no nce jeva propio
 Pe' lo penziero, e mmaie ce smacnavamo,
 Ch' avesse avuta a ccompare pe' Nnapole.
 N'ata cosa. Si vide dint' a st' Opera
 Nnommenare le ccose, che no n' erano
 A lo tiempo, che ll' Asene parlavano,

Ma paricchie anne appriesso se vedettero,
 O nce sò mo a lo Munno; no nte mettere
 A ddì, ca è stato arrore, e à ttenagliareme;
 Ca ll'aggio fatto apposta, pe ccorrejere
 Li vizie de sti juorne, comme fossero
 De chillo tiempo; ca, si nò, da ll' Asene
 No le ppotea fa dì, ca mo non parlano,
 E non fann' auto, ch' arraglià, e ffa pedeta.
 Mmoccate chesto, e scusa lo fastidio.



DE LA
CIUCCEIDE
ARRAGLIATA I.



ARGOMENTO.

*Varvajanca lo Rrè , che brociolare
Già vedea de lo Munno la fortuna ,
Chiamma li Ciucce , pe se conzortare
Comm' ha da fà , pe sffravecà le mmura
Attuorno a la Cetate , pe nce stare
Tutte quante llà ddinto a la sicura .
Mente parla , l' afferra n' antecore ,
E ccorreno li Miedece a l' addore .*

I.

CAnto chillo gran Rrè , ch' into Gragnano .
La Reggia de li Ciucce conzarvaje ;
E ccomme fuie , che ssenz' avè le mmano ,
Le mmura , e no Castiello nce chiantaje ;
Stese po li confine , e cchiano chiano
Tutto quanto lo Munno nce nzerraje ,
Tanto ch' addò lo Sole cammenava ,
Auto bene , che Ciucce , non trovava .

II.

Aseno co l' ascelle, che 'n Parnaso
 Lo primmo luoco d' arraglià te tocca,
 Portame no voccone da lo vaso,
 Che hà Febbo a ttrovà, quanno se cocca:
 Sse rrecchie appizza, sforgiate sso naso,
 E spaparanza ll' una, e ll' aota vocca;
 E, azzò me nn'aggia d' alliceà le ghiedeta,
 Fammence n' arragliata co ddoie pedeta.

III.

E ttu, Arcaseno mio, che ssi lo sciore,
 Lo Capotroppa de l' asenetate,
 E ccacce zuco, puro da l' addore
 De, nzò, ch' esce da cuorpo, a li malate,
 Pe cquanto si geluso, de l' annore.
 De, st' Asenielle tuoie matrecolate,
 Scioscia puro, te preo, e ttu mm' ajuta
 Sta sarma a ccarrejà pe sta sagliuta..

IV.

Sott' a na gran Montagna de la Costa,
 Da la banna de Napole, è no monte,
 Che ppoco da Sorriento se descosta,
 E la Torre, co Buosco le stà a fronte:
 Bello, che ppare propio fatto apposta
 Pe Mmarchise, pe Pprincipe, e ppe Ccuonte,
 Ditto, da là Grammegna, Grammegnano,
 Pè se corroppe, e se chiammaie Gragnano.

A sto

V.

A sto luoco, da tanno, che lo Munno
 Fuie fravecato da li pedamiente,
 Quando da chill' antico, e ggran Zeffunno,
 Addò era tutto, e nuo nce pareva niente,
 Nn' ascle lo Cielo, e sse facette tunno;
 Ll'Acqua, la Terra, e ttutte ll'Alemiente
 Jettero addove le toccaie lo luoco,
 Sulo 'n Cielo volaie ll'Aria, e lo Ffuoco;

VI.

Da ehillo tiempo, comme v'aggio ditto,
 A sto luoco, ch'è ccosa de Segnure,
 Nce faceano la mmira zitto zitto
 Li primme arcesapute Arragliature:
 Pocca, comm' a na Croneca stà scritto,
 E lo pprova co autenteche scretture,
 Abbistaieno, ch' a cchella montagnella
 Maie nce mancava ll'erva tennerella.

VII.

E ccà, pe nzi che ddoraie chella aitate,
 Che ll' uommene nfra lloro, e ll'anemale
 Se volevano bbene, comm' a ffrate,
 Nè nse sapea che bbolea di fa male,
 S'aonevano li Ciucce; e ppe le strate
 Nc' era no scialatorio neverzale:
 Magnavano, vevevano, zompavano,
 Redevano, correvano, e scialavano.

Poc-

VIII.

Pocca no nc' era chi le sconeceva ;
 O le venea a gguastà li fatte lloro :
 Tutte s' accarezzavano , e s' ammava
 Ll' uno co ll' auto . O bella aità de ll' oro !
 La gatta co li surece abburlava ,
 Co le mimosche lo ragno ; e cquanta foro
 Pe la terra , pe ll' aria , e ddinto maro ,
 Parevano la vesta , e ll' aurinaro .

IX.

Ma quanno po , pe sconquassà lo Munno ,
 E pp' anchirlo de trivole , e dde guaje ,
 Se vedette sguiglià da lo Zeffunno
 (Uh che ccomparza no nce fosse maje)
 Chella Descordia , che dda capo a ffunno
 Mbrogliaie le ccarte , e tte lo spestellaje ,
 Addio pace , addio ammore , addio contiente ;
 No nce fuieno cchiù ammice , nè ppariente .

X.

Agnuno reteratose a cquartiere
 Non facea cchiù co ll' aute compagnia :
 Ncignaieno li sospette , li penziere ,
 Lo , cchesto che bbò dì ? la ggelosia ,
 La collera , la mmidia , li vrachiere ,
 Li trajenielle , la frabottaria ,
 Tutte chille streverie , e cchille male ,
 Che mannaieno lo Munno a lo Spetale .
 Com-

XL.

Comm' a ll' aute , li Ciucce poverielle ,
Nche bbeddero le cose ggià mbrogliate,
Se reteraieno a cchelle mmontagnelle ,
Che ssempe ll' uocchie lloro erano state ;
Decenno ll' uno , a ll' auto : Li fratielle
Si nc' hanno tutte quante abbannonate ,
Vagano puro addò le pare , e ppiace ,
Ccà nuie starrimmo dinto a la vammace .

XII.

E bbedenno , ca tutte ll' anemale
Aveano fatto Rrè lo cchiù ssaputo
De le razzimme lloro , e ccomm' a ttale
Era da tutte ll' aute reveruto ;
Penzaieno de se fa pe Ccaporale
Uno de lloro , ch' avesse saputo
Governà tutte quante , e a ppoco a ppoco
Fa Reggia de li Ciucce chillo luoco .

XIII.

Chisto fuie Don Paccone , che , ppe ddare
No juorno ajuto a Bacco , che mpontato
Era a no sciummo , e non potea passàre
Fuie da isso nnenattemo nnaizato
A ssapè tutto chello , che mparare
Se pò a la scola ; e a ll' utemo portato
Ncielo , fuie fatto una de chelle Stelle ,
Che l'Astroloche chiammano Asenielle .

Muor .

XIV.

Muorto chisto, duie figlie, ch'avea fatte
 La Descordia, jettero crescenno :
 Ll'uno era Mio, che ppe guastà li fatte
 De Tujo, ch'era ll'auto, jea sperenno ;
 E pecchè steano comm'a ccane, e ggattè,
 Chiano chianillo se ieno spartenno
 Tutto lo Munno, e ll'uocchie se cacciavano
 Ogne bbota, che nziemo s'affrontavano.

XV.

Ma pecchè Mmio rescette uno de chille,
 Che se chiajetarriano na mascella,
 Co ll'arte, co le mmano, e cco li strille
 Jea sempe scervecchianno carcosella,
 Ch'era de ll'auto, a nzì, che li capille
 Le spennaie tutte, e l'ammaccaie la zella;
 E cquanno ll'appe propio annegrecato,
 Nne lo fece fol pe ddesperato.

XVI.

Mmedè chesto, le ggente, e ll'anemale:
 Cercaieno de se mette a lo ssecuro :
 Chi facea turre, chi facea sepale;
 Chi faceva no fuosso, e cchi no muro ;
 E lo Rrè de li Ciucce, che ggran sale,
 Teneva a la cocozza, jette puro
 Romnecanno nfra isso chiano chiano
 Che se poteva fa dinto Gragnano.

E rre-

XVII.

E rresorvette de volerce fare
 Comm'a na chiazza d' arme a sto pajese;
 E ffarce no Castiello, pe nce stare
 A lo ssecuro da tutte l'affese,
 Co no muro, ch' avesse a ntornejare
 Tutto lo regno; e ffarce le ddefese,
 Azzò, si maie le fosse fatta guerra,
 Se potesse defennere la Terra.

XVIII.

Lo penziero era bello: *ma che bbale*
Penzare buono, e non potè fa niente?
 Le mancava la cosa prencepale,
 Ch' era la mano, a ffa sti fornemiente;
 Mperzò a na gran conzurta cennerale
 Chiammaie tutte li Ciucce cchiù ssacciente,
 Pe ttrovà la maniera cchiù ssecura,
 De nnauzà lo Castiello, e ffa le mmura.

XIX.

N' aseno lo cchiù ggruosso, e cchiù cchiantuto,
 Che l'afficio facea de trommettiero,
 Se mese a ffa no riepeto vattuto,
 Che ssarria stato pe scetà n' Agliero;
 E, nchè da chelle bbestie fuie sentuto,
 Corze mmiero a la Tana ogne sommiero,
 A echella Tana, ch' era la riale,
 Addò steva la Corte prencepale.

XX.

Accostate che ffujeno a la porta
 Li Ciucce cchiù ssapute, e li Dotture,
 N'aseniello, che steva a ffa la scorta,
 Passaie voçe co ll' aute serveture;
 E nfina po, pe ffarela cchiù ccorta,
 Sappe lo Rrè, ca ggìa li Conzurture
 Stevano leste; e cco na scotolata
 De recchie, la lecienzia le fo ddata.

XXI.

Sott' a no bardacchino de jenesta
 Trovaieno ll' asenesca Majestate,
 Tutto frunne de marva, e dde menestà
 De foglia molle, e bruoccole specate:
 Pe sceltro tenea accanto na rapesta,
 Co dduie sciure de prato ntorcegliate;
 E na corona, -ch' era tutta chiena
 De spiche secche d'uorgio, speltra, e bbenà.

XXII.

Era sto bardacchino de stopore
 Da n'arvosciello sopponato ntutto:
 Avea a li late, pe le dà sbrannore,
 Doie statole de tuso miezo strutto,
 Ch' erano la Pacienza, e lo Valore:
 E ssott' a lloro se leggea no mutto:
Quanno è ttiempo de sarma, e bbuie collate;
Quanno è ttiempo de cauce, e bbuie mnate.
 Tut-

XXIII.

Tutte ste ccose, poco juorne arreto,
 Fatte ll'avea no cierto stodejante,
 Che ghiea spiertò trovanno no secreto
 Pe ppassà nante, e ffarse li contante;
 Ora, pecchè li Ciucce a lo ddereto
 Nce lo mmezzaieno, voze esse galante
 Issò puro co lloro, e a sto pajese
 Venne, ficc ste ccose, e nce le mmese.

XXIV.

Varvajanca era Rrè, de la jennimma
 De Paccone lo primmo, che nnascette:
 Era tanto vecchione, e dde sozzimma
 Nn'avea no parmo pe nfi a le ggallette,
 Co ll'uocchie nfodarate de scazzimma;
 E, ppe no stà a ddì tutte li defiette,
 Avea no gran ciammuorio, che dda terra
 No lo fa maie partì, quanno l'afferra.

XXV.

Sott' a lo trono stea stennerecchiato,
 Ncoppa a no campo de papagne schiuse:
 Co le ccude seie ciucce, ch'avea allato,
 Le mmosche, e li tavane forejuse
 Cacciavano a lo povero malato;
 E, pe ffarle aprì ll'uocchie, ch'avea nchiuse,
 Da quanno nquanno co no pedetillo
 Le faceano a lo naso n'addorillo.

Nche-

XXVI.

Nchesto fecero facce li vecchiune;
 E ncrinatese mprimmo pe nfi a nterra;
 Se spartièno pe ttutte li pontune:
 Ma, trasute che ffuieno, se nzerra
 La porta, ch'era tutta de taulune:
 E quatto ciucce, azzò che nò le sferra;
 La sopponaieno co li sedeture,
 Gh'erano auto che bbarre, e mmascature.

XXVII.

Ma che nce voze, azzò ch'apresse ll'uocchie
 Lo Rrè, che ppropio le bbolea vedere?
 A scarnarle sta vota le ppastocchie
 Non sapeano che mmuodò cchiù ttenere:
 Nce decettero ciento paparocchie,
 Nè ll'uocchie se mettevano a ddevere:
 Nce fecero a lo rreto na pesciata,
 E nne trovajeno subbeto la strata.

XXVIII.

Apierte, ch'ebbe ll'uocchie, co le rrecchie
 Fice primmo na grà scotolejata;
 Che, pp'esse accossì llōghe, e accossì bbecchie,
 Nce voze n'anno a ffa sta recercata.
 Rapie po la gran vocca, e le ppeticchie
 Fice afferrà a la turba annegrecata:
 Tossaie, rascaie, sputaie, s'adderezzaie,
 E ppo, accossì arraglianno, spaporaje.

Fi-

XXIX.

Figlie mieie, si avite uocchie, ggìa bbedite
 La grassa de sti luoche, ch'abbetate:
 Erva no, nc'è a lo Munno, che bbolite,
 Che ccà, senza cercà, no la trovate:
 Lo ffrisco de ste ffrasche saporite
 No nce fa mmaie canoscere la state:
 Si volit'acqua, nn'esce da ste pprete
 Tanta, ch'abbasta a nc'annegà la sete.

XXX.

No ve parlo mo ccà dè la grannezza
 De sr'uorte, de ste ssirve, e de ste cchiazzo:
 Ste ccase noste songo na bbellezza,
 Auto che ghire a ffravècà palazze:
 Chiste la razza nosta no l'apprezza;
 Ma ll'ha lassate mmano a ccierti pazze;
 Che stimmano co Giove da stà a ttuzzo,
 E ssò ddigne de stà dint'a no puzzo.

XXXI.

Che bboglio di co cchesto? Aggio a ppaura,
 Che cquarcuno no ns'aggia a nnammorare
 De ste bellizze, a ll'uocchie de fortuna.
 Si chesto fosse, che ppotimmo fare,
 Pe nce sarvà? Nuie non avimmo mura;
 N'avimmo turre, pe nc'arreparare:
 Stammo dint'a na Terra, addò trasire
 Se nce pò co li carre, e cco li tire.

Mperi

XXXII.

Mperzò v'aggio chiammate a ttutte quante,
 Pe pparlà tutte nziemo de sti cunte.
 Penzate vuie, che ssite stodejante,
 Comme avimmo da fa ncopp'a sti punte.
 Stammo tutte a no riseco. Li chiante
 Sarriano tutte quante aonite, e ghiunte.
 L'annore mio si no ve move a nniente,
 Mova agnuno lo suio, de li pariente.

XXXIII.

Cchiù bbolea dî; ma accommenzaie a strellà:
 Aiemmè lo ventre, e cche ddolore è cchisto?
 Ajuto, figlie mieie, corrite ccà.
 Uh bbene mio, comme mme senco tristo!
 Chesto che d'è? Mme sento ggìa crepà.
 Uh maro me! Faciteme no pisto,
 Manteniteme ncaudo, ca mo moro,
 Si priesto, no mme passa st' antecoro.

XXXIV.

Corzerò tutte quante, a lo strellare,
 Li Ciucce addottorate mmedecina:
 Tutte le stanno attuorno, e cchi ammagliare
 Le vò le rrecchie, e cchi vedè l'aurina.
 Uno va da dereto, p' addorare,
 Si ncuorpo ne'era freoma, o tremmentina:
 Lo Rrè se spila, e ttanto fuie lo bbutto,
 Che pparze, se spelasse no connutto.

Quan-

XXXV.

Quanno chesto vedle lo prattecone,
Ch'era de chille de la scola antica,
Nce raple tanto de no cannarone,
E ddisse ntoscanese: Non è mica:
Nn'aggio sorbito cchiù dde 'no voccone,
E mme so abbisto, ch'è stata una spica,
Non sò, se dirmi d'uorgio, o pur d'avena,
Che se ll'era intralciata int' a na vena.

XXXVI.

Questa ll'ha ffatto, col suo titillare,
Un certo che, comme fosse prodito,
E tosto ha accommenzato a stuzzicare
Quel doloretto, ch'adesa è ffornito:
Lassammolo un pochetto arreposare,
Che dimattina s'auzarrà spedito;
E 'ncaso poi, che 'l mal no la fornesca;
Li darem l'aria, o ll'uoglio, o ll'acqua fresca.

XXXVII.

Tutte ll'aute dapò d'avè mbrodato
Chillo, che ffice la relazione,
E sti belle remmedie ll'avea dato;
Pe no nce perde de connezione,
Jettero mposturanno lo malato
Co no cierto parlà miezo cervone,
Ch'auto no nse sentea: Per tutti i mali
Questi sono i rimedj uniyersali.

Con-

XXXVIII.

Concruso che ffuie chesto , se sciogliette
Ll'una e ll'alta conzurta , e cchiano chiano
Agnuno de li viecchie se nne jette ,
Pe ttornà li Dotture lo dimano ;
E, nche ghitorno schiaraie , se nne venette
Agnuno retomano retomano .
Ma chello , che decettero lo juorno ,
Lo ssentarrite appriesso , quanno torno ;

Scompertura de l' Arragliata I.



DE LA
CIUCCEIDE
 ARRAGLIATA II.



ARGOMENTO.

Lo Rrè, sanato da chillo dolore,
 Stà a ssentì le Cconzurtè, e li Dotture:
 Chiste a pparlà se fanno poco annore,
 E nfra lloro se menano li ture.
 Isso cerca accoietare sso remmore,
 Ma se ncanano cchiù li Conzurture;
 Tanto, che mmeperuto le fa fare
 Na cauciata, e ppo se va a ccorcare.

I.

NOn s'aveano scomputa de magnare
 La paglia li cavalle de lo Sole,
 Pe ttornà co cchiù fforza a ttrottejare;
 Lo juorno appriesso, a schiude le bbiole:
 Nè aveano apierto li Cetrangolare,
 Pe bbennerè l'allesse, e le bberole;
 Quanno li Dotturune cchiù ssacciente
 Tornaïeno, p'appurà li spediente.

B

E ttro-

II.

E ttrovato lo Rrè , ch'avea dormuto
 Tutta là notte, e steva ggià scetato ;
 E lo dolore , che ll'avea sbattuto ,
 Co chillo suonno s'era padejato ;
 Dapò d'averle fatto no saluto ,
 Se spartieno da ll'uno , e ll'auto lato,
 E stevano aspettanno la lecienzia ,
 Pe pparlare, e mmostà tutta la scienza.

III.

E mbè , disse lo Rrè , che s' addonaje ,
 Ch'aveano ncuorpo rrobba da smautire ,
 Io ggià ve disse ajere , e ve contaje
 Tutto chello , che stistivo a ssentire ;
 Creo , ch' avite penzato , comme maje
 S'aggiano sti defiette da sopprire :
 Dica agnuno de vuie , co llebertate ,
 Tutte li muode , ch'avarrite asciate .

IV.

Lo primmo , che pparlaie , fò Rrecchiardone
 Ch'avea ncopp' a la capo doie recchiune ,
 Ch'avarriano coperto no cannone ,
 E no ciuccio co tutte li sportune ;
 E , pprimmo de ncegnà la lezione ,
 Ncrinaie lo Rrè ; e ppo pe li cantune ,
 A tutte li compagne se votaje ,
 Le fice no saluto , e accommenzaje .

V.

Rrè mmio , che cquale sà , tale te muste,
 Vero figlio de Giöve, anze de Giove
 Sì lo figlio cchiù bbello, cchiù che ghiuste
 So sti penziere tuoie: pocca te truove
 Dint'a no matrecone de desguste ,
 Si no lo vide , primmo che te muove ;
 Mperzò dice lo mutto, ch' abbesogna
 Ngrassà lo puorco , p'avè bbona nzogna :

VI.

La cosa è bbella, e bbona , e ss'ha da fare;
 Ma ccà te voglio, curcio, a sta sagliuta.
 Crideme, ca starria pe te mbrogliare
 Chi tutte le bertù sa de l'aruta .
 Io , che ll'aggio voluta stodejare ,
 Pe ttutto revotanno la so ghiuta ;
 Ma veo , ca sempe cchiù cresce lo fiecto :
 A ll'utemo la lasso , e mm'acquieto .

VII.

Donca , disse lo Rrè , tu n'aie che ddire?
 Gnorsine , isso respose , mo ve preo :
 Se porria fa sta cosa . Ma rescire
 Creo , che non pozza . Nò , ca sarria peo.
 Va chiano . Eccola ccà: Si pe ttrasire
 Ma si volesse ? Chesto no lo ccreo .
 Stà , stà : chesta va bbona . Addov'è ghiuta?
 Uh capo mia , e ccomme si storduta !

B 2

E ggia

VIII.

E, ggjà cche ssi storduto, trasetenne,
 Vavone mio, no nce stordì a nnuie puro,
 Respose Vrennarulo: vavattenne,
 Ca no ntennimmo sto pparlà a lo scuro.
 N'ata vota va trova chi te ntenne,
 O miettete a pparlà a facce a sto muro:
 Parla, comme se parla, e ffatte ntennere;
 E ssi nò, datte na vota, e bbatte a mpennere.

IX.

Vatt' a ffa strascenà ncopp' a lo Ponte,
 Ca maie li pare mie so state mpise,
 Reprecà Recchiardone: lo si Conte,
 Ch' a le cctrola va mettenno assise!
 Che bbernia è cchesta, viecchie de Caronte,
 Stateye zitto, che ssiate accise,
 Lo Rrè se vota tutto nforejato,
 Jate a ffa ste cchiazzate a lo Mercato?

X.

Accossì s'accoietaie sto grà rremmore,
 Ca, si nò, tropp' a llungo sarria juto;
 E lo Rrè secotaie: Faccia faore,
 Si Vrennarulo mio, che n' aie potuto
 Co sta gran panza padejà n' arrore.
 A ste pparole rommanie storduto
 Lo povero Dottore, e stie no poco
 A ppenzà; se deze armo, e ppo die fuoco.

Che

XI.

Che la cosa non sia deffecortosa,
 Io no lo nneo, ne ll'aggio maie niato;
 Mperrò chi ha stodiato carche ccosa,
 Ncoppa a lo Manuele, e a lo Donato,
 No la stimma accossì pperecolosa,
 Ch'asciuttà no la pozza a uno sciato:
 Pe cchesto mo derraggio chiaramente
 Ll'uneco, che nce cape, spediente.

XII.

Aggiate tutte addonca da sapere;
 Ca conforme la paglia, quanno è bberde;
 Si quacche rosatella va a ccaddere
 Sott'a na parte, addò no nse nce perde;
 Le rrecchie noste ncignano a bbedere,
 Comm'a no peccerillo, che se sperde;
 Po torna a ffa lo Cielo a pponejate,
 E nne vene lo ffrisco de la State:

XIII.

Accossì ghiusto justo sso Castiello
 S'ha da chiantare da le ppedamenta:
 Piglia na vreccia, o n'auto ramosciello,
 Chiantalo, comme schiantano l'amenta;
 Subbeto sentarraie no gran greciello:
 Ma lassale ffuire, e ttu fa nfenta:
 Secoteja a ccommattere a lo scuro,
 Ca chiano chiano s'auzarrà lo muro.

XIV.

Fatto lo muro, aie da calà cchiù nn'auto.
 Fa de st'ata manera: a cchillo fuosso,
 Addò cadie lo bbutto co no sauto,
 Miettence no sospiro, comm'a n' uosso.
 Chesto a cche sserve? Serve, azzò carch'auto
 No nc'aggia da trottare; e, nche ll'aie smuosso,
 Eccote fatto, nnanze a ll'uocchie tuoje,
 Lo muro, lo Castiello, e nzò che bbuoje.

XV.

La cosa jarria bbona, si nee fosse
 Chi la ntennesse, disse Recchiardone.
 Che ddice? Vaie trovanono, ch'io te smosse,
 Propio ccà nnanze, brutto anemalone,
 Respose ll'auto: t'ammaturò ll'osse,
 Si mme tuorne a ffrusciare lo cauzone.
 Stà ccà, disse lo Rrè, ve lo nzonnate,
 Ca sto Colleggio fenarrà a minazzate?

XVI.

Miettete da sta bbanna, Vrennarulo,
 E nno mmotà maie l'uocchie da sta via.
 E ttun'auto vattenne sulo sulo
 A cchillo pizzo, e non di cchiù na cria:
 Ca si ve sento cchiù, sia no gran mulo,
 Si no ve levo tanta vezzarria.
 Accossì creò, che v'aggia accojetato:
 Che ssecota a pparlare lo Scossato.

Gno-

XVII.

Gnore mio bello, io ccà, pe ffarve annòre,
 Me ne' aggio fatto propio carrejare.
 Tengo na coratella, che mmo more;
 Le rrecchie hanno nzavunorio lo mmagnare;
 La coda s'è mpizzata int' a lo core,
 Tanto che no lo fa cchiù ppadejare;
 Chist' uocchio stà abbrocato; e cchisto pede
 Stà apelato pe ll'aria, e nno nce vede.

XVIII.

Mperzò, Signore mio, pe ve la dire,
 Mme lo ccanosco, ca non servo a nuiente.
 De cchiù, a sta coscia, che mme fa sperire,
 Na sordia mm' è bbenuta, che non sente.
 Iere no nce penzaie: ca mbè sentire
 Potea caccosa, si ve stea cchiù rrente.
 No nne ntese, pe ccierto, manco sale:
 Scusateme, ca songo n' anemale.

XIX.

T' aggio ereddeto, lebbrecaie lo Rrè.
 E ttu mo che nne dice, Pagliaricello?
 Signore, isso respose, io, nquanto a mme,
 Non saccio che bbò dicere Castiello,
 Ne mmaje aggio saputo, che ccos' è.
 Me so stato a sseccà lo cellevriello
 Tutta sta notte, e nno ne' è stato taglio;
 Nè nsaccio, si è cquà ppuorro, o capo d'aglio:

XX.

Ma da ste ccòse no nse pò scostare ;
 Pocc' aggio ntiso dicere , ch' è sforte ?
 Bravo , disse lo Rrè : nce porria stare
 Puro na cepolluzza , si pe sciorte
 No ll' avisse nzavuorio : che te pare ?
 Nce la voglio , diss' isso : ca de ll' uorte
 Chesta è lo meglio sciore , e st' addorillo
 Te fa subbeto aprì lo speretillo .

XXI.

Si è cchesto , secotaie , no nce vo niente
 Pe ffare sto Castiello , che ddecite :
 Jammoncenne a scavà sti ngredientè ,
 E ppo facimmo chello , che bbolite .
 Mettimmo n' aglio , e ppo no puorro , e rrente
 A schisto na cepolla ; e , cchiste aonite ,
 Torna da capo , e ffanne no rotiello ,
 E bbeccote ggìa ffatto lo Castiello .

XXII.

Scappaieno na resata , nche scomple ,
 Tutte quante chill' aute Conzurture ,
 Tanto che Pagliariello se corrie ,
 E sse votaie pe le menà li ture .
 Lo Rrè se sose , ca lo ccanoscie ,
 E strellanno , Che rrazza de Dotture !
 Disse : jate a ttrovare Masto Giorgio ,
 Che cco na mazza v' arrefile ll' uorgio .

Già

XXIII.

Già mme n'addono, ch'aggio fatto arrore
 A cchiammareve ccà, Ciucce mmardate:
 Bella groleia, pe ccierto, e bello annore
 Nne pò sperà da vuie ll' Aseñetate!
 Jatevenne: no mmoglio Conzortore:
 Jate primmo a la scola, e stodejate.
 No lo bolite fa? no lo ffacite:
 Quanno sò mmuorto ve n'addonarrite.

XXIV.

Mente lo Rrè co ll'aute spaporava,
 Vrennarulo, che steva a lo pontone,
 Guatto guatto, e ddé sguinzo cammenava,
 Pe s' accostà vecino a Recchiardone;
 E, cquanno ll'appe a ttaglio, te le chiava
 No paro de caucille a lo regnone,
 Che cchillo scuro viecchio nzallanuto
 Cadie de cuorpo nterra addebboluto.

XXV.

Nche se votaje, e bbedde lo prefato,
 Che se nne jeva pe li fatte suoje,
 Jetta no strillo: Ha rrutto lo mannato,
 Si Mà, sta bbestia nuanze a ll'uocchie tuoje.
 Uh maro me, mm'ha tutto sdellommato,
 Che nò nce fosse venuto ccà oje.
 Ma nce corpa la troppo confedenzia,
 Che bbuie le date, a ffa sta mpertenenzia.

XXVI.

Uh sfortunato, addove so arredutto!
 Disse lo Rrè? chi mme l'avesse ditto:
 Mm'avesse primmo tutto no presutto,
 Che bbenì a ffà st'afficio mmarditto.
 Dapò, che mme so acciso, e mme so strutto,
 Pe ssarvà de li ciucce lo deritto,
 Mme sento dire nfacce da nq mpiso,
 Ca nce corp' io a ffarel' esse acciso.

XXVII.

Ma mo ve servo io. Chiammate ccà
 Sso tierzo de sordate, che stà fore.
 Da chiste mo ve voglio fa mmezzà,
 Comme mm'ha da trattà no servetore.
 Vennero st' auti ciucce; e disse: Eilà,
 Facite no carizzo, ma de core,
 A tutte sti Dotture nzallanute;
 Mparatele no poco la vertute.

XXVIII.

Lloco vediste li Dotture a rrolla,
 Ch'ogne ssiesco de cauce, che mmenavano.
 Sti sordate arraggiate, int'a la folla,
 A li feliette, te le sdellommavano;
 E, mmente ll'uno tira, e ll'auto molla,
 A uno a uno te l'amimatoravano,
 Senza fa cunto de lo preveleggio,
 E accossì se scompette sso Colleggio.

Scompetura de l'Arragliata II.

DE LA
CIUCCCEIDE
 ARRAGLIATA III.



ARGOMENTO.

*Mente lo Rrè stà chino de penziere ,
 Nzuonno Selleno lo va a cconzolare ;
 Le dice , addò ha da ire , pe ssapere
 Da n'Aracolo chello , ch' ha da fare .
 Isso se sceta , e dda li Trommettiere
 La Guardia de lo cuorpo fa chiammare :
 Vene chesta de pressa , e passa mosta :
 Isso va mmiezo , e a Lettere s' accosta .*

L

NOn restano accossì spatolejate
 Le ffrunne tennerelle de le bbite ,
 Quanno de Maggio le grannenejate
 Scioccano da lo Cielo , comm'antrite ;
 Comme restaïeno tutte sdellommate
 Sti povere Dotture saporite ,
 A li cance , a li muzzecche , a le bbotte ,
 Che l'ammallaino , comm'a mmela cotte .
 B 6 Ma

II.

Ma lo Rrè chella sera se corcàje,
 Senza manco provà no po de paglia,
 Sempe decenno: Uh maro me, e che gguaje
 E' dd'avè a pprattecà co sta canaglia!
 Tata mio, no mm'avisse schiuso maje,
 Pocca mm'avive a mmette a sta vattaglia.
 Va te fida a sti vecchie nzallanute,
 Ca sì arrevàto. So cchiaziete scompute.

III.

Jeva pe ppeglià suonno; ma va serra
 Ll'uocebie, quanno staie chino de penziere.
 Già le pareva vedè dint' a la Terra
 Arme, cavalle, sordate, e bbannere:
 Già sentea lo fracasso de la guerra:
 Già bbedea puoste a ffuoco li quartiere;
 E isso mmiezo, comm'a no paputo,
 Strillà soccurzo, e non trovare ajuto.

IV.

Puro gira da ccà, vota da llà,
 Tanto stentaie, che se mettie a ddormì;
 Ma non tanto le venne a rronfejà,
 Che se vedette nnanze comparì
 No vecchieriello, che, pe ccammenà
 Co lo comodo suio, quanno vo asel,
 Jeva assettato ncopp' a n' aseniello,
 Tanto ammanzuto, che pparea n' agniello.
 Var-

V.

Varvajanca lo Rrè , nche lo vedle ,
 Pareva , che le facesse alleverenzia :
 Pocca , senza parlà , lo canoscle
 A cchillo tardo moto , a la presenzia ,
 Ch'era Selleno , che , nfra ll'aute Ddie ,
 Sa craaccà li ciucce p'azzellenzia ;
 E , pecchè ssempe ll'ha bboluto bbene ,
 Le ddefenne , e ncovierno se le ttene .

VI.

Arrevato , che ffuie lo vecchiariglio ;
 Rapie chella vocchella saporita ,
 E ddisse : Varvajanca poveriello ,
 Ccà sò bbenuto , pe te dà la vita .
 Ma tu puro si stato n'aseniello ,
 A nno mmenì a ttrovarne a la meschita .
 Vieneme trova llà , ch'avarraie gusto :
 Non dobbetà , viene a ttrovà sto fusto .

VII.

Non tanto ste ddi chiacchiare scompette ,
 Che bbotaie vico , e sse l'appalorciaje .
 Fremma , Selleno , fremma , e cche faciette ,
 Ch'accossì mo mme chiante , e tte nne vaje ?
 Torna ccà , lo Rrè nzuonno le decette ,
 Addò vaie co la bbestia ? Vi che ffaje ?
 No nme lassà , de razia , accossì ppriesto :
 Tornate arreto , e ccontame lo riesto .

Aspet-

VIII.

- Aspetta, ca mo torna. Era ncocciato.
 Lo vecchiacone, e sse l'appalorciava.
 Tanto, che isso mmederse abbannonato,
 Co la vocca pareva, che l'afferrava
 La coda de lo ciuccio; ma lo sgrato,
 Co tutto chesto, puro trottejava.
 Isso a tterare, e cchillo a ccammenare,
 Tanto che stracquo se venì a scetare.

IX.

Se sceta, rape ll'uocchie, e cche bbedette?
 Doie cude co la vocca tenea sirente:
 De duie de chille ciucce, ch'io decette,
 Che, ppe caccia le mmosche, tenea rente.
 Mmederle, tale risa le venette,
 Che sceppà le potive nzì a li diente;
 Ma chille scure steano a no pontone.
 Perute, ch'era na compassione.

X.

Comme a no peccerillo, che sperduto
 Va pe ddinto a le ccammare a la scura;
 S'uno dice: Mo vene lo paputo:
 Eccolo là, mo scenne pe le mmura.
 E dde bbotta l'afferra; sorrejuto.
 Te lo vide restà pe la paura:
 Si mbè corre la mamma, e l'accarizza,
 Manco abbasta a llevarele la mpizza.

Ac-

XL

Accossì li due ciucce sbentorate
 Restaïeno, pe' lo jajo, addebbołute.
 Lo Rrè, che nn' avea propio na piatate,
 Cercava de darl' armo; ma perđute
 Erano tutte quante ste pparlate,
 Ca da lloro manco erano sentute;
 E, ppe paricchie juorne, nche bbedevano
 La facce de lo Rrè, s' addebbolevano.

XII.

Ma lo Rrè, ch' avea pressa de sentire:
 Da chillo vecchiarìello la resposta,
 Fece subbeto subbeto allestire:
 La compagnia de ciucce, fatt' apposta,
 Pe te l' accompagnà, quanno vo ascire.
 Vennero chiste, e agnuno passaie mosta.
 Nnanze a isso, se mesero a ffelera,
 E ncignaïeno a passà de sta manera.

XIII.

Mprimmo mprimmo venea no ciucciariello.
 Quant' a no sardagnuolo peccerillo,
 Chisto servea, comm' a no paggeriello
 De scuto, o de bbalice, mnanze a cchillo,
 Che guedava st' aserzeto noviello:
 Da ccà, e dda llà zompava, comm' a ggrillo,
 E ffacea cierti saute mortale,
 Propio, comm' a no ciuccio, senza sale.

Ap-

XIV.

Appriesso a cchisto , co na gran sodezza;
 Venea lo Caporetana rejale.
 Nn' aveva carreato de monnezza
 Sso ggentelommo , quanno stea spetale!
 Va te lo vide mo , comme se spezza:
 Pare , che ssia a lo Rrè frate carnale.
La lotamma porzi se mette nzauto ,
Quanno vede , ca summecca , e bbà nnauto.

XV.

Secotejava po na manejata
 De guastature , e dde sommozzature.
 Ssa razza era la cchiù desgraziata,
 Pocca n' avea nè ammice , nè favure .
Maro co cchi la sciorta stà mperrata :
Ca , fa che bbud , stà sempe a li calure ;
 Ma , pe ppotè sapè che bbanno a ffare ,
 V'aggio primmo na storia da contare.

XVI.

Nc'erano a cchille tiempe certe aosanze,
 Che li ciucce tenevano pe legge;
 Certe rregole a pparte , e ccostomanze ,
 Che nnuie mo le lleggimmo pe ddelliegge.
 De chesse , addove fa de le ccrejanze
 Lo Calateo , cchiù dd' una se nne legge;
 Comm'è cchella , che , quanno hanno scòputo
 De pescià , fanno a Giove no saluto .
 Com-

XVII.

Comm' a cchesta era chella , ch'ordenava ;
Che n' avesse potuto tornà arreto
Lo Rrè , quamo co spanfio cammenava.
Ma lo motivo de sso gran secreto ,
Studia nzò , cche bbuoie , ca no nse scava
Vasta ; nce steva apposta no decreto ,
Pe ssapè , che s' avea da prattecare ,
Azzò st' arrete non s' avesse a ffare.

XVIII.

Decea sto gran decreto chiaro chiaro :
Si se scontra erva , o spina pe la via ;
Che s' annetta , e sse leva ogni repara .
Si carche ffuosso , o matreco nce stia ,
Che ssubbeto s' acchiana paro paro .
Pe ffa chesto , nce stia na compagnia ,
P' annettà , e ppe llevà , de guastature ;
E pp' acchianare , de sommozzature .

XIX.

Appriesso po la pratteca mostava
De se servì de sti commannamiente :
Si truove ll'erva , o spina , che se scava ,
Pe nfi a lo radecone co li diente .
Si truove quarche ffuosso , o quarche ccava ,
S' enchia de ciucce vive , ca n' è niente ;
E agnuno , ch' avarrà st' afficio a sciorte ,
Corra , da vero ciuccio , a sta gran morte .
Sto

XX.

Sto correre mperrò, che se conceda
 A ognuno, nvita soia, na vota schitto:
 Che si uno se jetta, e le socceda
 De nn'ascì viva da no fuosso astitto,
 N'aggia cchiù sta fortuna, e nno nse veda
 De nuovo a ffa st'afficio costritto;
 Anze, si mbè lo Rrè lo ccommannasse,
 Che mponta co li piede, e nno nce passe.

XXI.

Chist'era lo decreto, e non s'è smuosso ...
 Da capo de li ciucce ancora ntutto:
 Pecca nzì a mano, si cade int'a no fuosso
 No ciuccio, e nn'esce co equarch'uosso rutto;
 Tu le puoie tornà a rrompere n' at'uosso,
 Ca no nce torna, addò pegliaie lo bbutto.
 Si no lo ccride, fallo, e bbì si passa:
 Tu lo puoie scortecà, ca no nse lassa.

XXII.

Ma tornammo a lo Rrè, che, ggià passate
 Sse catervie de ciucce lazzarune,
 Se nne veneva mmiezo a li sordate
 Cchiù bbrave de lo regno, e pprattecune.
 Chiste pe mmozzeccà, e ffa a ccauciate,
 N'aveano pare. Bell'anemalune!
 Va le ccerca a lo Rrè, ca no le ccagna
 Manco co Arlanno, o co Alisantrò Magna.
 Nnan-

XXIII.

Nnanze a isso nce jea na manejata
 De musece de funno ; e ssonature ,
 Che ffaceano nconzierto n' arragliata
 Co ttanta gargariseme , e ffigure ,
 Che le ffrotte , che bbanno pe la strata ,
 E ttutte l'Accademmie , e pprofessure ,
 A cchi sto canto avesse maie sentuto ,
 Pararriano no triyolo vattuto .

XXIV.

Da ccà sentive auzà no sopraniello
 Na vocella de zuccaro argentina ;
 Da llà no bbascio , che ghiev' a cciammiello ,
 Te ntronava da vascio a la cantina :
 N auto facea no trillo a ssosamiello ,
 Che se sentea sagli pe le stentina .
 Da chiste aonite po , vi che ffracasso
 Nne potea nasce maie , e che sconquasso !

XXV.

Ma chi pò maie contà , che te facevano
 Li stordemiente , che l' accompagnavano ?
 Cierte arraglià a la stesa se sentevano ,
 E cciert' aute pegliavano , e llassavano ,
 Chi sottile sottile se nne jevano ,
 E cchi ll'aria , e li munte te ntronavano .
 Nzomma faceano no fracassatorio
 Da nzallanire no Konzervatorio .

Mmie-

XXVI.

Mmiez a llo ro lo Rrè jea cammenanno
Ncoppa penziero, e mmanco le ssenteva.
E a Lettere se jeva abbecenanno,
Addò Sello co lo tempio steva:
S' accostaie tanto, che si stea parlanno
Uno llà ddinto, puro se senteva.
Ma la Musa già mponta, ch è stracquata:
Fremmammonce, e scompimmo st Arragliata.

Scompetura de t Arragliata III.



DE LA CIUCCEIDE ARRAGLIATA IV.



A R G O M I E N T O.

*Lo Rrè tirase a lo tempio , e sià aspettanno
L'Aracolo , che ll'aggia a cconzolare ;
S' accosta a nò pertuso , aosolejanno
Chello , che dda llà ddinto ha da scappare.
Sbotta no viento , e bbà mbrosolejanno
Certe ccose mbrogliose , che rrestare
Lo fanno nzallanuto ; e ppo se nn' esce
Mmalorato , ca niente nne capesce .*

I.

***E** Ettere è no paese acconciolillo ;
Che ppoco se descosta da Gragnano ;
Tanto , che ssi nce va no peccerillo ,
Magnanno la marena chiano chiano ,
N' ha sciso ancora ll'utemo morzillo ,
Che ll' è ncuollo , e lo tocca co la mano :
Schitto nce stà no po de montagnella ,
Ch' a ssagli , te fa fà na sodatella .*

Ncop.

II.

Ncopp' a la cimma, dinto a no scarrupo;
 Nce stà, comm'a na stalla de campagna,
 Ch'è nchiusa da no vosco cupo cupo,
 Che no ll'asce, si n' aie chi t accompagna.
 Ccà no nce siente maie strille de lupò,
 Ma sulo carch'auciello s'appapagna;
 Carch'auciello de chille desperate,
 Che bbanno, pe ffuì le scoppettate:

III.

Nc' era dinto a ssa stalla, ch'aggio ditto,
 Na statoa de Selleno vecchiariello.
 Chi nce l'avesse posta, pe dderitto
 No nse potea sapè. No contariello
 Sulo da tanno se trovava scritto,
 Che pportata ll'avea no cierto auciello;
 Ma quanno, e ppe cche ffine, e ppe cche ccosa,
 No nne parla lo Tiesto, e nno la Grosa.

IV.

Chesto sulo vastava, azzò che cchille,
 Ch'erano, comm'a ll'aute, anemalune,
 Mpriezzo se la tenessero: e bba dille,
 Ch'erano belle chiacchiare, e ccanzune,
 Ca nfacce te scioncavano; li strille
 Jevano abbista pe li torrejune,
 E ncignavano a ffare na revota.
Quanto fà la gnoranzia quarche bbota!

Ora,

V.

Ora, pe non sapè, da do venuta
 Fosse chella, a lo mmanco se credevano;
 Che fosse da le nnuvole caduta,
 Pe l'abbesugne, che le ntravenevano;
 Tanto, che s'uno pateva de caduta,
 O l'afferrava pantaco, correvano
 L'ammice, li vecine, e li pariente
 A cchisto luoco pe mmedecamiente.

VI.

Era pe cchesto tanto vesetato,
 Che no nce stea chi no nce fosse juto
 Ogne mmese a lo mmanco, e cche pportato
 No ne avesse caccosa pe ttrebuto:
 Anze nfi a mmo scordà de lo ppassato,
 Pare, che no nse ponno; e nn'è bbenuto,
 Ca pe nfi a oie (e nce porria scommettere)
 Ll'Asene de Gragnano sanno Lettere.

VII.

Sto luoco, eh'era primmo no stallone,
 Pe cchella statoa, tempio arreventaje:
 Pocc'aveva na gran connessione,
 Co cchella smorfia, che se ne' adoraje.
 Otra ca po, pe cchillo vecchiacone,
 Cchiù bbello luoco non potive maje
 Trovò meglio de chisto, addò s'asciava:
Tale Ddio, tale Tempio simeretaya.

Era

VIII.

Era chesta na grotta scura scura,
 Na cosa longa longa, e nnera nera;
 Ch' uno no nce starria pe la paura,
 Si mbè fòsse fojuto da galera;
 Ummeto, che cchiovevano le mmura:
 Friddo, che t'agghiacciava na vritera:
 Parea la casa de li scarrafune,
 La vera grotta de li sportegliune.

IX.

Ccà trovave na chelleta de paglia;
 Llà mpontave de fieno a no mmattuoglio:
 Ive cchiù nnanze, e ppegliave ná quaglia,
 Ma molla molla, e lliqueta, comm uoglio:
 Torna ve arreto, e nfacce a na moraglia.
 Nc'asciave ammontonato n'auto mbruoglio.
 Nzomma, vota da ccà, ggira da llà,
 O paglia, o stronza avive da trovà.

X.

Dint' a sta grotta, ncopp' a no montone
 De tutte sse schefienzie, e ppretecaglie,
 Nc' era na statoa, azzoè no mamnone,
 Comm' a cchille, che ttruove a ss' antecaglie:
 Chesta avea, nnantemmonia, no varvone,
 Ch' agne ppilo parea na nzerta d' aglie;
 No le speccecarriano na settimana
 Tutte chille, che ccardano la lana.

Nca-

XI.

Ncapo avea na corona ntorcegliata
Tutta de talle, e ppampane de vita;
Da sotta la teneano sopponentata
Doie recchiune de ggenio, fatte a bbita.
Tenea pò na nasella sprofelata,
Che te terava, comm' a ccalamita,
Chiatta, corta, ammaccata, e cco ddoje nozzole
Tanto aggarbate, che ppareano vozzole.

XII.

Da la cintura abbascio, justo, justo.
Te pareva no voje speccecato:
Da le ggamme, a le ccosce, nzi a lo bbusto
Era tutto de pile arragamato,
E pp' ogne pparte le colava musto.
Duie piede avea, ch' agnuno era spaccato,
Comme ll' hanno li piecore, e le ccrape;
Ma chiatte, e ttunne, comme so le rrape.

XIII.

Tenea accanto no bello ciucciariello,
Che ppàrea, le facesse no resillo:
Aveva n' uocchio tanto cianciosiello;
Che ll' avarrisse dato no vasillo.
De Lucca te pareva no cacciottiello,
E ppropio arresegnav' a no nennillo,
Co na codella tanto aggraziata,
Che ppàrea sangozuca speccecata.

XIV.

Le ccose po, ch'avea Selloeno fatte,
 Pe ssarvà carche ciuccio, e ddarle ajuto,
 Erano le cchiù bbelle, e scontrafatte,
 Ch'uno de vuje avesse maie sentuto;
 E ssi mbè tanno, puro da le ggatte,
 Agnuno de ssi cunte era saputo,
 Nc'era llà ddinto n'aseno vecchione,
 Che le ccontava co ddestenzione.

XV.

Chisso decea, ch'a ttiempo, che l'anguille
 Scappaïeno da lo maro a ll'acqua doce,
 Nc'era no ciuccio, che li peccerille
 Ll'aveano nzallanuto: ad auta voce
 Chiammaie Selloeno, e ffice tanta strille,
 Che cchillo, pe non farlo morì nfoce,
 Mannaie li lupe, che se lo magnajeno,
 E accossì chille cchiù no lo frusciajeno.

XVI.

E ppoco appriesso, quanno pò l'antrite
 S'accommenciaïeno a ffa da le nnocelle,
 Nce nn'era n'auto carreo de vrite,
 D'arciòle, de pegnate, e d'arvarelle;
 Pegliaie no nciampecone, e ttutte aonite
 Fice na pizza de ste scartapelle:
 Chiammaie Selloeno, pe n'esse ammallato
 Da lo patrone; e mmorie derropato.

N'ata

XVII.

N'ata vota , a lo tiempo , che bbolava
 La quaglia , e tterra terra se nne jeva ;
 No ciuccio , che ttantillo zoppecava ,
 Pe na mpolla a no pede , che tteneva ,
 Jette a Selleno , e mmente lo pregava ,
 Se vedeva la mpolla che ccresceva ;
 Po se fice nò cancaro , ch'a rrolla
 Mannaie lo ciuccio ; ma passaie la mpolla.

XVIII.

De cheste nne contavano a mmeigliara
 Tutte li ciucce , e cchiù sto Cecerone ;
 Ma la cosa , ch'aveano pe cchiù rrara ,
 E ddeva a ttutte quante apprenzione ,
 Era , ca da lo ciuccio chiara chiara
 Ascea da quanno nquanno na vocione ;
 Che rresponneva a cchi lo nterrogava ,
 E nzo , ch'uno volea , t'annevenava .

XIX.

Nzomma , era pe n' Aracolo tenuto
 Sso ciuccio da li ciucce ; e mnon passare
 Potea no juorno , che non fosse juto
 Carcuno 'llà , pe ffarse annevenare ;
 E isso , bello , dapò avè sentuto
 Chello , che le venevano a ccercare ;
 No le faceva perde lo vejaggio ,
 De la maniera , che ve contarraggio .

XX.

Tanno ancora no ns' erano accacciate
 Chelle bbernie, che mmo songo scompute;
 Chelle schefenzie, che l' antechetate
 Tenea co ttanto studio annasconnute:
 E nniette niette nc' erano ncappate
 Chille, che te faceano li sapute.
*Chi vo arrevà a ssapè cchiù, che non pore,
 Va de facce a na chiavecca a le bbote.*

XXI.

Pe cchesto, nfra li ciucce non s' aosava
 Chello, che cco le ffrunne se faceva:
 Ive a no tempio, e uno te cacciava
 No sportone de frunne, le mmetteva
 Tutte a ffelera, e ncoppa nce stampava
 Chello, ch' Apollo dinto responneva:
 Venea lo viento, e cco no scosta scosta,
 Nne portava le ffrunne, e la risposta.

XXII.

Manco nc' erano tanno le Ssebbille,
 Che te faceano mettere a ppaura:
 Le bbedive ngrefà co li capille,
 Quanno se le ppegliava la fortuna;
 Ll' uocchie te strevellavano, e cco strille
 Correvano sbattenno pe le mmura:
 Po jeano pe pparlare, e bommecavano
 No varrile de féccia, e tte mpestavano.
Ch'era

XXIII.

Ch' era addonca sto muodo accossì bbello,
 Ch' avevano li ciucce a sso pajese?
 Nn' avevan' uno, ch' era no giojiello,
 Che, senza farle spenne no tornese,
 Senza farle votà lo cellevriello,
 Se sprecava a no muodo assaie cortese:
 Si sapè veramente lo volite,
 Facite facce, ca lo sentarrite,

XXIV.

Stea dereto a lo ciuccio no pertuso;
 Addò s'avea da mettere lo naso:
 Da chisto asceva, quanno forejuso
 No ventariello, e cquanno adaso adaso;
 Ma sempè ll'uno, e ll'auto era addoruso;
 Mo d'aglio, mo de puorro, e mmo de caso:
 Parlava chiaro, quanno ascea co fforza;
 Quanno nò, lo sentive scorza scorza.

XXV.

Varvajanca lo Rrè, che lo ssapeva,
 Ca se nc'er' addonato ll'anno arreto;
 Arrevato a lo tempio, le pareva
 Mill'anne de sorchiarne carche ffieto;
 E, bbotato a Selleno, le deceva,
 Che ll'avesse sprecato lo secreto;
 E, ggià che ll'avea fatta la mprommessa;
 No nce ll'avesse resoluta a bbessa.

C

Po,

XXVI.

Po, non potenno cchiù, jette de bbotta
 A schiaffa naso, e mmusso a lo pertuso;
 E stea tutto sorriesseto da sotto,
 Aspettanno lo viento forejuso.
 E ffacea nfra de se: Ah ah, mo sbotta!
 Mo se nne vene! Viento mio piatuso,
 Jesce viento mio bello, jesce ccà fflore,
 Conzolame sso naso, e cchiù sto core.

XXVII.

Quanno ncuorpo a lo ciuccio, a mmano manca,
 Accommenzaieno a bbolle li decrete.
 Allerta, apre ssa vocca, Varvajanca,
 No nte le ffa scappà ste ddoie mofete:
Se bramate d'aver ciò, che vi manca;
Andatene a chi manea ciò, ch' avete.
 Nzerra mo, Varvajanca, agliutte forte:
 Che ppuoie sapè si torna cchiù sta sciorte.

XXVIII.

Accossì fuie l'Aracolo, ch' ascle
 Da cuorpo a ll' aseniello; ma restaje
 Ncanna a lo Rrè, che no nse lo potie
 Agliottere sta vota. Quanno maje
 Parlaie sto ciuccio, che no nse sentie,
 E ccosa accossì scura le scappaje?
 Venite n'ato juorno a ffarne razia,
 Ca po ve contarraggio sta desgrazia.

Scompetura de l' Arragliata IV.

DE LA
CIUCCEIDE
 ARRAGLIATA V.



ARGOMENTO.

*Li ciucce vann' attuorno corejuse ,
 Pe ssapè , c' ha lo Rrè , che stà nzorfato :
 Fanno rotiello , e rrestano confuse
 Nsentire no cannone , ch' è sparato :
 Fanno no serra serra , e stanno nchiuse ,
 Che pparea ggìa lo Munno arrevotato .
 Lo Rrè , p' accojètare sto remmore ,
 Esce , e bbà , comm'a ppazzo , pe llà ffore.*

I.

Comm' a no peccerillo , c' ha abbistato
 Na lacertella dinto a no pertuso ;
 Mpizza la mano , e ccaccia ntorcigliato
 No serpe , che llà ddinto stea annascuso :
 Resta lo scuro tanto storzellato ,
 Che rraspannose tutto lo caruso ,
 Non sap'isso mmedesemo che ffare ,
 Non ha manc' armo de se la felare.

II.

Accossì mmo lo Rrè, che fforejuso
 Lo naso llà ddereto avea mpizzato;
 Restaie tutto no piezzo, e stea confuso;
 Senza sapè addò steva, e cch'era stato:
 N'avea core tirà da lo pertuso
 Lo naso, pe ppeglià no po de sciato;
 E stea aspettanno, si carch'auto fieto
 Le mmoccase cchiù mmeglio sto decreto!

III.

Nce stie no piezzo, ma lo ciucciariello
 Era ntufato, e nno nse scommoveva,
 E sse sentea sghizzà lo cellevriello,
 Che ggìa tutto mpestanno se nne jeva:
 All'utemo penzaie lo poveriello,
 Ca morea nfoce, si llà cchiù nce steva;
 Tiraie lo naso, ascie chiano chianillo,
 Pigliaie sciato, e ss'aprie lo speretillo.

IV.

Po, senza manco di comme, nè cquanno,
 Senza manco votarese da reto,
 Se nn'ascie fore; e ghiea sempe penzanno,
 Si potea dà de musso a cchillo fieto:
 E cchille, che lo stevano aspettanno,
 Pe ssapè lloro puro quà ssecreto,
 Vedennolo venire accossì affritto,
 Passanno, s'allargaieno, e stieno zitto:
 E ppe:

V.

E pperute perute s'abbiavano
 Appriesso a isso, pe se nne tornare;
 Non moveano la coda, e ccammenavano,
 Comm'a papute, senza pepetare;
 E ppe tutte li luoche, addò passavano,
 Non canosceano ammicce, nè ccompare:
 Jevano comm'a ttanta connannate
 Ngalerà mmita, ch'era na piatate.

VI.

Arrevate che ffuieno, se nne jette
 Lo Rrè a la tana deritto deritto;
 E, ssenza di bonnì, se nne trasette
 A ttrovà la lettèra zitto zitto:
 No mmagna, non bo veverè, e sse mette
 A ppenzà a cchello, che ll'è stato ditto:
 Non ppenza a cchille, che le stanno attuorno;
 Non bedè manco Proceta, o no cuorno.

VII.

Avite visto maie no passariello,
 Ch'into a no caravattolo è ncappato?
 Cala la coda, e a cchillo fenestiello,
 Da dò pegliaie lo bbutto, stà ncantato:
 Si mbè vaie pe le dà carch'aceniello,
 N'apre lo pizzo, tanto stà sionato.
 Accossì stea lo Rrè, sempe penzanno
 A cchillo fiato, a cchillo gran malanno.

VIII.

E ddecea nfra sé stisso: E' na gran cosa
 Sta chelletta mmardetta, eh' aggio ntiso!
 N' ha avuto maie besuogno de la grosa
 Sso fieto, ca, nch'è sciuto, se nn'è sciso;
 E mmo che ll'è afferrato? Vá arreposa
 Co sto pinolo ncuorpo, che mm'ha miso!
 Selleno, e ch'aggio fatto, ch'a mme ssulo
 Mm'aie da trattare propio da cetrulo?

IX.

Ma che ppò esse maie? N' arrivo a ntenneré
 'Comme sta cosa se pò maie sprecare.
 Che nce manca? La mano. E, ssi pretennere
 Volimmo ajuto, avimmo da cercare
 N'auto a cchi puro manca? E bbà a cōpremere
 Sto trase, e jesce. Comme pò aiutare,
 A cchi no nsa addò mettere lo pede,
 Uno, che non tten' uocchie, e nno nce vede?

X.

Chiano. Non ha ditt' isso veramente:
 Pe ttrovà chello, che bbuie pretennite,
 Jatè a ttrovà chella razza de ggente,
 Che n' hanno mano; ma, si lo bbolite,
 Jatè addò chille, che non hanno niente
 De chello, che pportate, e cche ttenite.
 Accossì ha dditto? Accossì ppropio: e bbia,
 Chessa è la via de mme fa i mpazzia.

E ccom-

XI.

E ccomme nò? faciteme faore:
 Si nuie co tutto chello, che mmo avimmo
 Non potimmo fa niente; a fortiore,
 Chi le manca sto ppoco, che ttenimmo,
 Non pò fa manco sale. Nc' è Ddottore,
 Che ddica lo ccontrareio? Vi ca simmo
 Coffeiate, Selleno! e mme sa a mmale,
 Ca mme vuoie trattà propio da anemale.

XII.

Cheste, e cciento aute ccoese, mano mano,
 Passavano pe ccuorpo a Bbarvajanca,
 Pe bbedè de potè caccia le mmano
 De chello, c'ha no ciuccio, e a n'auto manca;
 Ma no nce dea de cuorpo, e cchiano chiano
 Nce nne vennero tanta, a bbranca a bbranca,
 Che, a lo rreto, la panza l'abbottajeno,
 Comm'a ppallone, anzi che no scappajeno.

XIII.

Ma, si lo Rrè facea sti cannicchie,
 Chill'aute, che ll'aveano accompagnato,
 Nne faceano castielle! E ggià paricchie,
 La stessa notte, aveano accommenzato
 A ffa rotiello; e ttutte, comm'a ssicchie
 Spertosate, scorreano: Che d'è stato,
 Decea lo primmo, che lo Rrè marfuso
 Se nn'è tornato, e subbeto s'è nchiuso?

XIV.

Mo te lo ddico io, deceva n'auto :
 Isso penzava a ffa morà sta terra ,
 Comme sapite , e mmetterse cchiù nn'auto.
 Selleno ha dditto: E' l' malan , che t' afferra,
 Tu sì bbecchione , e tte vuoiè mette nzauto ?
 Ogge , o craie criepe , manca chi la serra ?
 Donca nce lo levammo già da tuorno ?
 E' ffraceto , non campa pe nfi a ghiuorno.

XV.

Poveriello ! Perdìmmo no gra Rrè !
 Nè nce nne venarranno cchiù de chiste.
 Pò esse , che no mmora . E ghiuto , tè ,
 Nce ll' ha dditto Selleno . E lo ssapiste ?
 Oh , chillo mo , che N'ave ditto a mme .
 Gioja mia , no mme quaglia . E nnon bediste
 Comm' ascie nzallanuto ? Che ppe cchesto ?
 Uppola , craie lo bbide priesto priesto .

XVI.

A n' ata bbanna s'erano adonate
 Ciert' aute , che ffaceano li sapute ;
 E nce stamo de chille sbentorate ,
 Ch' a lo Collegio fujeno vattute ;
 E ddeceano : Già ssimmo arrojenate .
 Uh poverielle a nnuie , simmo spedute .
 Quarche gran guerra va pe lo taoliere ;
 E ssentite , si è ghiusto lo penziero .

Quan-

XVII.

Quanno maie so bbenute ssi golic ,
 De fa , a lo Rrè , ste mmura , e sto castiello ?
 Caccosa nc' è ! Chi sa , si chelle spie ,
 Che mann'attuorno , o puro quarch'auciello
 Ll'avarrà dditto , ca pe ccheste bie
 A ffravecà se ncigna quà bbsciello ?
 Adde : è ghiuto a Selleno , e nn'è ttornato ,
 Comm'agnuno ll' ha bbisto , destorbato .

XVIII.

Ll'avarrà dditto , ca già li nnemmice ,
 Comm'a rrasulo , se songo ammolate ,
 Pe nce scapozzà a ttutte , comm'alice .
 Poverielle a nnuie aute sfortunate ,
 Addò jarrimmo ? Va a ttrovà cchiù ammice ,
 Va trova cchiù ppariente , nzanetate !
*Ca , quann'uno è ncappato a na desgrazia ,
 Pò sperì , ca no nc' è na bbona razia .*

XIX.

Accanto a lloro s'era , chiano chiano ,
 Fatto n' ato rotiello corejuso
 De ciucce cchiù gnorante , e bbscia mano ,
 Che mmetteno lo naso a ogne pertuso :
 Chiste , ch'erano mo de quatt' a ggrano ,
 Nzentire sto pparlà , ccossì spantuso ,
 S'aggliottieno la cosa de la guerra ,
 E la corzero a spanne pe la Terra .

Non

XX.

Non sapite? Che d'è? Passammo guaje.
 Veramente? Accossì fosse boscia.
 E cch'è stato? Jere appunto, uno scontraje,
 Uno de chille, che ffanno la spia.
 Pe tutte sti contuorne; e mme contaje,
 Ca veneano volanno, chesta via,
 Trenta vascielle, chine de cannune,
 E tteneano cevate li focune.

XXI.

No mme di niente, responneva n'auto,
 Ca ll'ato juorno io puro le bbedette.
 Frate mio, comme correno! ogne ssauto,
 Che ffanno, è mmiezo ruotolo. Me jete:
 • A scarrecà neopp'a no poco d'auto,
 E nne vedie na mmorra, che bbenette
 Propio, addò steva; e ghie pe la paura
 Tanto, che ffeto, comm'a la fortuna.

XXII.

Si è cchestò, so arrevate? N'ata vota?
 E ll'aie viste tu propio? Co cchist'uocchie.
 E mmo addò stanno? Va te le rrevota:
 Int'a ste ssirve, e ppe sti carafuocchie.
 Uh mar'a nnuie, nce mettarranno mmota,
 Nche schiara juorno! E chilli belli truocchie
 De fieno addò jarranno? So pperdute..
 A cchesso pienze? Nuie già simmo jute.
 Men-

XXIII.

Mente sto ffuoco s'era già aHommato,
 Lo Rrè, che stea co cchillo gran panzone,
 Che v'aggio ditto, se sentle no frato:
 Auza na coscia, e ffa no pedetone
 Accossì ggruosso, accossì spotestato,
 Auto si se crepasse no cannone;
 E ppiglia, pezzecanno pezzecanno,
 Tre crucce, che lo steano ventejanno.

XXIV.

Le ppiglia, e tte le sbatte pe dderitto
 Nface a la porta, ch'era già nzerrata;
 Ma se rompe a lo bbutto, e ppe lo stritto
 Esce co li tre cciucce ngravogliata.
 Lo tierzo de sordate, ch'aggio ditto,
 Che ssempe stea de guardia a cchella strata,
 Portate da lo viento, e dda le bbotte,
 Se mesero a ffuire, comm' a ccuotte.

XXV.

Ma pecchè lo fraeasso, e cchiù lo fieto
 Se sentle quase pe tutto lo Stato;
 Chille, che non sapeano lo secreto,
 E dde la guerra avevano parlato,
 Steano a ssenti: quann' uno da dereto
 Strellaie: Cannone è cchisto, ch'è sparato.
 No nte ll'aggio ditt'io, respose n'auto:
 Sienterillo, e ncignato già l'assauto.

Nzen-

XXVI.

Nzentì strillà , Sparato è lo cannone ,
 Va te le ppesca , addò se so mpizzate ;
 Se mesero a ffùl p'ogne pontone :
 A lo ffùl , scontraieno li sordate :
 Chiste crescieno la confosione ,
 Pocca credeano d'esse secotate ;
 Chille credeano , ca le ssecotavano ;
 Ma che bbuò secotà ? tutte scappavano .

XXVII.

Nzallanute da ccà , dda llà ffujevano
 Pe le bbie , pe li campe , e ppo tornavano ,
 Trasevano a le ttane , e ppo an'ascevano ,
 Strellavano , chiagnevano , arragliavano ,
 Venevano , correvano , mmestevano
 Tutte chill' aute ciucce , che scontravano ,
 Sempe decenno : fuite , nzerrateve ,
 Sbrigateve , sarvateve , manateve .

XXVIII.

Ccà bbedive na ciuccia , che strellanno
 Jea co no ciucciariello a la ncorrenno ;
 Llà trovave no ciuccio , che cchiammanno
 Jea li compagne , chiagnenno , chiagnehno :
 Chi co la coda mmocca jea teranno
 No vecchiariello , che bbenea cadenno ;
 E tutte aveano ncuorpo no zeffunno ,
 Che pparea revotato già lo Munno .

Fuie-

XXIX.

Fuieno tanta li strille, che lo Rrè ;
 Co ttutto, ca stea tanto nzallanuto ;
 Sentle sto gra rremmore ; e ppe ssapè ;
 Che ccos' era, e dda dove era venuto ;
 Co ll'uocchie nchiuse, disse : Eilà? che nc'è!
 E bbedenno, ca nullo avea sentuto,
 Raple ll'uocchie, vedette, e rrevedette,
 No nce trovaie nesciuno, e sse sosette.

XXX.

Venne a la porta, e la trovaje aperta :
 Esce fora, e ccresceva lo remmore :
 Cammina, ascia na mmorra, che ghiea sperta ;
 Nne ferma uno : Me magno mo sto core,
 Disse, si no mme cunte allerta allerta
 Che mmalanno v'afferra lloco ffore .
 Signore mio, s'è bbista, ch'è ffojuta
 Na cannonata, e nno nse sa, addò è ghiuta?

XXXI.

Nzentì chesto, na risa le scappaje ;
 Co ttutto, ca stea tanto mmeperuto :
 Pocca, nzentirlo dī, s'allecordaje
 De chello, che dda cuorpo ll'era sciuto :
 E ssi mbè se vedea chino de guaje ,
 Penzaie , ca tutto ll'auto era perduto ,
 Si primmo n'accoietava sto remmore ,
 Ca nne potea sortì carch'auto arrore .
 Mper-

XXXII.

Mperzò jeva strellanno: Addò corrite,
 Ciucce senza jodicio? addove jate?
 Chi v'ha puosto paura, che ffoite?
 Chi ve votta, che ttanto vrociolate?
 Tornate ccà, fremmateve, e bbedite
 Chi è stato chillo, che v'ha secotate.
 O ciucce veramente de gra spireto,
 Ve fa mette a ffuì, puro no pireto!

XXXIII.

Comme quanno lo Cielo se confonne,
 Pe li viene, che ffanno a sscozzune,
 Lo maro va pe ll'aria, e cco cchell'onne,
 Ch'una va, e n' autà vene, a rrampecune
 Mo lo vide sagli, mo s'annasconne,
 Mo ll'aie 'n Cielo, mo dinto a li cavune;
 Si lo Sole miez' uocchio te nce jetta,
 S'ammroschia, se fa n' uoglio, e ss'arrecetta:

XXXIV.

Accossì sto remmore, che dderaje
 Quase tutta la notte, e che cresce
 De manerà, che all'utemo arrevaje
 A ffa tremmà le pprete de le bbìe.
 Nche ddisse: è stato pideto; e mostaje
 Lo Rrè la facce, subbeto sparte.
 Ma pecchè nc' era ancora quarche stella,
 Se nne jett'isso a ffa la nonnarella.
Scompetura de l' Arragliata V.

DE LA
CIUCCCEIDE
ARRAGLIATA VI.



ARGOMENTO.

*Selleno torna, e trova Varvajanca,
Che sta confuso, e cchiù lo nzallanesce.
Po se scommove, e nee mmatte na chianca;
Ca ll' uno, e ll' auto cchiù se ntenneresce.
All' utemo le dice: Mazzafranza.
Fanno pace, e lo chianto se fornescce;
E ppe lo fa scompì de conzolare,
Le mmoecca tutto chello, c' ha da fare.*

I.

*Già s'era la vajassa de lo Sole
Gr Sospita, pe ghi a spanne la colata;
E nfacce, pe ppaura de le mmole,
S'avea na pezza rossa arravogliata:
Na barbuglia de papare, e dde cole,
Nconzierto le faceva na matenata;
E già Frettella se sentea strillà:
Doie tre ccavalli caldi, caldi, cà.*

Quan-

II.

Quanno lo scuro Rrè, ch'appapagnare
 Tutta la notte non avea potuto
 Pe li strille, e l'allucche, che stouare
 Nzi a lo maro avarriano saputo;
 Co cchillo frisco, che bervesegare
 Sole ncampagna, nche lo Sole è sciuto,
 Pegliaie no sonnariello doce doce;
 Quanno de bbotta, lo scetaie na voce.

III.

Varvajanca, deceva, Varvajanca;
 Scetate, rape ll'uocchie, auzate, e ssiente;
 Se sose, e cco na facce janca janca
 Pe la paura, e sbattenno li diente,
 Disse? Chi è? Votate a mmano manca;
 Lebbreca chella, e bbi ò vide niente.
 Se vota chiano chiano, e nce trovaje
 Selleno, e tutto alliegro: Che nce faje?

IV.

Che nce faie ccà, Selleno mio? le disse:
 Singhe lo bemmenuto, a mille razie.
 Figlio, chillo respose, si sapisse
 Quanto me so ppesate le ddesgrazie,
 Che ttu passaste, no mme lo dderisse.
 Ma chi nce corpa? si nn'aviste strazie,
 Non te puoie lamentà, che de te ssulo,
 De te ssi, che si stato no cetrulo.

Com-

V.

Comme? disse lo Rrè, io n'aggio fatto
Tutto chello, che bbuie mm'avite ditto!
So bbenuto a ttrovarve, e mme so sfatto
Pe ccàmmenare, e ghì sempe de fitto.
Aggio puosto lo naso, guatto guatto,
Addò sapite; e mme so stato zitto,
Aspettanno lo fiato: e mmo, ch'è stato?
A lo rreto, cornuto, e mmazziato.

VI.

E' ppoco tutto chello, ch' aie patuto:
Ca mbè te mmeretave auto castico.
Comme? dimme no poco? si bbenuto
A ttrovà a mme da ammico, o da nnemmico?
Che bbo dicere chesto? Aggio creduto
De te venì a ttrovare comm'ammico.
Comm'ammico, è lo vè? ma n'ha mmancato
Pe tte, d' averme miezo stroppejato.

VII.

Selleno mio, chi t' ha dditto ste ccose,
Sarrà carcuno, che mme vorrà male.
Io farte no dammaggio? e nno nse scose
Primmo sta vita, e mmora a no spetale.
Che mmora io primmo a bbotte de ventose,
De sangozuche, e dde serveziale,
Che ddarte no desgusto, tè, tantillo:
Da vero vero so no peccerillo?

Si sta-

VIII.

Si stato troppo gruosso , me despiace :

Ca si nò , poco me nne corarria .

Dimme , che t'aggio fatto ? e , ssi te piace ,

Famme , che ssacc' io mo ? mpalà 'n Turchia

Ma primmo , Lleno mio , facimmo pace ,

E ddimme chesso , ch'è na gran boscia .

E' bboscia , si ppe ccierto ; no lo ccredere

Fa a mmuodo mio , vattenne a ssaccredere

IX.

Già che lo bbuoie sapè , mo te lo ddico :

Non t' allecorde ajere , che ffaciste .

A cchillo ciuccio , che bbenea co mmico ?

Non sulo sto nasone le mettiste

Dereto , addò tu saie ; atta de nnico !

Ma co ttutto sso musso te nce jiste

A ffravecarte proprio : che ccredive ,

Locco te , ca si nò , no lo sentive ?

X.

Pe sta cosa restaie lo poveriello

Stroppejato de muodo , e dde manera ,

Ch'è na compassione : pacioniello

Mio , che pparive proprio de cera ,

Tant' iere dellecato , e ttenneriello ;

E mmo chi sa , si campe nzì a sta sera !

Uh leva lè , no mme nce fa penzà ,

Ca dint'a ll' arma me sento schiattà .

E , ssi

XI.

E, ssi n' è ttenneriello, e ttu nce torna;
 Disse lo Rre: lo ssà sto naso mio,
 Ch'ancora me fa mmale: e bba te nforna;
 Selleno mio: non saccio, che ggolio
 Te vene de schiattareme. Chell'orna
 Non so dde preta? E ssi so ppreta, io
 Mo, co sto musso, che le potea fare?
 No nte lo ddico, ca mme vuoie crepare?

XII.

Te compatesco, figlio, ca non saje
 Chello, che ddice. Che nne può sperare
 A ll'utemo da n' aseno! Siente: aje
 Da sapè, che sto ciuccio, che te pare
 De preta, è ppreta, e non è ppreta; e mmaje,
 Senz'isso, no mme pozzo freccecare:
 Se fa carne, quann' esce pe ste sserve;
 Se fa de preta, quanno no mme serve.

XIII.

Jere jie cammenanno, e nno l'aveva
 Manco appannato, quanno tu veniste;
 Tanto, che ttanno tanno se faceva
 De preta; e ttu corriste, e lo mmestiste.
 Che ddice mo? sso musso le poteva
 Fa tutto chello, che ttu le faciste?
 Che ddice? parla: tu si ggìà ammotuto?
 Te compatesco. Si bbiechio storduto.

Nzen-

XIV.

Nzentì chesto, no chiagnere a sselluzzo
 Scappa a lo Rrè, che no nse po accoiètare;
 Se vo jì a bbrociolà dint' a no puzzo,
 Se jetta nterra, e non sa, che se fare;
 E ttanto fuie lo chianto, che no vuzzo
 Dint' a la tana nce potea natàre;
 E, a lo rreto, lo bbuono vecchiarìello!
 Fice isso puro n' uocchio a ppesciarìello.

XV.

Chiagnea Selleno, e cchiagnea Varvajanca.
 Chillo dècea: no cchiù. Chisto: mo mòro.
 Chisto: o musso, nne voglio fa na chianca.
 Chillo: mo mmo mme vene n' antecoro.
 Chisto: primmo m' avesse rottà n' anca,
 Che stroppejarte, ciucciariello d' oro.
 Chillo: scumpela mo, no cchiù, mantiene;
 Mo nne votto lo ciuccio, e cchi lo tene.

XVI.

All' utemo Selleno lo sosette,
 L' annettaie ll' uocchie, e sse l' accarezzaje;
 E accossì sto' sciabbacco se scompette,
 Ca, si nò, sarria juto pe nzì a ccraje.
 Po, co na facce a rriso, le decette:
 Via, core mio, nò cchiù ppenzammo a gguaie;
 E azzò nfra nuie sta pace aggia a ddorare,
 Mo te voglio l' Aracolo sprecare.

Sac-

XVII.

Saccio, ca poco, e niente lo sentiste:
 Ma pecchè fò? pecchè tu nce corpaste,
 Quanno tutto sso musso nce mettiste
 Dint' a cchillo niozio, l'appelaste;
 L'appelaste de muodo, e te nce jiste
 A ffravecà co tutte ll'ossa maste,
 Che cchillo fieto, e cchillo scuro sciato
 Nn' appe da scire miezo stroppejato;

XVIII.

Puro chillo morzillo, che nn' ascle,
 Te mmoccaie chello, che ddevive fare;
 E bbolea gnefecà: Sti gran golie
 Addò le Scigne te le ppuoie levare:
 Pocca cheste so bbone, pe ste bbie,
 Mura, turre, e ccastielle a ffravecare:
 Hanno le mmano, che bbuie non avite;
 E le manca la coda, che ttenite.

XIX.

Comm'a no guaglionciello, ch' a la scola
 S'è mbrogliato, pe ffare no latino,
 Ca no nne ntenne manco na parola:
 Te lo vide votà lo Calapino,
 Se raspa, se storzella, e cco na mola
 Se roseca mez' ogra; sì, vecino
 A isso, uno nce stà, che nce lo mmezza;
 Lo vasa, e ffa no zumpo p' allerezza.

D

Ac.

XX.

Accossì Varvajanca, nche ssentette;
Ca Sellenno ll' avea spalefecato
Chello, che ggìa l' Aracolo decette,
E lo teneva tanto ammojenato;
Fice no sauto, e ppo de bbotta jette
Pe l'abbracciare, e a cchillo sbentorato
Na ciampatella te le conzegnaje,
Che ll'arco de lo pietto le sfonnaje:

XXI.

No nce lo sfonnaie propio, ca chillo,
Vedenno, ca mal'ario nc' era a Bbaja,
Se quartejaje, e ffice no zumpillo;
Ca, si nò, nce potea sortì qua bbaja.
Po le disse, redenno: Và chianillo
Co sti carizze, core mio; abbaja
N' ata vota da vascio, ca' no mporta
Saglì nzì ncoppa a ttozzolà la porta.

XXII.

Scusame, Lleno mio, ca io non saccio
Mo che mme fare, tanta è la prejezza.
Ma, dimme n' ata cosa: comme faccio,
Pe ghirele a ttrovà? Si no mme mmezza
Primmo carcuno, addove stà lo jaccio,
E mme nce tira propio a ccapezza,
Va te le ttrova. Mo te lo ddich' io,
Respose ll' auto: chisto è ppiso mio.

Si

XXIII.

Si vaie trovanono Scigne, addò te vuote,
 Nn'asce a mmeigliara pe ttutto lo Munno:
 Ch'auto bene no nc'è, si lo revuote
 Da la capo a lo pede, nzì a lo funno.
 Vaie, p'asempio, pe Nnapole; e a le bbote
 Nne scuntre tanta, che sso no zeffunno:
 Vanno a ppede, ngalessa, nzì ncarrozza,
 Che te fanno abbottà tanta na vozza.

XXIV.

La scigna vonno fa a lo Caaliero
 Chille, che ssongo de cchiù bbascia mano:
 Tutte co lo volante, e lo staffiero
 Vanno facenno ncrine, e bbasamano:
 Aggio pegliato un bravo repostiero,
 Che mm'è bbenuto apposta da Milano;
 Fa sorbette d'incanto, e sceroccate,
 Peti-zucchere, e ccicere nnasprate.

XXV.

Una, che stenta tutta na settimana
 A ffa di rana a bbotta de spotazza;
 La Festa pò te pare na Vammanna:
 Senza carrozza chi pò jì pe cchiazza?
 Sciù sciù, è bbriogna, co na scarpa chiana
 Sott' a lo sacristano! Che si ppazza?
 Sore mia, comme vaie, tu si stemata:
 Che mporta po, ca lave la colata?

XXVI.

Ciert' aute zerbinotte corejuse

Te vonno fa la scignà a li Milorde :

Feteno de catramma, e bbanno nfuse

D'acqua de maro, e mmazzecanno corde;

Tutto lo juorno fanno cuse, e scuse

Co le sciammerghe, e le danno le ccorde;

Te scanosceno puro li denare,

Po lo pesone non ponno pagare.

XXVII.

Nc' è chi fa lo poeta, e bbò jì a pparo

Co Ccasa, e ffa la scigna pe nzì a Ddante:

Non fa no vierzo, che non parla sparo:

Non bo parola, che non sia sonante:

No nce truove no sienso, che ssia chiaro:

Uneco ammico de le cconzonante.

Quanno le ccanta po, non saie, si è uorco,

Gatto maimone, o spireto de puorco.

XXVIII.

N' ato vo fa la scigna a lo Boccaccio ;

Ma non sape dir' auto, ch' Jo vorrebbe

Unquanco dar de' calci a quel furbaccio

Di rovaio, e ad ogni otta io lo farebbe :

Jer l' altro otta catotta un buon migliaccio

Mi mangiò, e a le guagnel, che non m'increbbe:

Io lo mangiò ad un desco, ov' era a scranna

Il gran Don Cherche, e la Contessa Orlanna.

Nce

XXIX.

Nce so ccierte , che bbonno fa a bbedere ,
 C'hanno perza la vista a stodejare .
 Si le bbide , te fanno stravedere ,
 So ppeccerille , e pportano l'acchiare :
 Toccale po , ca le siente cadere
 Da vocca cierte ccose da crepare .
 A lo rreto , ched'è ? Pe ffa ssa vista ,
 Restano ciucce , e pperdeno la vista .

XXX.

Comme so ddinto Napole , accossine
 So ppe ttutto lo Munno de sse Scigne ;
 Ca nn'ogne pparte nn'asce nzina fine .
 Ma non serve mperrò , che ttu te mpigne
 A ttrovà chesse , ca non so le ffine :
 Si te vuois fa rescire li designe ,
 Vattenne 'n Varvaria , ch'a ssa comarca
 Nce trovarraie lo Regno de la Varca .

XXXI.

Llà stanno propio ; pocca llà so nnate
 Le bbere Scigne , e stanno tutte aonite
 Mmiezio a ccierte ccampagne abbannonate ,
 Che lluceno l'arene , comm'a bbrite ,
 Pe lo Sole , che ll'ha ccarcarejate :
 No nce songo nocelle , pe ffa antrite ,
 No nce so ffrunne , no nc'è mmanco sale ,
 No nc'è mmanc'erva pe sserveziale .

XXXII.

Ma no nce irè tu : ca de portare .
 A no Rrè non commene la mmasciata .
 Trova duie , che se sacciano sprecare ,
 E tte pozzano fare na parlata :
 Falle ssagli nzì a Ssomma , e bbrociolare
 Dint' a lo monte , pe ssape la strata :
 Llà ttrovarranno n' Uorco , che stà lesto ,
 Pe nce le ffa portare priesto priesto .

XXXIII.

Orsù , stà ncellevriello , e non fa arrore ,
 Che ppo non te n' avisse da pentire .
 Governamette , schiavo , e sservetore .
 Accossì dditto , se mese a ffuire .
 Restaie lo Rrè ccontiento ; ma lo core
 Le decea : Chi nce manne ? Chi ha da jire ?
 Ccà sarranno le bbotte . Vi che mbruoglio !
 Non saccio si lo supere sto scuoglio .

Scompetura de l' Arragliata VI.

DE LA
CIUCCCEIDE
 ARRAGLIATA VII.



ARGOMENTO.

*Se fa no gran concurzo , pe trovare
 No ciuccio , che te faccia nà mmasciata.
 Se nce prova cchiù dd'uno , e bbà a pparlare,
 Ma co la coda restano cacata .
 Lo Rrè s'arraggia , e non sa , che se fare ,
 Vedenno la facenna già mbrogliata .
 A ll' utemo compare n'Aseniello ,
 Che mprommette levarlo da si' appiello.*

I.

COMme chi va , pe ffarse na sciacquata ,
 A na cesterna lorda , e schefenzosa,
 Tira no cato , e nc'ascia nfracetata
 Na soreca ; lo jetta , ca n'è ccosa :
 Torna a tterà , e nce vene mpetenata
 Na grasta de no càntaro , lo posa :
 Nne tira ciento , e ttutte te le ghietta ,
 Ch'acqua maie no nce trova , che ssia netta.

II.

Accossì ghiusto justo soccedette

A Bbarvajanca, che bbolea trovare
 Qua ciuccio pe st'afficio : so nce jette
 Mpazzenno cchiù dde n' ora , pe ncarrare
 Uno , a lo mmanco ; ma no le rescette :
 Scarta lo primmo , ca non sa parlare ,
 Nne scarta n' auto , ca' non sa che ddire :
 No nne trov' uno , che nne pozza scire .

III.

A ll' utemo , vedennose mbrogliato ;

Disse : Abbesognarrà , che nce vav' io .
 Ma Selleno non vole , e mm' ha ordenato ;
 Ch' io no mme parta da lo regno mio .
 Che ffacimmo ? Selleno , mm' aie gabbato .
 E dda dò t' è bbenuto sso golio ?
 No nc' è auto , che ffarce no concurzo ,
 Mano a li fierre , e ppo che nn' esca n' urzo .

IV.

E bbotatese nfacce a no sordato ;

Ch' a la porta facea la sentenella ;
 Va , e ffa , che mme sia ccà mo mmo portato
 Lo trommettiero , pe na certa chella .
 Disse , e nno ntanto ll' ordine fo ddato ,
 Che cchillo parze , ch' avesse la scella :
 Corze , trovaie lo ciuccio , le parlaje ,
 E bbolanno yolanno lo portaje .

Eilà ;

V.

Eilà , disse lo Rrè , nche lo vedette ;
 Va pe tutte li luoche de sto regno ;
 Jetta no banno , e ssona le ttrommette ;
 Ch'agnuno , che se vanta d'avè gniegno
 De fare , e dde portà co le staffette
 Na mmasciata d'annore , e de gra mpegno
 A la Reggina Scigna , de portante
 Venga , ca le darrò li paraguante .

VI.

No ntanto appe fòrnuto de parlare
 Lo Rrè , che cchillo se lecenziaje .
 Jette a tutte li luoche , addò trovare
 Potea cchiù cciucce , e llà ttrommettiaje .
 Jie pe tutte li sghizze , e ttavernare ,
 Ca llà ssapea , ca nne trovava assaje .
 Fice ascì fora ogn'aseno , che nc' era ,
 E sse mese a strellà de sta manera :

VII.

P'ordene , volontà , e ccommannamiento
 De lo patre de musece , e ppoiete ,
 De lo lequedatore de strumiento ,
 De lo specchio de ll'uommene coiete ,
 Protettore de ll'uno e ll'auto viento ,
 Distruttore de pinole , e mmofete ,
 Varvajanca Llostrissemò anemale
 Rrè de tutte li ciuccè , e ccapcrale ,

VIII.

S' ordena, se fa nnoto, e sse commanna
 A tutte chille, che ssanno arragliare,
 Che bbaano mo, co na capezza ncanna,
 Nnanze a isso, ca ll'ave da parlare;
 E cchi stesse mpeduto, che nce manna
 Lo scagno. State attiente a nnon mancare:
 S' ha da mannà de pressa na mmasciata
 A na Scigna, ch'è ttesta ncoronata;

IX.

Mperzò vengano tutte, luoco luoco,
 Viecchie, giuvene; gruosse, e ppeccerille:
 Se lassa lo mmagnà, se leva juoco
 Da li ciucce d'azzò, nzì a li verrille.
 Vengano primmo, che se faccia vruoco,
 E cch'a ccantà accommenzano li grille:
 Venga chi s'addelletta de trascorrere
 Nnanze a lo Rrè, ca s'ave da concorrere.

X.

Accossì ghiea strellanno: e nche ghiettato
 Fuie pe tutto lo regno sto gra bbanno,
 Te vediste lo Munno arrevotato.
 Chi jeva sulo, e cchi se jea nzajanno
 Co no compagno, che pportava a llato:
 Cierte se nne veneano jastemmanno
 Chiano chianillo, e le decea lo core,
 Ca sto concurzo no le facea nore.

Chil-

XI.

Chille, che non poteano cammenare,
 Mannavano li figlie, o li nepute:
 Jate, figlie, sacciateve portare;
 Mo è ttiempo de mostrare la vertute.
 Site figlie a no patre, ch'appassare
 Maie non s'ha ffatto da li cchiù ssapute.
 Manteniteme nfacce lo decoro,
 Faciteme allegrà nnanze, che mmoro.

XII.

Oh che ttenesse mo dec'anne manco,
 O si nò, mm'ajutasse sto guarrone;
 Ve vorria fa a bbedè comme lo sanco,
 Mme sento freccetà a st'accasione.
 Che nce vuo' fa, dengraziane sto granco,
 Che mme tene nchiovato a sto pontone.
 E ddècenno accossì, se l'abbracciava,
 E cco lo musso te le bbavejava.

XIII.

Na ciuccia co lo figlio stea a ddescorrere:
 Figlio, tu non si nnato pe la vateca,
 Ca ggià liegge scorrenno, e ssaie trascorrere,
 E stodejata aie tutta la grammateca.
 Curre, puca mia d'oro, e bbà a cconcorrere,
 Miettete tutte quante sotto nateca:
 N'avè a ppaura manco de l'Ancroja,
 Ca te vene a ssentire mamma toja.

XIV.

Duje aute vecchie steano a no pontone,
 Ch' uno era ciunco, e n' auto stroppejato,
 E ffaceano nconzierto sto catone:
 Vecchiaja cana! Ahù ttiempo passato!
 Vi si la perdarria st' accasione,
 Decea lo primmo: va ca mo ha trovato
 Lo Rrè chi nne pò sel co cquarch' annore.
 La virtù s'è sperduta, e cco nnuie more.

XV.

No nc'è cchiù chi sa fare na parlata,
 Non bid' auto a lo Munno, che mposture;
 Birbe, ca le farria na cauciata,
 Quanno te vonno fare li dotture:
 Non so bbuone, ch' a ffarte na cacata
 Pe ttutte ssi pontune, e a ffa remmurè.
 Addò so ghiute chilli ciucce antiche,
 Che pparlavano meglio de le ppiche!

XVI.

T' arrecuorde, ammecone caro mio,
 Sett' anne arreto, quanno me mannaje
 A Giove lo Rrè nnuosto, pe ggolio
 De levà da nuje aute chilli guaje?
 Chille fuieno trascurze, che fic' io;
 Vasta dire, ca Giove, nche arrevaje
 Nn appe gran gusto, e ppe ffarine faore,
 Mmc facette aspettà tre ghiurne fore.

Pe

XVII.

Po trasette, e le fice no saluto,
 Che, ppe mpararlo, n'anno nc' era stato.
 Me disse: Che t'accorre? Benmenuto.
 Io ch'era cuorvo, e stea premmedetato,
 Te lo fice restare ascevoluto,
 Co n' arrenghà, che nce perdìe lo sciato.
 Che bbuò? Potive scepparlo li diente.
 Vasta, mme ne tornaie senza fa niente.

XVIII.

Tanno se potea dire, responnette
 Ll'auto, ch'era lo tiempo de li ciucce.
 Va te le ttrova mo. Quanto le ghiette
 Tutte sti milordielle scuccemucce.
 Non bid'auto, che ccacapozoniette,
 Che se so ppuoste ncasecavallucce:
 Non fann'auto, che bbevere, e mmagnare,
 E nno nse parla cchiù de stodejare.

XIX.

Sempe, che mm'allecordero lo contrasto,
 Ch'app'io co lo Dottore cepollaro,
 (Lo saie?) non pozzo toccare sto tasto,
 Senz'avè voglia de jettarme a mmaro.
 Io voleva defenne, ca lo mmasto
 Nce facea nore, e sservea pe rreparo;
 E cchillo era ncocciato a mmantenere,
 Ca nc'era de sbreguogno, e ddespiacere.

Com-

XX.

Comme sbreguogno ? io mo le responnie .
 Tu si ddottore , e nnon saie manco sale .
 E ppo te lo pegliaie pe ccerte bbie ,
 E cco ccierte argomiente natorale ,
 Che cchillo poveriello rommanie
 Tutto no piezzo , comm' a n'anemale .
 Jettemo po a lo Rrè , che ghiodecaje ,
 Ch' io non sapea che ddire , e ppassaie guaje .

XXI.

Mente ssi viecchie stevano ncanute
 A llaudà tanto li tiempe passate ,
 Erano a minorra li ciucce venute ,
 Pe lo concurzò , da tutte le strate .
 Lo Rrè le bbidde , e ddisse : Bemmenute ,
 Sapite già , pecchè v'aggio chiammate .
 Via su , saglite ncoppa a sso montone ,
 Ch' io ve stongo a ssenti da sto pontone .

XXII.

Ma , azzò la cosa meglio aggia a rrescire ,
 Saglite a uno a uno , p' avetare
 Ogni remmore , che nce pò ssortire .
 Fatto chesto , v' avite a ffe gorare ,
 Ch' io sia Scigna , co cchi s' ha da comprise ,
 Ecco cchi pò avarrite da parlare .
 Parlate a ggusto vuosto , ch' io dirraggio
 Nzò , che mme pare , e ve responnarraggio .
 Sa-

XXIII.

Sagliette apprimmo chillo ciucciariello ,
 Ch' era venuto nziemo co la mamma .
 Mmederlo , se nn' affese lo rotiello ,
 E cco no sgrigno , agnuno auzaie na gamma ;
 Ma le carcaie la gnora lo cappiello ;
 Che bbolite peglià lo Munno a fflamma ?
 Figliemo vene ccà , pe fflarse annore :
 Chi no lo pò sentì , ch' esca llà ffore .

XXIV.

No ncignammo da mo , sia bbenedetta ,
 Lo Rrè se vota , a fflare sso remmore .
 Chiano no poco . N' auzà la cascetta ,
 Ca mo , a tte pprimmo , te faccio ascì fore .
 Ma , Segnò Mo mme frusce la cauzetta :
 Statte zitto , co tutte le bbon' ore :
 Dì , figlio mio , dì chello , che t' accorre :
 Non perdimmo lo tiempo , che ggìa scorre .

XXV.

Nzentì chesto lo scuro ciucciariello ,
 Accommenza a ttremmare co na pacca :
 Mamma , mamma . Che bbuoie , figlio mio bello ?
 Nzeccate ccà . Cher' è ? Voglio fa cacca .
 N' è nniente , core mio . Lo zommaciello
 Te fa mmale ? mo mamma te l' ammacca ,
 E ccorze , pe ssagli : ma nche arreyaie ,
 Lo scuro peccerillo se cacaje .

Fi-

XXVI.

Figlio mio, ll' hanno puosto già a ppaura
 Sti vecchiacune, co ttenirle mente;
 Ma no mporta: avarraggio la fortuna
 De sentì io puro st' asene valiente:
 Che ssaglia mo carche llamma sicura.
 Maddamma, chesto a Uscia no mporta niente,
 Sbota lo Rrè; statte no poco zitto:
 E ssò ddi vote, che te ll'aggio ditto.

XXVII.

Appriesso a cchisto venne no vecchione,
 Sàglie, teneva mente, e nnon parlava.
 Ched'è? Non parle? Aie visto lo Mammone?
 Sferra lo Rrè. Ma chillo cchiù ncocciava.
 Sacciammo, che bbò dì ssa mmenzione.
 A ll' utemo sparaje: lo ccà aspettava,
 Che mm' avisseyo data la risposta,
 Ch'io po nce la portava, pe la posta.

XXVIII.

Comme? da me aspèttave la mmaisciata?
 Si Ssegnore, e ppe cchesto era venuto.
 Buono, ll'avimmo propio annevenata.
 Scinne, zì viecchio, cà tù ggìa si ghiuto.
 La ciuccia n' appe gusto, e na resatà
 Se fice: ma lo Rrè, comme sentuto
 N' avesse niente, sè votaje a n'auto,
 Che, pe pparlà, già s' era puosto nzauto.

Sc-

XXIX.

Signora mia, io songo mo arrevato.
Bravo, disse lo Rrè, chisso mm' ha ntiso;
Signora mia, io songo mo arrevato.
Secoteja, ca chesso è ggìa ccompriso.
Signora mia, io songo mo arrevato.
Tridece co lo gallo, fuss' acciso.
Signora mia, io songo.... E bbà a mmalora!
Pe ccaretà, cacciatennillo fora.

XXX.

E la ciuccia: N'è nniente, s'ha sperduta
La lezzione, che s'avea mparata.
Mannaggia, quanne maie nce si bbenuta;
Sfrattatela da ccà ssa mmeciata.
Lo Rrè se nfada. Piglia na caduta,
Pe ffuire la ciuccia sfortonata,
Che s'appe a rompe ll'uosso de lo cuollo;
E ll'auti ciucce le cadieno ncuollo.

XXXI.

Che bbolite da me? No mbì, so mmuosse
A ffa li guappe co na poverella?
Pozzat' essere accise. Gruosse gruosse
Se vonno mette co na peccerella?
No mbì quanta? La carne pe nfi all' osse
Ve pozza fa scolà la cacarella.
Ma chille buono buono l'ammallajeno,
E, a ccauce nculo, fora la cacciajeno.

Ca

XXXIII.

Ca starrimmo cojete na stezzella;
 Disse lo Rrè; non se potea dorare.
So cchiacchiare: Addò sta na femmenella;
Sempe remmure s' hanno da trovare.
 Via su, decite mo carch' autà chella:
 Saglia llà ncoppa chi se vo provare.
 Nne venne n' auto, mizeo sciöffellato;
 Ch' avea proprio na cera de scannato.

XXXIII.

A la commesechiamma vosta autissema:
 Bona, disse lo Rrè, st' accommenzaglia.
 Na chelleta ve faccio profonnissema;
 Po, azzò che lo niozio mio se quaglia,
 Na commesaddemmanna a Uscia llostrissema
 Ve cerco, che dde recchia na retaglia
 Mme mprestate: ch' io dinto, zitto zitto,
 Nc'aggio a ppescià nzò, che lo Rrè m'ha dditto.

XXXIV.

Fegliù, chi t' ha mmezzate sse crejanze
 De parlà ccossì llurdo a sta presenza?
 Scusateme, credea de no sta nnanze,
 Signore mio, a bbosta lleverenzia.
 Comme si llocco! N' aie ntiso mo nnanze,
 Ch' io mm'aggio fegorato stà nn' assenzia,
 E ffare, comm' io fosse proprio chella,
 E mperzò t'aggio fatto sta vocella?

Uh

XXXV.

Uh si mme deciarria de ssa manera,
No le resciarria janca la colata.
Me votarria de bbotta co na cera,
Ch'apprimmo apprimmo restarria nchiovata:
Che bbuoie di, brutta facce de Meggera?
Scirpia porca mia, scigna cacata,
Lava colata, senza la cammisa,
Comme si bbrutta, puozz'essere accisa.

XXXVI.

O piezzo de cetrulo nzemmentuto;
Lo Rrè se ngrifa: bello mmasciatore!
Chist'è lo vero muodo d'avè ajuto.
Simmo arrevate a cchiunzo. Ascite fore,
Sfrattate, ca mm'avite già storduto,
Rompiteve lo cuollo. Si Ssegnore,
S'ha da jì co la lengua strascenune,
E bbo fa sto mmerduso a ccostejune.

XXXVII.

Mente co cchella lengua a ttaccariello
Facea fuorfece fuorfece lo Rrè,
Se vedette no bello ciucciariello.
Janco janco llà miniezo comparè.
Po s'azzeccaje, e cco no resariello,
Disse nfacce a lo Rrè: Ccà stò ppe tte:
Me nce manna Selleno, c'ha saputo,
Ca chiste ccà t'aveano nzallanuto.

XXXVIII.

Io so cchillo, che pporto le mmasciate,
 Ch' isso sole mannare a cquar'che ammico:
 Damme na mmorra de li cchiù fforzare,
 Dille, che se nne vengano co mmico.
 Jarraggio addò la Scigna, è nzanetate
 Nosta, te levarraggio da sso ntrico.
 Non dobbetà de niente. Damme ll' aute,
 E ttienete co ttico sti masaute.

XXXIX.

A sta vista, a sta chella, a sto pparlare;
 Te vediste attassà li concorrente;
 E ssenza potè manco pepetare,
 Ll' uno co ll' auto se teneva mente.
 Lo Rrè stisso si jea pe spaporare,
 Pe ll' allegrezza non potea di niente.
 All' utemo strellanno se jettaje
 Nnanz'a lo ciucciariello, e le parlaje.

XL.

Gioja mia, chi te pò ddengraziare
 De sso favore accossì segnalato?
 Che ppò di Varvajanica, e cche ppò fare;
 Si mm'aie co na capezza ncatenato?
 N' è ttiempo, disse chillo, de parlare,
 Ca ggìa ll' aria, e lo Munno s'è abbricato,
 Mo avimmo da partì. Lecenziajeno
 Ll' aute, e ssule sulillo se nzerrajeno.

Scompetura de l' Arragliata VII.

DE LA
C I U C C E I D E
 A R R A G L I A T A VIII.



A R G O M I E N T O .

*Co li compagne parte l' Aseniello ,
 Pe ghì a trovà le Scigne ; e bbia via
 Contanno te le va no contariello .
 Trovano n' Uorco po , che ffa resia ,
 E le mosta no bello quattroschiello .
 A ll' utemo le mmette pe la via ,
 E , cco l' ajuto de no cierto viento ,
 Le ffa portà pe ll' aria senza stiento .*

I.

Glà Febbo s'avea rotta la nocella ,
 Co tutte li fresune , mmiezo mare :
 Chiagnea lo Cielo , e pp' ogni ffenestella
 Lle llocerne mettea , pe l' ajutare :
 La Terra se facea già la vonnella
 De lo viseto ncuollo arrepezzare :
 Pe ll' uorte , e ppe le ssirve sule sule
 Lo chiagnevano ll' Asce , e li Cucule .

Quan-

II.

Quanno disse a lo Rrè lo ciucciariello :
 Leva mano a le cchiacchiare , ch'è ttardo:
 Damme li ciucce , e statte ncellevriello
 A ddarmille , ch' agnuno sia gagliardo ;
 No mmoglio chi vò stà mpappalardiello,
 O chi vo stà a ghiettarese lo cardo ;
 Le bbuoglio tuoste , giuvene , e scheunte ,
 Chiatte , gruosse , majateche , e cchiantute.

III.

Sciglie tu chi te pare da ccà fflore ,
 Nce nn'è no Tierzò , e sso li cchiù bbaliente,
 Lo Rrè le disse ; e tte ponno fa annore ,
 Ca so ssolete a ghire p'acqua , e bbiente.
 Via su , fegliule mieie , facite core ,
 Se vota l'aseniello , ca n'è nniente :
 Venite appriesso a mme,e sse n'acchiappaje
 Na trentina , ch' abbista l'annasaje .

IV.

Schiavo . Schiavo . Bonnì . A rrevederece .
 Commanname . Obbretrato . Trasetenne .
 No lo ffarraggio maie . Non trattenerece .
 Non nte scordà la strata . Vavattenne .
 Fegliule state attiento . No mpederece .
 Covernate . Screvimmonce . E bbattenne .
 E , fiattase sta gra llecenzejata ,
 Se mettettero a fa na trottejata .

V.

Iea nnanze chillo bello ciucciariello ,
E ppo veneano tutte ll'auté appriesso;
E ccammenaïeno co no trottariello ,
Che llozo stisse deceano: Ch' è cchesso?
Pegliaïeno Somma; ma a sto viaggiello
Restaïeno, pocc' agnuno morea ciesso ,
Si facea la montagna de corzera ,
E sarriano crepate chella sera .

VI.

Disse lo Caporale : Veramente
E' troppo fatecosa sta sagliuta :
Jate chiano chianillo , ca n'è nniente;
Quanto arrevammo ncoppa , ca po è ghiuta.
Ma , pe ffarve sagli cchiù allegramente ,
Ve voglio dì na storia scanosciuta
De n'Uorco, che llà ddinto stà a ccovare ,
E cco cchi nuie po avimmo da trattare .

VII.

Sacciate addonca , ch'into a sta montagna ,
Addò nuie trasarrimmo , nce stà n' Uorco .
Chisto no scenne maie pe sta campagna ,
Ma stà ssempe llà nchiuso, comm'a ppuorco.
E cche magna llà ddinto? Che nce magnà?
Magna prete , schefienzie . Comm'è spuurco!
Magna oro, magna chiummo , magn' argento.
E lo ppò padejà? Nne fa n' agniento .

Se

VIII.

Se chiamma lo Vesuvio, e ha na sore,
 Ch'è ppur' Orca, e sse chiamma Zorfatara,
 Che sta poco descuosto, e ascieno fore
 Tutte duje a no ventre: è ccosa rara,
 Comme so ttutte de no stisso ammore.
 Si chella stace allegra, se reschiara
 La facce de chist' auto; ma si chisso
 Se nzorfa, chella ncigna a ffa l'aggrisso.

IX.

Si chisto mo peppeja, e cchella fumma:
 Si chella ha ffamme e chisto ave l'abbramma.
 Veve chisto? e cchell' auta fa la mbumma:
 Chella cammina, e chisto auza la gamma.
 Chella stà co na facce de Maumma?
 E cchist' abbotta, e tte fa chiammà mamma.
 Nzomma si chella ride, e chisto ride;
 Si chisto chiagne, chiagnere la vide.

X.

Na cosa schitto ha chisto, che n' ha chella;
 E pprevene, ca chisto è ccorporente,
 E cchella accanto a chisto è n'alecella.
 Chisto fa ciente ccose cchiù ffetiente,
 Pecchè ssole patè de cacarella,
 E cquarche bota vommecca pe niente;
 E cquanno lo bbò fa, pe nzì a la vocca
 Saglie de sta montagna, e tte l'abbocca.
 E mper-

XI.

E mperzò , a ppadejà quanno n' arriva
 Co ppeglià lo ttabbacco , e fflommecare ,
 Vommecca na montagna viva viva ,
 E ffa cose de fuoco , e dda crepare :
 Ma chella , pecch'è stetecca , se civa
 Co mmañco rrobba ; e ppe la padejare ,
 Quanno chisto va ncoppa a ddevacà ,
 Chella s'ajuta co lo ppeppejà .

XII.

Mar'a nnuie poverielle , e addò nce puorte ?
 Decevano li ciucce sbentorate ;
 Nch'arrivarrimmo llà , sarrimmo muorte :
 Già simmo jute , e mmiezo padejate .
 Comme de jì a l' acito ve sa a fforte ?
 Responnea ll'auto : ma non dobbetate ,
 Isso ve stà aspettanno . Allegramente ,
 Saglimmo ncoppa , ca no ve fa niente .

XIII.

Co sti trascurze , e aute contarielle ,
 Che ghiettero facenno pe la via ,
 Arrevatterò a ghiurno , addò le cchelle
 Vommecca ll'Uorco , quanno fa resia :
 Veddero , ca da certe ssengolelle
 Ascea no po de fummo : Mamma mia :
 Strellaieno tutte : già ll'Uorco peppeja :
 Si fa na vommecatà , nce stroppeja .

E

Che

XIV.

Che bbommecà ? Venite appriesso a mme ;
 Disse lo ciuccio ; e zuffete , se jetta
 Dint' a la vocca ; e stea da llà a bbedè ,
 Quanno ll' aute zompavano . Ma , aspetta ,
 Ca mo veneno ! Chisto : Tocca a tte .
 Decea chill'auto : No mmoglio , a cchi aspetta ,
 Levà lo luoco . Eh' Uscia mme perdona ,
 Nol farrò mmaie : sta cosa non va bbona .

XV.

A ll' utemo , co ttanta pregarle ,
 Co ttanta strille , e ttanto ammenacciare ,
 Ca le ffarria scannare , le rescle
 De fa zompà lo primmo ; e , nche ghiettare
 Vedette lo compagno , se nce jìe
 Ll'auto acconcianno ; e ppo , senz' aspettare
 Ll'uno a ll'auto , fatt'armo , se lassajeno
 Tutte nziemo , e dde botta se jettajeno .

XVI.

Fecero , comme fanno co lo gallo
 Le ggallenelle ncopp' a n' asteciello :
 Vola isso abbascio , c' ha fatto lo callo ;
 Cchiù de na vota , a ffa sso volariello ;
 Vanno lloro pe mmettersè a ss' abballo ,
 Ma le ncigna a ttremmà lo stommaciello :
 Tornano a scellejà ; ma , nche se lassa
 La primma , la paura a ttutte passa .

Jet-

XVII.

Jettate tutte, jieno cammenanno
 No poco pe c'hell' aria chiarascura.
 Veccote ll' Uorco, che stea peppejanno :
 Uh mamma mia, e cche brutta fegura!
 Si l' avesse scontrato Cont' Arlanno,
 Se sarria juto sotto pe ppaura;
 E, ssi cò cchisto sò mettesse a ffronte,
 Na gioja pararria porzì Ccaronte.

XVIII.

Po votatose a lloro : E mbè, le disse;
 Vuie site chille, che mmanna Selleno ?
 Gnorsì, disse lo ciuccio; a mme, e a cchisse
 Avite da portà. No po de fieno
 Magnateve, si è cchesto, ca jarrisse
 Tu puro, figlio mio, pe sso terreno
 Malamente dejuno : n'è bbejaggio
 Chisso, da farlo senza companaggio.

XIX.

Trasette dintò, e ascle co no spòrtone
 Zippo zippo de fave, d' uorgio, e bbrenna:
 Scusateme, si è ppoco, a le pperzone
 De la qualetà bosta, sta marenna:
 Potite fare na colazione,
 Ch'abbesogna, ch'io primmo mme la ntenna
 Co lo Scerocco, che ll'aggio mannato
 A ppregà, che mme dia no po de sciato.

E 2

Mme-

XX.

Mmedè ll' uorgio li buone compagne,
 N' aspettaieno, che ffossero pregate:
 Dieno dint' a la sporta a bbuon necchiune;
 Ca pe la corza stevano allo pate;
 Tanto, che cchelle cose 'n duie voccune
 Scomparieno, cche pparzero ncantate:
 Po, pecchè no nc' era auto, che ccardare,
 Se mettieno llà ddinto a ppassejare.

XXI.

Oh, già che stammo ccà senza fa niente,
 Se vota ll' Uorco, e avimmo d'aspettare
 N' ato ppoco, che bbengano li viene,
 Ch'aggio mannato mo nnante a chiammare;
 Ve voglio dà cierte trattenemiente,
 Che nc' avarrite gusto sengolare.
 Venite ccà: dint' a sta grottecella
 Ve voglio fa vedè na cosa bella.

XXII.

Trasieno dintò, e nfacce a cchelle mmura
 Co no cravone steano desegnate
 Certe cose, co cchiù de na fegura.
 Che bella cosa! Vuie v' addelettate,
 Pe cchello, che mme pare, de pittura?
 Disse no ciuccio. Mme spasso li frate,
 Respose ll' Uorco, co no tezzonciello,
 Da quanno nquanno, a ffa no quatosciello.

Car-

XXIII.

Carche bbota me vene qua fforore;
 Comme ll' ha Febbo, e ccarcata perzona:
 Quanno me vene, sento no remmore
 Dinto a lo cellevriello, che mme stona,
 E bbedo cose, c' hanno d' ascì fore
 Megliara d' anne appriesso. A ll' ora bona,
 Site Astroleco puro? Uh, pe sta via,
 Donco quinnee, e ffallo a cchi se sia.

XXIV.

Nche mm' acquieto, piglio no cravone,
 E le bbao pettanno pe sse mmure.
 Chessa è na bella sodesfazione!
 Se vota n' auto. Che sso ste ffegure;
 Che stanno desegnate a sto pontone?
 No le ccanosco. N' accorre, che ghiure,
 Lebbreca ll' Uorco: ca dapò mill' anne
 Hanno da comparè sti Varyajanne,

XXV.

Chessa è na storia, ch' è dde groleia vosta;
 E, ppe cchesto, ccà mmo v'aggio portate,
 Azzò vedite, quanto co la gnosta
 Cierte ve nnauzarranno. Ora sacciate,
 C' ha da venì no tiempo, che s' accosta
 Propio, quanno le Pparche hanno felate
 Gliommara settecento, e bbintequatto
 Ncopp' a le mmille, pe no cunto fatto.

XXVI.

A cchisso tiempo venarrà golio
 A no viecchio de jì a na montagnella.
 Chist'è lo viecchio , che ve dico io:
 Chest'è mmontagna, e sse chiamma Arenella.
 Chisto mme pare, a lo jodicio mio,
 C'ha perduta na meza chiancarella;
 E, ppe se le ffa mette tutte nove,
 E bbenuto a ste ssirve, che ccà tiruove.

XXVII.

Acchia naso ! decette uno de chille .
 E cche bella vocchella , che se trova;
 E' nnaso, ma che nnaso ? Si destille
 Tutto li nase , no nne puoie fa prova:
 Naso , addò so ccolate a mmille a mmille
 Li penziere , e bbertù nce fa la cova:
 Naso saputo , naso , ch'è allongato
 Pe li tanta niozie , c'ha addorato .

XXVIII.

Chesta è nà cosa , che no la credite ;
 Ma , si vedite na cocozza longa ,
 Senz' autà chella mme la credarrite .
 Quanno chesta è già schiusa, azzò s'allonga,
 No vaso d'acqua sotto nce vedite;
 E cchesta , co cchell' acqua se sdellonga
 De manera , che ssempe cresciarria ,
 Si ll'acqua sotto maie non mancarria.

Chi-

XXIX.

Chisto è lo capotroppa de ssa ggente,
 Che bbedite pe ttutte ssi pontune.
 E cche ffanno ccà cchisse aonitamente?
 Stanno a llaudà a bbuje aute, anemalune.
 Se so ttutte scopierte pe ppariente
 De li ciucce, e ppe cchesto a buonneccchiune
 Se so mpegate a llaudare sta razza,
 E ffanno cose, che nce vo la mazza.

XXX.

Chisso, che stace co la vocca aperta,
 Chi è, e cche ffa? Chist'è lo secretario,
 E ccanta, che te fa morì a l'allerta,
 Co na voce de passaro canario:
 E' ttutto buono, e bello; ma na certa
 Cosa, che ssole avè a lo tafanario,
 Lo fa stà co na facce, a bbota a bbota;
 Che no stà bbona, ma pare devota.

XXXL

E cchisso ccà, che le stà cchiù bbecino,
 E ppare, che ccontrastano nfra lloro?
 Chisso è ffiglio a lo viecchio, e ppe destino
 Se nc'è ttrovato, ca è no figlio d'oro:
 E' no saputo nfunno, e lo scarpino
 Se sa cauzà co ttutte ss'aute ncoro:
 E' ammico de l'ammice, ncrosejone
 Non te lo truove cchiù a n'accasejone.

XXXII.

Sapute, comm'a isso, e nniente manco;
 So cchist' aute, che stanno da sta via:
 E ttutte so de chille, che lo ghianco
 Te fanno parè nigro, arrasso sia.
 Chisso, che stà cchiù nnanzé, è lo cchiù ffranco.
 Che ppozza maie vantà la Povesia;
 Ma si accommenza a ddì, no la fornescè.
 Si pe ddoje ora no nte nzallanesce

VVIII

St' auto, che le stà appriesso, e a la fegura
 Pare propio la morte de Sorriento,
 Ave lo stisso male; e ssi a la scura
 Non se vede restà, non trova abbiento:
 Na cosa schitto nc'è, ca chillo dura,
 Pecch' ha che ddì, ma corre, comm'a bbiento;
 Chisto non dice troppo, ma ha n'affanno,
 Che, pe ddì na parola, nce vo n'anno.

XXXIV.

Venite ccà. Uh, comm'è bbello chisso!
 Spara no ciuccio, che stea a no pontone:
 Le ccude ha porzì ncapo lo scurisso.
 Non vide nè? Che d'è ssa mmenzione?
 Oh, chisto mo se pò chiammà l'aggrisso;
 Se vota ll' Uorco; è na tentazione:
 Che bboglio dì? No nne truove lo paro,
 Si reyuote porzì lo Lavanaro.

Chis-

XXXV.

Chiss' è no ciuccio : ma che ddico ciuccio ?
 So ttrenta ciucce dinto a no pasticcio.
 Farrà parlare Ciccio , e Ghiatanuccio ,
 Pe ffa la bbaja a Ghiatanuccio, e a Ciccio.
 Nfra tutte ll' aute pare lo galluccio ,
 E sta sempe allummato co lo miccio
 Ncopp' a la serpentina , pe ddà gusto :
 Cerca che bbuò , ca ll' asce int' a sso fusto.

XXXVI.

Si dice , canta ; t' appie na vocchella ,
 Che ppare propio propio lo vasillo ,
 Addò le Ggrazie fanno la cacchella .
 Si lo faie mprovesà ; te scaca chillo ,
 Che stà a Ggalluccio co la chitarrella .
 Si dice , t' sto libro , sprecamillo ;
 Te le fa dire cose , che nzonnato
 Maie chillo no nse l'ha , che ll'ha stampato.

XXXVII.

Si vuole na predecozza , te la jetta .
 Parla Carveno , comm' a no porciello .
 Magna , comm' a no Conte , e n' arrecetta
 No gallodinnio co no sfarzetiello :
 Ma te fa scompescià si po se metta ,
 Co ttanta ngiegne , a ddì no contariello ;
 E tte fa restà ll' uommene ncantate ,
 Ca tutte quante resceno a ccacate .

XXXVIII.

Pe cchesto ll'hanno posta ssa corona
 De cude , e dde grammegna ntorcegliata ;
 Co na campana ncanna , che te ntrona
 Tutte ste ssirve , e na cegna attaccata ;
 Po , co sti guarnemiente , bella , e bbona
 Te pararrà na bbestia ncoronata ;
 E ttutte ll' aute le farranno annore ,
 Da lo cchiù bbascio pe nzì a lo Prejore .

XXXIX.

Vedite chisto ccà , che se stà appriesso ;
 E ppareno cardasce , e ccammarata ?
 Chiss' auto farrà ttanto no pròciesso
 De nà storia , che isso s'ha accacciata .
 Mo pare , che la legga ; e ffarrà cchesso :
LA REGGIA DE LI CIUCCE CONZARVATA.
 De cchisto mo no nne pozzo di niente ,
 Ll' ammo cchiù , che ssi fossemo pariente .

XL.

E cchiste ccà , che stanno accossì nn' auto ?
 Pe cchiste mo , n' è llengua chesta mia ,
 Che le ppozza laudà ; trovate n' auto ,
 Che ssaccia di : ma chi nce resciarria ?
 So ccierte , c' hanno fatto no gran ssauto
 Ncopp' a trutto , nzì ncoppa a la bboscia ;
 E stanno sulo ccà , pe ffa faore
 A ssi pòvere ciucce affritte core .

No

XLI.

No mbl sta mmorra ccà? Comme so bbelle!
Chi so cchiste, previta de Messere?
Ccà fice ll' Uorco ll' uocchie a ppesciarielle,
E, ffiglie, disse, nn' aggio despiacere.
Chisse songo ciert' asene morielle,
Che non se potarranno trattenere
Tropo co ll' aute, e ppriesto scapparranno,
E le pprete porzì nne chiagnarranno:

XLII.

So ciucce puro addotte. Ma lo viento
Già se ne vene. N'è ttiempo cchiù cchisto
De perderlo co sso trattenemiento.
Eccolo llà. Già sponta. Ll' aggio visto.
Via su, fegliule mieie, stateve attiento:
D'armo, e dde core agnuno stia provisto:
Mo mmo volanno ve faccio arrevere
Addò le Scigne, che ghiate a ttrovare.

XLIII.

Ndì chesto, se vedette no cascione
Venì pe ll' aria pe ddinto a la grotta:
Quatt' aute viente, comm' a no pallone,
Lo portavano pesole, e dda sotto:
Uno da ccà le dea no scoppolotte,
N' auto da llà le schiaffava na bbotta,
Pe mmantenerlo sempe paro paro,
E non farle trovà carche rreparo.

XXXVIII.

Pe cchesto ll'hanno posta ssa corona
 De cude , e dde graminegna ntorcegliata;
 Co na campana ncanna , che te ntrona
 Tutte ste ssirve , e na cegna attaccata;
 Po , co sti guarnemiente , bella , e bbona
 Te pararrà na bbestia ncoronata;
 E tutte ll' aute le farranno annore ,
 Da lo cchiù bbascio pe nzì a lo Prejore .

XXXIX.

Vedite chisto ccà , che se stà appriesso ;
 E ppareno cardasce , e ccammarata ?
 Chiss' auto farrà ttanto no pròciesso
 De na storia , che isso s' ha accacciata .
 Mo pare , che la legga ; e ffarrà cchesso :
LA REGGIA DE LI CIUCCE CONZARVATA.
 De cchisto mo no nne pozzo dì niente ,
 Ll' ammo cchiù , che ssi fossemo pariente .

XL.

E cchiste ccà , che stanno accossì nn' auto ?
 Pe cchiste mo , n' è llengua chesta mia ,
 Che le ppozza laudà ; trovate n' auto ,
 Che ssaccia dì : ma chi nce resciarria ?
 So ccierte , c' hanno fatto no gran ssauto
 Ncopp' a tutto , nzì ncoppa a la bboscia ;
 E stanno sulo ccà , pe ffa faore
 A ssi pòvere ciucce affritte core .

No

XLI.

No mbl sta mmorra ccà? Comme so bbelle!
Chi so cchiste, previta de Messere?
Ccà fice ll' Uorco ll' uocchie a ppesciarielle,
E, figlie, disse, nn' aggio despiacere.
Chisse songo ciert' asene morielle,
Che non se potarranno trattenere
Tropo co ll' aute, e ppriesto scapparranno,
E le pprete porzì nne chiagnarranno:

XLII.

So ciucce puro addotte. Ma lo viento
Già se ne vene. N'è ttiempo cchiù cchisto
De perderlo co sso trattenemiento.
Eccolo llà. Già sponta. Ll' aggio visto.
Via su, fegliule mieie, stateve attiento:
D'armo, e dde core agnuno stia provisto:
Mo mmo volanno ve faccio arrevare
Addò le Scigne, che ghiate a ttrovare.

XLIII.

Ndì chesto, se vedette no cascione
Venì pe ll'aria pe ddinto a la grotta:
Quatt' aute viene, comm' a no pallone,
Lo portavano pesole, e dda sotto:
Uno da ccà le dea no scoppolotte,
N'auto da llà le schiaffava na bbotta,
Pe mmantenerlo sempe paro paro,
E non farle trovà carche rreparo.

XLIV.

Ma , nche bbeddero ll' Uorco , lo lassajeno
 Chiano chianillo calare nzì a nterra ,
 E , llassatolo llà , se la scocciajeno .
 Ccà ddinto è lo Scerocco ; e , azzò no sferra ,
 Nchiuso chill' aute viene lo portajeno ,
 Disse ll' Uorco ; jarrite terra terra ,
 Non dobberate : mettiteve a ffila ,
 Ch' avite da passà pe la trafilà .

XLV.

Po pegliaie certe ppezze , e l' ammarraje
 Ll' uocchie , azzò che n' avessero a ppaura ,
 Ch' aveano da volare ; e le pportaje
 Dint' a na grottecella stretta , e scura ,
 Le mmese a ffila , e ppo accossì strellaje :
 Armo , fegliule su , ca poco dura
 Sto bbolà , che ffarrite . E , hnitta nfatto ,
 Se mmoccaie sto cascione accossì ffatto .

XLVI.

Nche ll' appe mmocca , le deze doie strente ,
 Comme la gatta fa no sorecillo ;
 E , nzerrate le mmole co li diente ,
 Se l' aggliottie : po aprie chiano chianillo
 La vocca , e l' abbottaje ; e rrente rente
 A cchille ciucce stregnie lo mussillo :
 Cacciaje lo viento , che te le bbottaje ,
 E ssecato secato le pportaje .

Scompetura de l' Arragliata VIII.

DE LA
CIUCCEIDE
ARRAGLIATA IX.



ARGOMENTO.

*Arrevate li ciucce, no remmore
Fanno le Scigne, pe bbedè, ched' era;
Ma la Reggina, che ll'appe nzentore,
Le rrecevete co na bona cera.
Traseno a la Cetate, e ddinto, e ffore
Vedeno mirabilia chella sera.
Po se vanno a ccorcà, ca la Reggina
Le bbo ammette a l' aodienza la matina.*

I.

MEnte li ciucce, comm' a na fronnella
Jeano pesole pesole portate
Da lo Scerocco pe la grottecella;
Selleno, pe le fa trovà agghiustate
Tutte le ccose co la Reggenella,
Primma che llozo fossero arrevate,
Llà, matino matino, se nne jette,
La trovaie sola sola, e le decette:

Chiar-

II.

Chiarchiolla mia (ch'accossì se chiammava
 Chella, ch'era la capo de lo Regno,
 E le ffeste llà ttanno commannava)
 Chiarchiolla mia, aggio no gruosso mpegno;
 Mm'aie d'ajutare, si vuo' bbene a bbava;
 Aggio mprommisso de fa fa no ngiegno
 A ll'asenielle mieie, che mme so ccare,
 Quant'a cchist'uocchie, e ttu me puoie sarvare.

III.

Selleno mio, le r^{es}pose la Scigna,
 Io, comme saje, stò fflaglio de faglio;
 Ma, pe sservirte, che bbuo' che me mpigna?
 Eccome ccà, spienneme nzò, cche bbaglio:
 Pe te servì, mme venno mo na vigna:
 Vuo' abburlà? me sbaratto nzì a lo maglio.
 Dì, gioja mia, commaname a bbacchetta:
 Non dico nò, si mbè vuo', che t'annetta.

IV.

Fata mia bella, io sempe ll'aggio ditto,
 Ca jere la Reggina de le ffemmene:
 Mme vuo' sconfonne? Parla zitto zitto,
 Simmo nfra nuie, leva mo ssi tremmene.
 Io t'aggio da sevrìre; e cchesto schitto?
 Chiammame quanno ccà fanno le ssemmene,
 Ca, nquatto botte te caccio no muojo:
 Vao puro pe llotamma a lo precujo.

Ma

V.

Ma, pe pparlarte propio nconfedenza,
Aggio abbesuogno de no centenaro,
E ffuorze cchiù de Scigne. E che schefienza
Mme vaie decenno? Nne vuo' no megliaro?
De Scigne venì pozza la scaienza.
Vide pe lloco, tè l nce nn'è no maro.
Pegliatenne porzì no melejone,
Ca mme lieve na gran soggezzione.

VL

Oh che ssia benedetta! sso pparlare
Schitto mme sazia. Va cerca mpiacere
A ccarch' un' auto, porzì lo ccacare;
Ca te lo nnega, e tte lo ffa a bbedere.
Va, figlia bella, che ppuozz' aonnare,
E sso regno se pozza mantenere
Pe nzì a la scolatura de lo Munno,
E ssi pirchie, che ppozzan'ì a zeffunno.

VII.

Ma siente: s' ha da fare no Castiello,
E cciert' aute arresidie pe la Terra
De lo Rrè de li ciucce; e ppe st' appiello
M' abbesognano chelle, che la terra
Sanno cernere, e ppo co lo zappiello.
Fanno la cauce. E lo guaie, che t' afferra:
Chè non te piglie nzì a le llatrenare?
Spacca, e ppesa, e ffa chello, che te pare.
Quan-

VIII.

Quanno vuoie, che le mmano? Nò, pe oggi
 Veneno cca li ciucce, e sse le ppigliano.
 Sa, ch'aie da fa? Besogna, che l'alluogge
 Na sera, o doie, pe nzì cche rrepigliano
 No po de sciato pe fflore a sse llogge:
 Ca li scure, pe ccorre, s' assottigliano,
 Comm'a no spao: e ppo puoie carrecarele
 Ncopp'a lloro medeseme, e mmannarele.

IX.

N'accorr' auto. Vattenne alleramente,
 Vavone bello, ch'è ppenziero mio
 De farele restà tutte contiente.
 Figlia, tu mm'aie levato sto golio;
 Ed io non te sarraggio scanoscente:
 Cercame nìzò cche bbuoie, ca cca stongh'io.
 Io no mmoglio auto, ché mme state buono.
 Schiavo. Puoze stà sempe comm'a ttruono.

X.

Partutose lo viecchio, fa chiammare
 Chiarchiolla le bbajasse, e ffa allestire
 Na quantetà de fieno. Po annettare
 Fa no gran cammarone, che sservire
 Pe ccellaro potea; nce fa jettare
 Trenta rite de paglia, pe ddormire:
 Essa proprio jea attuorno, e stea a bbedere,
 Sempe decenno; Avimmo forastiere.

Già

XI.

Già lo Sole, correnno, er' arrevato
 A la taverna de miezocammino;
 E pparea, che se fosse llà ffremmato;
 P'arrefrescarse, e ppe pprovà lo vino:
 Ll'ombra, che mmo da nante, e mmo de lato
 Come a ll'ommo vecino vecino,
 Pe non sentu lo caudo, era sparuta,
 E ssott'a isso s'era anhasconnuta:

XII.

Quanno li ciucce ascieno da la grotta;
 Pe ddo aveano volato, stretta stretta;
 E, nch'ascieno, facettero na bbotta,
 Comme quanno se spara na scoppetta:
 La palla, che stà dintò, quanno sbotta,
 Fa no fracasso, e bbà pe la staffetta,
 Pecchè primmo d'ascire a ffa sto volo,
 Era corza pe ddint'a lo cannuolo.

XIII.

Ascieno á na campagna rasa rasa,
 Ma llo ro no la veddero: ca nchiuse
 Teneano ll'uocchie, che nc'era rommasa
 La pezza ancora. Ma, nche ffuieno schiuse,
 A na frotta de scigne, che stea spasa
 Pe llà mmiezo, restaieno cchiù cconfuse:
 Pocca sentieno fa no gran remmore:
 Chi so cchiste, che sso sciute ccà fiore?

Sore

XIV.

Sore mia, e che ppiezze de mammune?
 Chiammammo aggente, pe bbedè ch'è cchesso?
 Venite ccà: portate li cannune:
 Corrite: non sapimmo ch'è ssocciesso:
 Priesto priesto, cevate li focune,
 Ca già vonno scappà: jammole appriesso
 Portate spate, scoppette, ~~ro-^{ste}~~,
 Spontune, zappe, pertecche, e ccortelle.

XV.

Tanto fuie sso fracasso, e sso remmore,
 Ch'arrevatte pe nzi ddinto a la Terra:
 Ccà cchiù ccrescìe, tanto che ghìe nzentore
 A la Reggina; e nzentì ch'a la sfera
 Deano tutte de mano, p'ascì fore,
 Zompa essa ncoppa, trase dinto, afferra
 No bastonciello, ch'era d'oro fauzo,
 E ppo se jetta abbascio co no sbauzo.

XVI.

Non correno, ma volano, e, scorrenno,
 Esceno fora pe cchelle ccampagne;
 Vanno pe ccà, e ppe llà, sempe vattenno,
 Pe ttrovà ssi mammune, le ccarcagne.
 Arrivano addò stevano; e, bbedenno,
 La ccanoscìe Chiarchiolla: Eilà, ccompagne,
 Eilà, non sia nesciunà, che le ttocca,
 Ca le faccio ascì ll'arma mo ccà mmocca.
 Com-

XVII.

Comme, mmedè li cane, ch'abbajanno
 Correno ncuollo a uno dint'a ll'uorto,
 Vola lo parzonaro, e bba sbroffanno;
 Si nc'ascia lo compare miezo muorto:
 Passe ccà? passe llà? le bba scostanno,
 E ppo se scusa, ch'avea visto stuorto;
 Accossì, pe ssarvarle da sti guaje,
 Facette la Reggina, e ssecotaje:

XVIII.

Scioglite chelle ppezze, c'hannó nfronte:
 Accossì bboglio. Nzenti: Accossì bboglio;
 Jettaieno ll'arme, e cco le mmano agghionte
 Steano tutte a bbedè, ch'era sto mbruoglio,
 Certe po fanno a ppunia a rchi le sponte
 Ll'uocchie; ma chille aveano fatto ll'uoglio,
 Tanto ch'a mmala ppena sè rejevano,
 E ggjà ghiacovo jacovo facevano.

XIX.

Ma, nche le ppezze le fuieno sciogliute,
 Nche rrapettero ll'uocchie, e le bbedettero,
 Cadïeno nterra tutte addebbolute:
 Acqua, acqua. Pegliat'acqua. Acqua. Correttero
 Llà bbecino a no fuosso; e ppo venute,
 Da la capo a la coda le nfonnettero;
 A ll'autè sì, ma nò a lo ciucciariello,
 Che non fice auto, che no resariello.

Re-

XX.

Revenute , Chiarchiolla le facette
 Na manejata de ciceremuolle :
 Po , pe non darle nfado se nne jette ?
 Restaieno ll'aote , e cchi co le mmanzolle
 Le fa no carezziello , chi le mette
 Na pollecara ncanna , chi a li cuolle
 S'appenne , e lebbaveja ; e cchi se nzecca,
 Pe llevarle da reto carche zecca .

XXI.

Ma tutte quante stevano stordute
 A bbedè chelle ccude , che pportavano ,
 Tanto che te l'aveano nzallanute :
 Le ttocavano , e ppo le rretocavano ,
 E nno ntanto ll'avevano scompute
 De toccà , che dda capo accommenzavano ;
 Ch'uno , ch'era geluso no morzillo ,
 Stie mpizzo d'azzeccarle no caucillo .

XXII.

Po ll'una a ll'auta jevase mmeranno ,
 E non se vedea coda da dereto ;
 Pe cchesto , cammenanno cammenanno ,
 Pe non se fa a bbedere maie da reto ,
 Nnanze a llorò se jeano quartejanno ,
 E cquase sempe co no passo arreto :
 Gran vetoperio , mmiezo a ttanta cude ,
 De comparere accossì nnude , e ccrude !

Co

XXIII.

Co ssi carizze, e cco ssi frusciamente
 Arrevattero dinto a la Cetate.
 Oh che ccosa de spanto ! Traspariente
 Pareano de crestallo nzi a le strate;
 Le ccase, e li palazze straluciente
 Pareano tutte d'oro ntonacate :
 Ma va nce trase ? Tutt'era llà finto;
 E non nc' er' auto, che no muro tinto.

XXIV.

Fente erano le llogge, e li bbarcune;
 Fente le bbetrejate, e le pportelle;
 Finte li titte, co li torriune;
 Finte li potecuozze, e le ccastelle,
 Li soppigne, li trave, li portune,
 Li mierole, le ttenne, le ccancelle:
 Tutto quanto era finto; e, mmeretate,
 Parea na scigna de na gran Cetate.

XXV.

Chesto no lo ffaceano, pecchè lloro
 Fa non poteano ssa manefattura;
 Pocc'aveano, pe ffare sso lavoro,
 Le mmano, comm'agn' autà criatura:
 Ma sulo, pe no genio, e n' antecoro,
 C'hanno tutte le scigne pe nnatura,
 De ire sempe appriesso a l'apparenzia,
 E nnon fa cose maie de sossestenzia.

Sulo

XXVI.

Sulo na casa nc' era , ed era chella ,
 Addò steva abbetanno la Reggina :
 Chesta teneva na gradejatella ,
 Co na sala , na cammara , e ccocina ;
 Abbascio nc' era quarche ccammarella ,
 Co ccerte llogge , e ssotta na cantina ,
 Ch' era chella , ch' aveano apparecchiata
 Pe li ciucce , e stea tutta affommecata .

XXVII.

Llà ddinto le ttrasettero , addò steva
 Apparecchiata rrobba da magnare :
 Le dissero , si nc' era chi voleva
 Smorzà no poco , llà se potea stare ;
 E ssi carchedui' auto se senteva
 Stracquo , llà ppuro se potea corcare ;
 Ca nc' era paglia , pe mmagnà , e ddormire ,
 E lloro erano llà , pe le sservire .

XXVIII.

Che sservi ? Jatevenne , ca nuie stammo
 Meglio ccà , nfra de nuie , sule sulille ,
 Jatevenne ; ca mo nc' arrecettammo ,
 Ca pe ddirela , stammo stracquolille .
 Comme volite , nuie mo nce ne jammo .
 Ve restammo obbreccate , a mmille a mmille .
 E , rrestate llà ssule , se magnajeno
 Meza la paglia , e ppo se nce corcajeno .
 Men-

XXIX.

Mente steano dormenno, la Reggina
Chiamma tutte le Scigne, e le cconziglia :
Figlie, chillo a sto Munno l'annevina,
Che ffa le ccose senza parapiglia ;
E cchi vace cchiù adaso, cchiù ccamina:
Mperzò se sole dice, ca la figlia
Fa cecata la gatta pe la pressà,
E ppo nc' ha da stentare la mastressa .

XXX.

Pe cchesto mo, no mmoglio dare aodienza
A cchisse forastiese chesta sera ,
Dimano sì . Pe ttanto s'accommenza
Agnuna de vuje aute de maniera
A bbestì, che nce sia na comparenza
Co na gala de spanfio , ch'aggia cera
De chella , ch'anne arreto se facette ,
Che te fice restà chi la vedette .

XXXI.

Ntratanto ssi conziglie se facevano ,
Li ciucciariille se jieno scetano :
Le ntesero le Scigne , che le stevano
Servenno , e ppe llà fflore passejauno ,
Trasièno dintò ; e , mmente se sosevano ,
Diss' una : Volimm'ire cammenanno ?
Si volite vedè la Gallaria ,
Saglimmo ncoppa , e ve faccio la via .

Sa-

XXXII.

Saglieno ncoppa , e mmiezo a lo cortiglio
 Trovaieno quatto , o cinco cammarelle ;
 Traseno. C' ha che ffare lo Cerriglio
 Co tutte li vrasiere , e le ttielle ;
 Agnuno te pare a cchiù de no miglio ,
 Co tranta lontananze , e lloggetelle :
 Ma n' erano lo vero ; erano pente
 A pprospettiva , e ppuro erano fente .

XXXIII.

La primma era de statole de stucco ,
 A colore de marmora lucente :
 Nfacce nce stea no viecchio , che lo mucco
 Le scennea da lo naso nzì a li diente :
 E mmano se tenea no stojavucco ;
 Crcò , pe s' annetare ; e straluciente
 Aveva ll' uocchie , co na lacremella ,
 E tteneva na facce affrettolella .

XXXIV.

Chisto fegnea ciert' uommene mmarditte ,
 Che dde tutte li vizie so mpastate ;
 Ma co ssa facce , e cco cchiss uocchie affritte ,
 Fanno la scigna a ll' uommene norate :
 Deceano , ch' era Senneca ; e ppo scritte
 Nc' erano certe llettere nnaurate :
*N' abbesogna maie credere a le bbuce ,
 Ca n' è tutt' oro nò chello , che llucc.*

Ap-

XXXV.

Appriesso a cchisto nc'era na fegura
 D'uno, che pparea n'Ercole vestuto,
 Ch' a pprimma vista te mettea a ppaura:
 Tenea na capo de puorco zannuto
 Ncopp'a la capo soia, co n'armatura
 Mmano, ch'era no spruoccolo appontuto,
 E mponta nc'era na saglioccolella
 Tutta chiena de punte de centrella.

XXXVI.

Era Alisanthro, che ppe la prejezza
 Era juto mpazzia lo poveriello:
 Facea la scigna a cchillo pe ggrannezza;
 E sse chiammava ll'Ercole noviello.
 Sott'a cchist'auto, chino de monnezza
 Se leggea, co ggra stiento, sto cartiello:
Pe ste mmalenconie nce vo chell'uorgio,
Che stà a la Speziaria de Masto Giorgio.

XXXVII.

De sse Statoe nce nn'era na provista
 Dint' a sta cammarella, che le ghiettero
 Vedenno a una a una; e ppo, che bbista
 Ll'appero tutta quanta, se nn'ascettero.
 Asciute da llà ddinto, a ffa na vista
 A la seconna cammara trasettero.
 Chesta erà tutta chiena de scanzie,
 Chi co pportelle, e cchi co gelosie.

XXXVIII.

Nn'aprieno una, che stev' a mmano manca,
 E nce veddero tanta carrafelle,
 Tutte chiene de n'acqua janca janca:
 A n'ato pizzo po cert' arvarelle
 Co ccierto russo dinto; e ppo na vranca
 De certe, che pparevano moschelle.
 Disse no ciuccio: Che ssongo ste ccose?
 Una, pe ffa la Scigna, le respose.

XXXIX.

So tutte bobbe, e sserveno pe ocerte,
 Che tteneno le ffacce nere, e bbrutte;
 Vierde, comm'aglio, e ppareno lacerte:
 Cheste, pe pparè belle, se so strutte
 A sceregà la facce, e li lacierte
 Co st'acqua janca; e sse so ttente tutte
 Le mmasche, nzi a le labbra co sto russo,
 E pportano sse mmosche nzi a lo musso.

XL.

Dinto a' n' autà nce steano li modielle
 De li mantò, de scufie, e ssacristane:
 E chiste, disse, serveno pe chelle,
 Che bbonno fa la scigna a le ccampane,
 E, cco ste ccude, nzi a li ciucciarielle:
 Ma chesto è ppoco: pe nzi a li tiane
 La vonno fare, e bbanno peste peste
 Portanno ncapo coperchiole, e ttieste.

Po-

XII.

Popate a mmucchio, co li Pellegrine,
 (Co li Cappucce, e cco li Priggioniere :)
 Certe co l' Antriè, e li Perocchine,
 Che ppareano ceriffe de galere:
 Chi co li Schiavottielle, e Palladine,
 Co le mmanizze de tutte manere.
 Smorfie, che se veden' accacciare
 Pe ffa la scigna, e ghiettà li denare.

XLII.

De cheste, e aote ccose, che servavano
 Pe le fsemene, mille nne vedettero;
 E mmente tutte quante le bbedevano,
 Cchiù de na resatella se facettero;
 E ppo a la terza cammara, addò stevano
 Le ppetture, e li quatre se nne jettero,
 Che nn'era chiena, e aveano le ccornice
 Fatte, comm'oro, ma co la vernice.

XLIII.

Apprimmo apprimmo nc'era no quatrone,
 Chè nce steva là storia de chill'auto,
 Che bboze fa la seigna, e mparagone
 D' Apollo, se mette a ssonà lo frauto;
 Ma male le rescle la mmenzione:
 Pocca chillo, che nn'era lo masauto,
 Passaielo a ppiede chiuppe co no trillo,
 E ppo lo scortecaie, comm'a ggattillo.

XLIV.

Se vedeva Marzullo poveriello ,
 (Ch' accossì se chiammaie sto sonatore)
 Attaccato depietto a n' arvosciello ;
 E Febbo ncuollo , comm'a tradetore ,
 Levanno te le jea co lo cortiello ,
 Sott'a la pella , chillo mal'ammore :
 Isso tenea na facce , che ppareva ,
 Che non potea fa cacca , e sse spremmeva.

XLV.

Accanto a isso stevano chiagnenno
 De Satore , e dde Sninfie na marmaglia :
 Steano tutte sorriessete vedenno
 Chillo cortiello co cche arraggia taglia ;
 E ssotta , comme jevano scorrenno
 Le llagreme de chella gran canaglia ,
 Nascea no sciummo , che pe cchilli guaje
 Marzia da Marzullo se chiammaje.

XLVI.

A n'auto quatro nc'era lo retratto
 De Sarmoneo , che ttutte avea squagliato
 Le cconcole de Grecia , e nn'avea fatto
 No ponte , pe ddo isso strascenato
 A rrompecuollo int'a no tir'a cquatto ,
 Facea la scigna a Giove lo sciaurato :
 E cco sso cciampejà , co ccerte bampe
 Se jea spassanno a mmenà truone , e llampe.
 Lo

XLVII.

Lo bbedea Giove, e le decea: Che ffaje?
 Vi che ffreoma! t' aspetto quanto pozzo.
 A ca mo, a ca po, ca oie, ca craje,
 Ca pescraie, ca pescrigno, ca pescruozzo
 Mette jodizio. A ll' utemo sferraje,
 Vedenno, ca nc' avea fatto lo cuozzo;
 E cco na botta de frùolo pazzo
 Peglià le fice chillo gra mmallazzo.

XLVIII.

Mente tutta la mmiorra stea ncantata
 A bbedè chesto, no ciuccio, che steva
 Poco descuosto, auza no strillo: Uh tata,
 Tata mio, tata mio, che nne voleva
 Fa de venì a bbedere sta frettata?
 Uh quanto facea meglio, e mme nn' asceva.
 Corzero tutte quante a lo strellare:
 Ched' è sso chianto? Ch' è sso ppeccejare?

XLIX.

E cche bbo esse? Ecco ccà tata mio
 Chisso, che stà a sso quatro, chiss' è isso.
 Gioja, da dò te venne sto golio?
 Che nne volive fare? Uh, tè, marisso,
 Che le fanno! Ched' è? Uh, lo ssacc' io,
 Ch' era fegliulo, quanno fuie ss' aggrisso.
 Ndì chesto, ll' auti ciucce se mettertero
 A cchiagne, ca porzì lo canoscettero.

L.

Era chessa la storia de lo ciuccio,
 Che bboze fa la scigna na jornata
 A lo lione; e, ppe ffa lo galluccio,
 Non ssaccio comme, s'aveva abboscata
 Na pella de lione, e no cappuccio
 Se nn'avea fatto; e ppo jea pe la strata
 Nnanze a li lupe co na posetura,
 Credennose de metterle a ppaura.

LI.

Chille apprimmo, vedennolo, scappajeno;
 Credennolo da vero no lione:
 Ma nche a la voce po se nn'addonajeno;
 Ch'era no ciuccio, e cch'era fenzione,
 Se le ncanaieno ncuollo, lo sbranajeno,
 E nne fecero justo no voccone:
 Le levaieno accossi la vezzarria,
 Ca no nce nne restaie manco na cria.

LII.

Mmedè chesto; restaieno de manera
 Destorbate li ciucce, che n'avevano
 Cchiù bboglia de vedè ll'auto, che nc'era.
 L'allummaieno le scigne, ca nce stevano
 De mala chella, ottra ca pò era sera,
 E ll'ombre da li munte già ccadevano:
 Potite reterarve a la cantina,
 Dissero, a rrevederce crammatina.
Scompetura de l'Arragliata IX.

DE LA
CIUCCEIDE
ARRAGLIATA X.



ARGOMENTO.

*A ghiuorno hanno li ciucee la chiammata,
Ca la Reggina le bbolea sentire:
La trovano, che steva apparecchiata
De na manera, ch'era da stordire.
Lo Ciucciariello le fa l'ammasciata;
E dapò li remmure, che a' ssortire.
Nc'apperò pe li ciucee, che nce jettero,
Contiente da l'aodienza se nn'ascettero.*

I.

SE nn'era Mastro Febbo già ttornato
Da l'Antripete, e lluoche commecine,
Che ll'avea lo carruocciolo affittato,
Pe ffa la Festa de li Battagline.
Le zzoccole, ch'aveano pazziato
Mmiezò a la chiazza, abbascio a le ccantine
S'erano ncaforchiate; e dda pe tutto
S'era già lo zoffritto mjezo strutto.

II.

Quanno li ciucce, ch'erano scetate,
 Sentieno ncoppa fa no gra rremmore;
 Po lo sentieno pe le ggradejate,
 E all' utemo na Scigna, che dda fore
 Le decea: site tutte apparecchiate,
 Ca già è bbenuto ccà lo Mmasciatore?
 Simmo leste, resposero, trasite,
 Stammo tutte a l'allerta, che bbolite?

III.

E bbecote trasì na manejata
 De scignuotte vestute da Volante;
 Ch'a no Scignone faceano la strata;
 Che te pareo no Caaliero arrante.
 Largo. Facite largo. Da l'antrata,
 Segnure mieie. Levateve da nante.
 Reterateve tutte a no pontone,
 Si nò, non se pò fa la fonzione.

IV.

Scompute sti fracasse, trasìe dinto
 Lo Scignone vestuto a la besbeteca;
 Bello, che te pareo no cuccopinto;
 Ma pareo, che ppatea no pò d'arteteca:
 Parev'uno, c'ha bbinto, e cche n'ha bbinto;
 E bba parlanno sulo, e ssempe leteca
 Nfra isso, e isso; e bba quase mpazzia,
 Che ffa crepà le ggente pe la via.

V.

Jettato ncuollo' aveà no cappottiello,
 Ch'era na straccia de setiglia sfatta:
 Ncapo tenea carcato no cappiello,
 Ch'era na cosa longa, tonna, e cchiatta;
 A ll'uso propio de no cantariello:
 Da ll'una, e ll'aota banna nce stea fatta
 Na scelletella, ch'aveano sceppata
 Da na povera Cola sfortonata.

VI.

E n'ato paro, puro comm'a cchelle,
 Nn'avea a li piede: mmano, nzanetate,
 Tenea na mazzarella de nocelle,
 Co ddoie scorze de sierpe ntorcegliate.
 Deceano, ch'era chillo, che le zelle
 Sape de Giove; e pporta le mmasciate,
 Chillo, ch'addò nc'è bbuglia, e cosa pco,
 Fa strunzo mmiezo co lo Cadoceo.

VII.

Arrevato che fluie, se mette nchianta;
 Rape la vocca, e ghietta ste baviglie:
 O de ll'auta, asenesca, orreda schianta
 Belle, anemuse, allevrecate sguiglie!
 Schianta, che ppe ssi sguiglie ogge se vanta,
 Sguiglie de ssa gra schianta ammate figlie.
 Schianta, e sguiglie, che ssimmele a lo Munno
 Sguiglie, e schianta no ll'asce, e bbota a tunno.

VIII.

Giove, che de le nuvole pecciose
 Corcato stà ncopp' a li matarazze,
 E ll' aote Addeità, che ccorejose
 Stanno aspettanno, e ffanmo comm'a ppazze,
 Ve chiammano. Corrite: e le mmancose
 Tate a bbasà, ca no ve danno mazze.
 Venite su, venite a la ncorrenno:
 Giove aspetta, io so ccà, e bbe stò sservenno.

IX.

Che cchiove, e schiove? Chisso stà mpazzuto.
 Nuie volimmo parlare a la Reggina,
 Disse no ciuccio, sso Giove addò è sciuto?
 No mporta, Segnorè: Uscia cammina,
 (Sferra na Scigna, che ll' avea sentuto)
 Ca po vide si chisto nc' annevina.
 Bene, dissero ll' aute: già ch' è cchesso,
 Cammenate, ca nuie venimmo appriesso.

X.

Chiano. All' ordene, spara la Majesta
 De zeremonie, e ll' ordene sia chisto:
 Jarrà, comm' è bhenuta, primmo chesta
 Barbuglia de lacchè, po pisto pisto
 Secotarrà Mercurio, e ffarrà ttesta
 A bbuje aute: nfra vuie, comm' aggio visto
 Prattecà, creò, che ddarrà sempe luoco
 A chi ha chiù anne, uno, che nn' ha chiù ppoco.

De

XI.

De lo riesto, si nc' è carcat' aosanza
 A lo pajese vuosto, ve potite
 Arregolà, comm'è la costumanza.
 Facite tutto chello, che bolite,
 Resposero li ciucce, ca crejanza.
 Non s'ausa nfra nuie, comme sapite:
 Jammo a la bbona, e nno nc'è nnanze, o arreto,
 Ca vò agnuno de nuie campà cojeto.

XII.

Già ch'è cchesso, abbejateve, fegliule,
 Ascite fore, e ppo jate a bbotare.
 Li ciucce jeano mo, comm'a ccetrule,
 Nnanze, e arreto: mo jeano pare pare,
 Mo a ttre, mo a cquatto, e cquanno sule sule;
 Ma qua bbota, che ghieano pe ppassare
 Nnanze a lo Mmasciatore, le correva
 Ncuollo la Masta, e tte le ttratteneva.

XIII.

Co sso ghi nnanze, e cco ss'artetechella,
 Ch'avevano li ciucce cammenanno,
 Tant'uno s'avanzaie, senza che cchella
 Se nne fosse addonata, ch'azzeccanno
 Se jie a Mercurio; e l'afferraie na scella
 Co na ponta de pede, pezzecanno;
 Ma pecchè ffuie no pizzeco de ciucciò,
 Le fice fa lo casecayalluccio.

XIV.

Piglia la scella, e ppecchè non fuie lesto ?
 A aizà lo pede, ment'isso l'afferra,
 Chillo va a ccammenà: mpona: chè cchesto?
 Tira, non vene, e bbà de musso nterra:
 A lo tterà, se nue vene lo riesto
 De la scella: vo aizarese, e le sferra
 Lo cadoceo: torna a ccadè, e sse sparte
 La mazzarella, e sse nne fa di parte.)

XV.

Va pe ssosirse la seconna vota,
 E ttorna a ccadè nterra; e mmente piglia
 Sto tierzo nciampecone, se revota
 Lo cadoceo, e straccia la setiglia.
 Stracciata la setiglia, chillo sbota,
 Piglia lo cantariello, e sse lo sciglia:
 Po se nne va ammassato a no pontone:
 Facitevella vuie la fonzione.

XVI.

Lo ciuccio de Selleno, che mbrogliata
 Vede la cosa, pe nc' arreparare,
 Se vota, e ffa na gra nfrocechejata
 A lo ciuccio; po corre, p'accoietare
 Mercurio: Aie ntiso? nce ll'aggio cantata
 A cchella bestia. Tu mo che bbuo' fare?
 Véniga da chi la tene la prodenzia,
 Che te ll'aie da peglià co no schefienza?)

Si

XVII.

Si è schefienza, che bbaa a ccontrattare
 Co ll'autè schefenzuse pare suoje,
 E llassa fa chello, che s' ha da fare.
 Dice buono. Aie raggione: ma che bbuoje
 Fa? Abbesogna quà bbota sopportare.
 Priesto mo, ca n'è nniente: vi si puoje
 Acconcià sse bagaglie? Io non saccio
 Che bbuo' acconcià, si no nce nn'è ppetaccio?

XVIII.

Via su, pigliate tutte sse coselle,
 E ghiammonce accossine, ca n'è nniente.
 Chillo, che steva co le cchiancarelle
 Sbotate, corre, e straccia co li diente:
 Nforejato lo riesto de le scelle,
 Se piglia tutte ll'autè ngrediente,
 Co la setiglia, nne fa no mmattuoglio,
 Vota vico, e le llassa int'a sso mbruoglio.

XIX.

Che ffacimmo? (li ciucce sbentorate,
 Nche se veddero senz' ammasciatore,
 Restà mmiezo a la via fridde, e ghielate)
 Saglimmo ncoppa, e aspettammo llà fiore.
 Tornano arreto, e ppe le ggradejate
 Mente jeano saglienno, lo remmore
 Se ntese dinto, addò stea la Reggina,
 Pocca la gradejata era vecina.

Chi

XX.

Chi so vchisse, che ssaglieno? se vóta
 A no paggio, che steva a lo portiero.
 Chillo corre: Signora, a cchesta vota
 Già veneno li ciucce. Via, portiero,
 Stà ncellevriello. E ncignaie na revota
 Dint'a la sala: agnuna stea mpenziero
 A ffa la parte soja, agnuna tocca
 A mmettere a lo pizzo, che l'autocca.

XXI.

Arrevate li ciucce: Quanno venè
 Lo Mmasciatore? le disse no paggio.
 Ll'è afferrata na cosa, e mmo revene.
 Respose l'Aseniello. Mo jarraggio
 A dirlo dinto. Corre, e ttrase: Bene,
 Repreca la Reggina: pe bejaggio
 Schitto servea; già chisse so bbenute,
 Ch'entrano. Tutte attiento, zitto, e mmute.

XXII.

Segnure mieje, facite faore,
 Esce lo paggio: tterre a lo portiero.
 Traseno, auzano ll' uocchie. O che stopore!
 Agne cciuccio restare, comm'a ssommiero:
 Non sapeano, che ffare, e dd'asci fore
 Già quase quase stevano mpenziero:
 Ched'è? se n'addonaie lo Ciucciariello:
 Stateve sode, state ncellevriello.

Stea-

XXIII.

Steano llà ddinto, comm' a ccanneliere,
 Da ccà, e dda llà, a l' allerta trenta scigne,
 Tutte co li trobbante, e ppennacchiere;
 Armate, chi de tareche de ligne,
 Chi d' arche, e spate, e cchi co li lampiere
 De ntorce a biento, e sciaccole de pigne:
 A le mmura nce stea n' aparamiento,
 Che na scumma pareva d' oro, e dd' argiento;

XXIV.

Ma chi se nc' azzeccava cchiù becino,
 Ch' era oropella subbeto vedeva.
 Lo lavoro era bello, e stea chino
 Tutto de frunne, e sciure: Po nce steva,
 P' ogne fferza, no quatto: e no pottino
 Avea da sotta, che lo manteneva:
 Dinto nce steano certe storielle,
 Comm' a cchell' aote de le ccammarelle.

XXV.

Nfacce a no muro stea no tiatriello,
 Fatto a lo muodo de na gradejata:
 Traseva uninto, e cco no cantonciello
 Ascea da ccà, e da llà, che, speccecata
 Pareva, senza votà lo cellevriello,
 Na fella de mellone rosecata:
 Lo primmo grado steva auto da terra
 No panno, e miniezo, o poco creco, che sferra.
 Ncop-

XXVI.

Ncopp' a la gradejata se contavano
 Dudece casarelle, e ttutte stevano
 Chiene, fore che una, e l'accopavano
 Unnece scigne. Cheste comparevano
 Vestute a ll'uso, comme se pittavano
 Ll'unnece Addeità, ch'esse fegnevano;
 L'Addeità cchiù ggrosse, e nce mancava
 Mercurio, che no nse nce trovava.

XXVII.

Chella, ch'era la primma a mmano manca;
 Facea la Dea Cerere, e ammantata
 Co na cammisa stea de tela janca:
 Duie sierpe la teravano assettata
 Ncopp' a no carro: mmano avea na vranca
 De papagne: la capo era ntrezzata
 Co na corona, ch'era tutta chiena
 De spiche jonne jonne d'uorgio, e bbenà.

XXVIII.

La primma a mmano ritta era Dejana,
 Che ffacea tre ccomparze defferiente:
 Co na paghietta ncàpo, e cco na cana;
 Fegnea jì a ccaccia: co li duie serpiente,
 Che ttenea mmano, avea na mmerejana
 De Furia: e, cco no specchio trasparente,
 Facea la Luna; e stea ncopp' a no carro,
 Terata da doie vacche, si no sgarro.

A lo

XXIX.

A lo gradino appriesso nc'era Apollo,
Co lo carruocciolillo, e li cavalle:
Le penneva la cetola a armacuollo,
E nfacce avea li ragge d' oro gialle.
Da ll' aota banna, co na lanza ncuollo
Stea Marte, co le ccosce, pietto, e spalle
Tutto ngiaccato: mmano avea la spata,
E a lo scuto na Furia stea pittata.

XXX.

A ll'auto nc'era Vennera, e Borcano:
Chella terata da li palommielle;
Chisto da tre Cecrope, e aveano mmano
Lo mantece, l'ancunia, e li martielle.
Ncoppa stea Palla co n' Ascio, e no Cano
Ncapo d'auliva avea li rammoscielle:
Mmiez' a lo piett' a bbotta, che pportava,
La coccia de Medusa serpejava.

XXXI.

Nc'era Nettuno co la cincorenza,
Chino de pisce, e dd'aleche de maro:
Cchiù nn'auto steano senza precedenza
Gionone, e Besta, bello, paro paro:
Tutte doie co lo sceltro, e ttutte senza
Armatura. Avea chella no panaro
De granata, chest'ha li torriune,
Da payune terate, e dda liune.

Ncop-

XXXII.

Ncopp'a ste ddoie, cchiù nn'auto, e ncopp'a tutte,
 Che bbenea a esse a lo sesto gradino,
 Nc'era Chiarchiolla, che nn'aveva strutte
 Arvarelle de cuoncio lo cchiù ffino,
 Pe ffa ssa mosta! Quanto te l'aggliutte
 Sta vota. Stea sott' a no bardacchino
 Lavorato da penne de pavone,
 E n'Aquela stea sotto a no pontone.

XXXIII.

Jea co na veste janca, e tutta stelle,
 No varvone apposticcio, e na quaquiglia,
 Co na corona fatt' a ppezzielle,
 Che, ccomm'a na cepolla, quanno sguiglia,
 D'oro brattino avea li raggetielle:
 Teneva mmano po na carrettiglia,
 Co no truono mpizzato, e dda duie mazze
 De tricchetracche, e dde frùole pazze.

XXXIV.

Chest'era la comparza, che stordute
 Ficé restà li ciucce, nche ttrasieno.
 Trasute dinto, no ntanto scompute
 Fuieno ll'allevrenzie, che ffacieno,
 Che rrestaieno de nuovo nzallanute:
 Pocca li Deje, nche llozo scompieno,
 S'accommenzaieno tutte a ffreccecare,
 Che ffuie na cosa da strasecolare.

Aje

XXXV.

Aje visto no presebbio, che se fricceca,
 E tutto nziemo le vene l'arteteca?
 Chi cade, chi se sose, chi se mpicceca,
 Chi nfora, chi arresedia, chi leteca,
 Chi na matassa de filo te spicceca,
 Chi fa caso recotta a la besbeteca:
 Esce a lo rreto no cacciatoriello,
 Sisca, va, vede, spara, e ffa l'auciello.

XXXVI.

Accossì a ffreccècà s'accommenzavano
 Chelle, che ncopp' a lo tiatro stevano:
 Li cavallucce d'Apollo zompavano,
 Li liune de Vesta se sosevano,
 De Cerere li sierpe cotelavano,
 Le bbacche de Dejana se movevano,
 Co li palumme Vennera, e Gionone,
 Se vidde scellejà co lo pavone.

XXXVII.

Mmiezò a sto ffreccecare se votaje
 Giove a na scigna, e le disse: Dà fuoco:
 E cchella, co no miccio, s'azzeccaje.
 Vecino a isso: sciòscia, e a ppoço a ppoço
 Li chille, ch'avea mmano, l'allommaje.
 Allommate che ffuieno, p'ogne lluoco
 Te vediste sguiglià, comm' a cconiglie,
 Frùole, tricchetracche, e ccarrettiglie;

E, a

XXXVIII.

E, a lo rreto, no truono, che na bbotta
 Fice, che lo solaro nne tremmaje.
 Nzenti chesto li ciucce cacasotta
 Scappano: Vi addò mine? Vi che ffaje?
 Vonno ful; se mmesteno; e cchi sotta
 Cade, e cchi ncoppa; e a cchelle l'afferraje
 Na risa, che dda mano le scappajeno
 Le rretene, e nno cchiù se frececcajeno,

XXXIX.

Lo Ciucciariello se vota: Ch'è stato?
 Già ve site cacate de paura?
 Chi de vuje è rrestato smafarato?
 Già site muorte, attà de la fortuna!
 No poco sode, ch' avite arrevato
 A ffa ride le ppriete de sse immura.
 Co ssa parlata agnuno s'accoietaje,
 E isso accossi a Giove se votaje;

XL.

Giove, che co ssi truone, e cco ssi lampe
 Le ccercole, e le ppigne allumme, e rrumpe.
 Nettuno, che ppe ll'acqua co le cciampe
 De ssi cavalle sempe curre, e zumpe.
 Vorcano, che ssi mantèce, e sse bbampe
 T'hanno nzeccuto, e ppuro no la scumpe.
 Febbo, e Dejana, che de notte, e ghiuorno
 Jate co ssi lampiere sempe attuorno.

Mar-

XLI.

Marte , che ssaie peglià lo Munno a fiamme,
 E nce puorte a le bbote summe summe .
 Cerere bella , che la Terra sbramme
 Co sse spiche de rano , e sse bberdumme .
 Vuie , che de lo ssapè site le mmamme ,
 De ll' Aria , de lo Ffuoco , e de li Sciumme,
 Pallade , Vesta , Vennera , e Gionone,
 E ffacite ssa bella fenzione :

XLII.

Vuie mm'avite :.... Ma , mente isso parlava,
 Restaie ntterutto da no gra rremmore .
 Se vota ; ascia no ciuccio , che mmagnava
 Na spica d'uorgio , e ghieva p'ascì fore :
 Cerere , che sbroffava , e ppeccejava ,
 E pparea , che ssentea no gran dolore ;
 E mmedè chesto , subbeto penzaje ,
 Ch' era stato qua cciuccio , e la ncarraje :

XLIII.

Pocca no ciuccio , che non capesceva
 Sso pparlà , che ppe isso er' a lo scuro ,
 Abbistaie chelle spiche , che tteneva
 Cerere ncapo : e ttirato lo scuro
 Da n'abbramma canina , che ssenteva ,
 Se nce jeze accostanno muro muro ;
 Po se lanza , e no muorzo le schiaffaje
 Ncapo , che nzi a li pile nne scippaje .

Corr'

XLIV.

Corr' isso, pe le fa na cauciata,
 No ntanto pecch' ha ffatto sso dammaggio,
 Quanto ca ll'avea rotta la parlata;
 E ssente, a n'ata via, strellà no paggio:
 Lassa stà lloco? Ah ccano, l'ha sceppata!
 E Dejana: Corrite? che ffarraggio,
 Scura me! ca mme tremmano le ggamme:
 Comme sbatte lo core! Chess'è ffamme!

XLV.

Lassa lo ciuccio, e sse vota de bbrecca;
 A bbedè, ch'è socciesso a ss'auta banna;
 Vede fùì, co na paglietta mmocca,
 N'ato ciuccio: le dà no muorzo ncanna:
 Jetta sta cosa? E lo guaie, che te stocca?
 Che bbuò jettà? Lassa, ca mo te scanna;
 Strellava n'auto. E Dejana: zeffonna,
 Dalle a sso ciuccio; vi ca mo la sfonna?

XLVI.

Chesso n'è nniente a cchello, c'hanno fatto,
 Giove mio, a Mercurio poveriello;
 (No volante sparaie: che guatto guatto
 Era trasuto, e stea a no pontonciello)
 Te ll'hanno spetacciato, e ll'hanno sfatto
 Lo vestito pe nfi a lo cantariello;
 E ssi non se fedava a lo tallone,
 Nce nn'avarriano date poche, e bbone.

XLVII.

Jostizia , Giove , jostizia , jostizia :
 Zompa dinto Mercurio , e lo repiglia :
 Ssi ciucce so mpastate de trestizia .
 No mbì la mazza ? E cchesta è la setiglia .
 Si tu mo non castiche ssa malizia ,
 Mercurio è ghiuto già , va te lo piglia ,
 Non potarraggio asci , ca nzì a na gatta
 Mm' abburlarrà : Ah si setiglia sfatta .

XLVIII.

A cchesto tutte quante ll'aute Deje ;
 Giove , dissero , penza , ch' aie da fare .
 Videne proprio mo chello , che nn' eje ;
 Chesta n'è ccosa cchiù da sopportare .
 E una , e una a doje , e una a treje :
 Ch' aspiette , che te vengano a ccacare
 Nzì lloco mmocca ? Si lo bbaie trovanono ,
 No nghiarra troppo a lluongò , e tte lo fanno .

XLIX.

Grazia , grazia . No cchiù a ssi poverielle ,
 Ca ll'avite pegliate a ccacagliutte .
 Ched'è a la fine ? Songo ciucciarielle ,
 Nè sso , comme decite , tanto brutte .
 Scommuovete , o gran Giove : a ppesciarielle
 Già fanno ll'uocchie , e ppigliano li bbutte :
 E ssi nò , fallo almeno a questi prieghi :
A tanto intercessor nulla si nieghi .

A ssa

L.

A ssa parlata, a Giove, e a ll' aute Ddie
 No riso a schiattariello le scappaje;
 E, cco sto riso, subbeto sparle
 Lo mal' ario, ch'agnuno s'appraccaje.
 Li ciucce, non sapenno da dò scie
 Ssa voce, e cchi era chillo, chè pparlaje;
 Se votavano attuorno, e nno mmedevano
 Nesciuno llà, e cchiù se confonnevano..

LI.

Tennero mente nterra, e ccammenare
 Vedieno na cosella nera nera.
 Era na scigna, che sservea, pe ffare
 Lo bboffone a Charchiolla; e dde manera
 Le deva gusto, che, nche fommecare
 Tantillo le vedea la cemmenera,
 Tanta ngiegne, e strammuottole faceva,
 Ch'a fforza, o a bbona voglia essa redeva.

LII.

Nc' avea pe' cchesto tanta confedenza,
 Che pe nzi a 'ngiuriarla l'arrevava,
 Tanto che sst' faceva qua mpertenenza
 A ccarche scigna, e cchella ll'accosava;
 Essa decea: Le darrò la scajenza;
 Ma po, vedenno a cchella, se cacava.
Va dà la mano no poco a ssa sciorta
De bboffune, ca vide addò te porta.

LIII.

Sta vota, pe ffa ride a ttutte quante,
 Apposticcio de carta s'avea fatto
 No vestiello, ch'era assaie galante,
 E pparea de no ciuccio no retratto.
 S'avea fatte doie recchie, nnante nnante;
 Puro de carta tenta; e mmo co n'atto
 Le ccalava, co n'auto mo ll'aizava,
 E a bbota a bbota te le storzellava.

LIV.

Da dereto na coda le penneva,
 Ch'era na cosa propio straformata;
 E cco no garbettiello la moveva,
 Che pparea na ciuccia speccecata:
 Da quanno nquanno la vocchella apreva,
 E ffaceva llà mmiezo n'arragliata:
 Po co dduie piede la vedive auzare,
 E accommenzav' a ridere, e abballare;

LV.

Sta cosa non feneva de piacere
 A li ciucce, ca ntesero lo ciasco;
 Tanto cchiù, che, pe ffarle despiacere;
 Essa le ghiea tentanno; e già lo masco
 Uno avea carrecato, e stea a bbedere.
 N'auto decea: Vattenne, ca te casco.
 No la vuoie fenì cchiù? Ma, nche ssenteva
 Chella sso lampo, a n'auto se nne jeva.

G

Men-

LVI.

Mente, ch' essa facea sse guattarelle,
E ss'erano li Deie già puoste ngusto,
Lo Ciucciariello co ddi parolelle,
Se sbrigate, ca pegliaie lo tiempo justo:
Cercaie tutte li maste, e li parrelle,
Pe ffa le mmura; e scomple justo justo,
Che le ggattè ncignavano a strellare,
Ca s'accostava ll'ora de magnare.

LVII.

La Reggina co mmuodo assaie cortese,
E ppè le cconzonanze le respose:
So già lleste, facitele le spese,
Ca lloro se farranno ll'autè ccose;
E, ffatta sta risposta, se nne scese.
Li ciucce le vasaieno le mmancose;
Po se nne jieno a ffa colazione,
E accossì se scomple sta fonzione.

Scompetura de l' Arragliata X.

DE LA
CIUCCEIDE
ARRAGLIATA XI.



ARGOMENTO.

*Tutte li ciucce co le scigne nuollo,
E cco zappe, co ccuosane, e ccoechiare
So ppe ll' aria portate a rrompecuollo
Dinto, a na nuvolccla, che ccompare.
Vanno a Gragnano, e pposano a lo mmuollo,
Nnanze a lo Rrè, che nn' appe a speretare.
Ncignano a ffravecane, e no lavore
Fanno, nfacce a na porta, de stopore.*

I.

MA la Reggina, che bolea sbrigare
De jostizia li ciucce chella sera,
Ch' avea vista a cchiù dd'una fommecare
Pe cchilli tratte già la cemmenera;
Fice subbeto subbeto jettare
No banno pe lo Stato a la nzorzera,
Ch' agnuna, che bolesse cagnà luoco,
A ppartì s' allestesse pe lo bruoco.

II.

Tanto cchiù che Dejana, pe ffuire
 Da Febbo, che ll'aveva ntommacata,
 Se vedeva de notte compariree,
 Ca de juorno non s'era assecorata;
 E ssi mbè meza se vedeva scire,
 Ca ll'ata meza stev' annegrecata,
 Puro faceva tanta lummenaria,
 Che se vedeva no ciuccio pe ll'aria :

III.

No ntanto sto gran banno fu ghiettato ;
 Che bediste le scigne a mmelejune
 Venì volanno da tutto lo Stato ;
 Chi stea co li pariente a ceostejune ;
 Chi s'avea le mmognole spetejato ,
 Chi teneva nzavuurio li patrune .
 Nzomma , chi pe na cosa, e cchi pe n'auta,
 Nzenti jettà lo banno , corre , e ssauta ,

IV.

E , zompanno zompanno , s'abbiavano
 A la casa rejale , addò correvano
 A mmorra,comm'a ppuorce;e ccammenavano
 Co n'allegrezza tale , che pparevano ,
 Ch' a ccorrere lo palio se nzajavano .
 Arrevate po llà , comme venevano
 Ll'aote , faceano no fracassatorio ,
 Peo de le ggatte int' a no refettorio .

Tan-

V.

Tanta fuieno li strille, e lo remmore;
 Che la Reggina se mese a ppaura:
 Jeà pe bbedè, ma no lo decea core
 De cacciare la capo da le mmura.
 Po se deze armo, e n'uocchio cacciaie fore
 Da na fenesta, e bedde scura scura
 Ll'aria, pe la gra nneglia, ch'era aizata
 Da la mmorra, che stea mmiezo a la strata.

VI.

Ma nche se n'addonaie de chello, ch'era;
 Co no riso sardonico: Corrite,
 Disse a ttutte, corrite, ca sta sera
 La sciorta vosta propio trovarrite.
 Jate, ch'avite asciata la manera
 De ve fa quanta doppie vorrite:
 Si ccà non site state canosciute,
 Llà ve canosciarranno sti sapute.

VII.

Sulo ve dico, e ttenitelo a mmente;
 Ca chi n'ha fatto bene nfra li suoje;
 Nfra ll'aote tanto peo nne farrà nniente.
 N'è ll'ario, o lo pajese, di che bbuoje,
 Che non te fa a ccanosce da la gente;
 So li defette, e sso li yizie tuoje.
 Cagna chisse, si vuoie cagnà fortuna;
 Si nò, cagna che buoie, ch'è na freddura;

VIII.

Jate mo, e ccovernateve. E cchiammato
 No paggio, le decette, ch'avesasse
 Li ciucce, ch'era tutto apparecchiato.
 Jette chillo, e ttrovaie, ch'a sti fracasse
 Stevano sorrejute; ma, passato
 Che ffluie lo tremmoliccio, nquatto passe
 Fuieno mmiezo a la chiazza, addove jettero
 Squatranno tutte chelle, che benettero.

IX.

Visto tutto, saglie lo Ciucciariello
 A ccercà la lecienzia a Chiarchiolla;
 Po disse: Si nce stà no sportoncicello,
 O carcuna ha na stola, me la molla,
 Ca serve, p'agghiustà no vejaggiello
 A sti compagne mieie, ch'agnuno colla.
 Vennero leste leste, a bbuonneccchiune,
 Stole, sacche, sportelle co sportune.

X.

Cert'aote se mettieno a ccarrejare
 Fune, zappe, mazzoccole, zappielle,
 Cate, sciamarre, cuofane, cocchiare,
 Pale, scale, scalille, manganielle,
 Crive, chiuove, terocciole, vregare,
 Serre, pennielle, sfragasse, martielle,
 E cquanto maie nce vò, pe ffa na casa,
 Da lo soppigno pe nzi a la prevasa.

Scese

XI.

Scese isso abbascio, e le fface acconciare
 Ncopp' a tutte li ciucce; e ppo votato
 A cchelle: Via, chi s' ha da carrecare,
 Accommenz' a ssagli, ca stà agghiustato:
 Lloco vediste le scigne a mmeigliare
 Zompà dint' a le sporte, e, ccarrecato
 Che ffuje agnuno, disse: Leva mano.
 Abbejateve tutte chiano chiano.

XII.

Ccà mmo chi po contare li lamiente
 De chi restava, ca no nce capeva:
 Lo cchiagne de l'ammice, e li pariente
 De chi stea carrecata, e sse nne jeva:
 Li schiaffe, li mmascune, e li scenniente
 De chi aveva d' avè da chi parteva.
 Vasta. Pe n' ora, e mmeza pe le strate
 Sentieno allucche, chiante, e ghiastemmate.

XIII.

Scomputo sto frasasso, e stō remmore,
 Ascleno a na campagna largolella;
 E, mmente cammenavano, da fore
 Vedettero spontà na nuvolella:
 Chessa è cchella, che me manna lo Gnore,
 Disse lo Ciucciariello; chessa è cchella.
 Eccola ccà, comme vene de pressa:
 Stateve allegramente, chessa è essa.

XIV.

No ntanto avea scomputo de parlare ;
Che la nuvola venne , e sse fremmaje :
Po chiano chiano se vidde allongare ,
E ttutte quante te l' attorniaje :
A ll'utemo se ngrossa , e ppare pare ,
E dda coppa , e dda sotta le nzerraje ;
Che non sulo servevale p' ombrella ,
Ma le pportava a mmammara , e nnocella.

XV.

Po piglia na corzera . Che ccorzera ?
Piglia no vuole accossì spotestato ,
Ch' a le ddoje ora de la stessa sera
Toccaie Gragnano . Bello ritrovato !
Chesto sì , ch' è bbolà . De ssa maniera
Porrise avè magnato , e ppadejato ,
Co mmanco de no juorno , attunno attunno
Tutto lo tortanone de lo Munno .

XVI.

Già la Luna a ffa spuonole era sciuta ;
E pecchè co lo frate stea nzorfata ,
Pe non se fa a bbedè , stea annasconnuta
Dereto a no pontone de la strata ;
E cco n' uocchio da llà s' era mettuta
A ffa la spia ; e stea meza cacciata
Da fore , e mmeza nò , pe se magnare
Lo tiempo justo de se la scocciare .

Quan-

XVII.

Quanno lo Rrè, che stea sempe penzuso
 Pe li ciucce, che s'erano partute;
 Se senteva già ghì pe lo caruso,
 Ca chilli scure s'erano perdute.
 Va trova, isso deceva, a equà pertuso
 S'hanno rutto lo cuollo? Addò so ghiute?
 Uh poverielle! Che rrazza de via
 De jì pe ssotta terra 'n Varvaria!

XVIII.

E ppe non se fa abbenco da li frate,
 Che ll'erano sagliute nzi a le recchie,
 For' a la tana stea co li sordate
 A ccontà cunte: comme fa a le bbecchie
 Vedimmo sera sera, quann'è State,
 Nnanze a le pporte; e ccerte ccose vecchie
 Te contano de ll'anne, ch' a li sbriglie
 Se stea spassanno Giove co li figlie.

XIX.

Io m'allecordero, ca mme decea Tata,
 Decev' uno, che ntese da Vavone,
 Pe bbocca de la Zia de la Cognata
 De Sogrema, che benea ncrosione
 Ad esse Nora a cchella, che sposata
 Fuie co cehillo, che ddeva lezione
 A lo Sivavo de li Pronepute,
 Ch'erano Frate, e Ssore a li Nepute.

XX.

Decea Tata no bello contariello ,
 Che mo non saccio , si mme l'allecordero :
 Si si . Nc' era na vota a lo castiello ,
 Ch'aveva nomme . . . uh , sempe me lo scordo ;
 Ma , che nne voglio fa ? E' ssaporetliello .
 Lo cunto . Tutto stà , si mo l'accordo .
 Vasta . Veneva a ddì , ca non s' aveva
 D'ascire maie co cchi non se sapeve .

XXI.

Mperzò ve dico mo , Signore mio ,
 Già mme ntennite . Avite fatto arrosa
 A mmannà : N' è lo vè ? N' avè golio .
 De nformarvè , si chillo era mpostore ;
 O che ddiella er'isso , che ssacc' io .
 Chi sa ? Co scusa de farce faore ,
 Nc' avesse , Uscia mme ntenne . Chella vòcca
 De la montagna me stà sempe nchiocca .

XXII.

Ment'isso ntartagliava , ecco de bbotta
 Vene volanno la nuvola nterra :
 Vene , cala , se crepa , e ffa na bbotta ,
 Che no jajo pe ll' ossa a ttutte afferrà .
 Lo primmo primmo , che nn'esce da sotta ,
 E' ll'Aseniello , ch'abbista nne sferra ;
 Po , co le scigne ncuollo , chiano chiano
 Se nne vennero ll'aute retomano .

Mme.

XXIII.

Mmederle, tale triemmolo venette
 A Bbarvajanca, e all'aute tutte quante,
 Ch'abballavano; e ppoco nce volette,
 Che non cadieno nterra. E, nnante nnante,
 Chillo povero ciuccio, che ddecette,
 Ca ll'Aseniello era no gran forfante,
 Nch'ascì lo vedde da la nuvolella,
 Le venne, arrasso sia, la cacarella.

XXIV.

Tanto cchiù, ca lo buono Ciucciariello,
 Che ccarcosella già nn'avea sentuto,
 Le tenne mente; e cco no resariello.
 Le disse: Eccome ccà, già so bbenuto.
 Cchiù bbolea di; ma pe no gran rotiello,
 Che s'era fatto a ddà lo bemmenuto
 A la gran compagnia, ch'era tornata,
 Chillo scuro scappaie sta pozonata.

XXV.

Venevano l'ammice, e li pariente,
 Patre, figlio, nepute, e li vecine,
 E ttutte le faceano compremiente,
 Salute, e rreverenzie nzina fine.
 Fratiello addio. T'aggio da servì a nniente.
 Schiavo. No nc'è dde cche, sempe accossine.
 Lo ssà, ca staje bellone. E' ll'ario vuosto.
 Chello, ched'eje. A lo commanno muosto.

XXVI.

Cierte mo s'affollavano a spiare,
 Che ll'era ntravenuto pe la via.
 Ciert' aute se mettevano a strillare:
 Vi ch'è bbenuta già la compagnia.
 Galoppavano ll' aute, pe cchiammare
 Lo riesto de li ciucce via via;
 Ed era tanta la confosione,
 Che se ntenneano pe ddescrezzejone;

XXVII.

Storduto l'Aseniello: Ecco le scigne,
 Disse nfacce a lo Rrè, ch'aggio portate:
 Cheste te faciarranno li designe,
 Le mmura, lo Castiello, e la Cetate.
 Auto mo no nce vò, che te le ncigne
 A pprovà, ca già stanno apparecchiate;
 E ppo, senza aspettà lo compremiento,
 Tocca: Sparette, che pparze no viento.

XXVIII.

Restaie lo Rrè co la parola mmocca,
 E cco no pede aizato, pe bbolere lo
 Abbraccià, e ngrazià; ma po de brocca
 Vedennolo partì, senza poterelo
 Fremmà, le passaie subbeto da chiocca
 La volontà, ch'avea de trattenerelo;
 E bbotato a le scigne: O bemmenute,
 Le disse, figlie meje, scigne sapute.

XXIX.

Mo mme pozzo chiammà lo Si Felice,
 Pocc'aggio a bbuie, che mme facite amore,
 Volimm'essere nziemo cchiù ch'ammice,
 E nce volimmo rallegrà sto core.
 N'aggio a ppaura cchiù de li nnemmice,
 Che mme vengano a ffa lo bell'ammore:
 Ca quanno sarrà fatto lo fortino,
 Sa quanto vanno? quant'a no lopino.

XXX.

Sulo mme despejace, ca non aggio
 Apparecchiato rrobba da magnare;
 Pocca credeva, ca sto gran vejaggio
 N'anno a lo mmanco, avesse da dorare.
 Puro mo mmo servire ve farraggio,
 De lo muodo, che mmeglio se pò fare;
 E ssi n' avite nzo, che mmeretate,
 Pegliatene la bona volontate.

XXXI.

Poco descuosto nce stà n' orteciello,
 Che pe mme ssulo mme ll' aggio sarvato;
 Tanto che no nce va manco n' auciello.
 Co tutto ca de mura n' è nzerrato.
 E' cchino d'erva, co no sciummetiello,
 Che lo va addefrescanno p' ogni llato:
 Llà ddinto sgolejà pe potarrite
 De vevere, e mmagnà quanto vorrite.

Ve.

XXXII.

Ve restammo obbreccate, ca n'avimmo
 Nuje aote vocca de magnà sse ccose,
 Resposero le scigne; e nce pascimmo
 De rrobbe, che non so accossì sforgiose.
 Nce vasta sulo, quanto nce coglimmo
 Quatto nuce, ca simmo goliose
 De sse schefienze, e ssimmele coselle,
 Scioscelle, pigne, castagne, e nnocelle.

XXXIII.

Si nn'avite de cheste, nce potite
 Dà la leciencia, ca le ghiammo a ffare.
 Uh, de sse ccose, quanta nne volite,
 Disse lo Rrè; no ve ponno mancare.
 Si de nuce, e nnocelle ve pascite,
 Ve nne potite propio sgolejare:
 Da ccà becino nce ne stà na serva,
 Che de ste zorbie pare la konzerva.

XXXIV.

E botato a li ciucce: Via su, jate
 A lo voschetto co ste Ssegnorelle.
 Jettero tutte, e nzhe ffuieno arrevate,
 Nce trovaieno no munno de nocelle.
 Nche le schiusero chelle, nzanetate,
 Te le bediste ncimma a l'arvoscielle;
 Ca Dejana, pe ffarele faore,
 Comm'aggio ditto, stea meza da fore.

Da-

XXXV.

Dapò , che se nn' anch'ieno de maniera ,
Che , cquanto a no tammurro , aveano fatte
Le ppanze : Vasta chesto pe sta sera ,
Dissero ; e sse nne jieno guatte guatte .
Lo Rrè nfra tanto avea già a la ncorzera
A ccierti ciucce fatto dà li sfratte ,
Che stevano abbetanno int'a na tana ,
Ch'era da chella soia poco lontana ;

XXXVI.

Tanto che cquanto fuieno de retuorno
Chelle , trovaieno lèste pe le strate
Li ciucce , che da tutto lo contuorno ,
Pe le sservire , steano apparecchiate :
A da li stisse , nche le fuieno attuorno ,
Fuieno zeppa , e dde pesole portate
Dint' a la tana , addò s' arrecettajeno
Pe nzi che la matina non s' auzajeno .

XXXVII.

Lo Sole già , co la lanterna a bbota ,
A li Cucù decea : Fremma , la corte .
E li scure pegliavano la vota ,
Pe se jì a ncaforchià dint' a lo fforté .
Li passarielle , pe lo fa dà vota ,
Le faceano l'allucca nzi a le pporte ;
E ddapò , fatto a isso no saluto ,
Le ncignaieno a ccantà lo Bemmenuto .

Quan-

XXXVIII.

Quanno le scigne jettero a ttrovare:
 A Barvajanca, ch'era già scetato,
 Le dissero, ch'er'ora de ncignare
 A ffa chello, ch'aveano desegnato;
 Cercà vrecce, fa ccauce, caucenare,
 Scavà la pezzolamma; azzò cche ddato
 Se fosse, quanto primmo via via,
 Prencipio a ffa quant'isso volarria.

XXXIX.

E, avuta la lecienza, se nne jettero
 Chi a na parte, e cchi a n'aota retrovannole;
 E ttrovate le brecce, nne mettertero
 Paricchie int' a no fuosso, ammontonannole
 Bello una ncopp'a ll'aota, e ppo nce dettero
 Fuoco, che le ghie ardenno, e ghianchejannole,
 Tanto che nquatto juorne se trovajeno.
 Tanta cauce, che cchiù no nne cercajeno.

XL.

Cert' aote se mettertero a scavaré
 Pezzolamma, e rapillo p'ogne strata:
 Certe ncignaïeno a ffa li caucenare,
 E ll'aote a ccarrejà a la desperata
 Se mesero acqua, pe la devacare
 Dint' a ssi fuosse; e cquanno apparecchiata
 Vedettero ogne ccosa, accommenzajeno
 A ddesegnà le mmura, e ppo scavajeno.

XLI.

Ma pecchè tutte quante erano assaje
A ffatecà schitto a no pezzetiello,
Se spartieno; e na parte nne restaje
A ffa le mmura, e n'aota lo Castiello.
E cchisto abbista mo se desegnaje,
Ca nn' aveano portato lo modiello,
Comm'a cchillo, ch'avea fatto pittare
Chiarchiolla a lo pajese, e n'avea pare.

XLII.

Chisto era fatto, comm'a n'arteficio;
Stritto, e appezzuto ncoppa, e ssotta chiatto;
Da terra asceano, fatte co ghiodicio
Quatto moraglie nquattro, che dde quatto
Battarie te facevano l'afficio.
Mmiezo a sse bbattarie po nc' era fatto
No muro a uso de no gran cannuolo,
Che pparea la Lanterna de lo Muolo.

XLIII.

A cchesta forma accommenzaïeno a ffare
Le scigne lo Castiello de Gragnano.
Ncignaïeno a ffa le mmura; e nche arrevare
Le bedettero nzì a lo primmo chiano,
No le parze cchiù ncoppa secotare
A ffa lo riesto, ma levaïeno mano;
E sse mesero a ffare no lavore
Ntuorno a la porta, ch'era no stopore.

Ap

XLIV.

Apprimmo apprimmo stevano chiantate
 Nterra doie vrecce tonne, che pparevano
 Doie gran rote de carro, o doie frettate:
 Ncopp' a ccheste, a l'allerta, se vedevano
 Doie colonne, ma tutte storzellate,
 Che sotta erano chiatte, e ppo se jevano
 Cchiù ncopp'assotteglianno, e mmiezo steva
 No po de guobbo, che cchiù nfore asceva.

XLV.

Da sso guobbo po jevano crescenno,
 E cquanto cchiù nzi mponta s'allongavano,
 Tanto cchiù se vedevan'ì nchiattenno:
 Arrevate nzi ncoppa, s' accovavano,
 Tanto che n' arco veneano facenno;
 E, ffatte a cchisso muodo, fegoravano
 Li quarte de no ciuccio de dereto,
 Da ll'ogna nzi addò vrociola lo fieto.

XLVI.

Ncoppa nc' era no Tunno, che sserveva
 Pe ffa llà nfacce no cuorpo de mpreša;
 E cchest' era na coda, che scenneva
 Mmiez a sso Tunno, e steva stesa stesa.
 A ssa coda na scritta se vedeva
 Mpont' a li pile, co na nocca appesa:
Si n'aie chessa, jarraie sempre cchiù a ffunno:
Chesta è cchella, che ddommena lo Munno.
 Cchiù

XLVII.

Cchiù nn'auto na corona nce facettero,
 Che simmele a lo Munno non fuie vista.
 Doie Recchiune a li pizze nce metterero,
 Che dduie cuoppe pareano a pprimma vista,
 E ssotta st'auto mutto nce scrivertero,
 Che le rrecchie cegnea, comm' a na lista:
A ssi cuoppe vo bene la Fortuna,
Ca dint' a cchiste li zecchine auna.

XLVIII.

Da sott' a sta corona a la rejale,
 Da ccà, e dda llà penneano campanielle,
 Stole, testere, capezze, cegnale,
 Varde, mmaste, mologne, sciocchietelle,
 Morge, cancelli, pannielle, stracquale,
 Fierre a galletta, cuofane, e zappielle:
 Sotta nce stea: *Nuie sule le pportammo,*
Si mbè non sule nce le mmeretammo.

XLIX.

A sta porta, da ll'una, e da ll'aot'anca,
 Fatte a uovo nce steano doie cornice:
 Dinto a cchella, che stev' a mmano manca,
 D'Apoleio lo retratto se nce fice,
 Tanto simmele, ch'auto no le manca,
 Che n' arragliata; e ssott' a isso, dice
 No mutto, appiso co no correjulo:
Si so lo primmo, non sarraggio sulo.

Din-

L

Dint' a ll' aota cornice , a mmano ritta ;
 Nc' era fatto no Cielo co ddoie stelle ,
 Che si liegge la storia , che nn' è scritta ;
 Saie , ca fuieno no paro d' Asenielle ,
 E mmo puro so tale ; e n' aota scritta
 Nce stea sotta , attaccata co ddi anelle :
Chi a lo Munno vo essere stemato ,
Sia comm' a nnuie , ca pe nzì 'n Cielo è auzato.

LL

Chist' era lo lavore , che ffacettero
 Nnante a la porta ; e ffu accossì ccomprito ,
 Che cquanta po nce jleno , e lo vedettero ,
 Dissero : Veramente stà polito .
 Ma mente a ffa lo riesto se mettertero ,
 Sentleno sorzetà no gran desquito ,
 Comm' a no serra serra , into Gragnano ,
 Che le ffice a lo mmeglio levà mano.

Seompetura de l' Arragliata XI.

DE LA
CIUCCCEIDE
 ARRAGLIATA XII.



ARGOMENTO.

*Dice a lo Rrè no ciuccio , ca volanno
 Veneno cierte , pe lo stroppejare
 Isso va addò Sello , e lo malanno
 Le conta ; e cchillo Giove va a trovare:
 Vede 'n Cielo gran cose ; e mmente stanno
 Li Deie nconzurta , le bene a ppregare
 Na Dea vecchia , che cco na penzata
 De Mercurio se nn' esce conzolata.*

I.

Mente se jea facenno lo Castiello ,
 E sse stev' a lo primmo appartamiento ,
 Venne a lo Rrè volanno n' aseniello ,
 Ch' a ccorre la facea porzì a lo viento ;
 E le disse : Segnò , stà ncellevriello ,
 Da fora mme ne chiammo : statt' attiento ,
 Ca nc' è na mala nova , e n' aggio core
 De te la dì , ca nn' aggio gran dolore.

Cho

II.

Ched' è ? Le scigne se ne so ffojute ,
 O l'è ccaduto lo Castiello ncuollo ,
 Disse lo Rrè. Se nne fossero jute ,
 Respose chillo , tutte a rrompecuollo ,
 Ca manco sarria niente . So ccadute
 Dint'a la cauce , e stanno llà nnammuollo ?
 Peo . Co li ciucce se so mpeccecate ?
 Uh nc'è cchiù ppeo . Site state scannate ?

III.

Site muorte de subbeto ? A mmalora
 Se nne so ghiute ll'asene ? Ch'è stato ?
 No mme tenè a la corda , che bbonora
 E' ? Parla , che puozz'essere squartato .
 Signore mio , nò lo bolea dì ancora ,
 Ca v'aggio visto troppo nforejato .
 Dillo , co ttutte le bbonore toje ,
 Dillo mmo , dillo ppriesto , e ddì che bbuoje .

IV.

Già cchè ssapè mo propio lo bolite ,
 Mo ve lo cconto : Aggiate da sapere ,
 Ca li Cicciune se so ttutte aonite
 Contra de nuie , pe ffarce despiacere .
 E cchi so sti Cicciune ? Non sapite
 Chilli Griecce , che stanno a mmonnà pere
 De l'Acacaja mmocca a li confine ?
 Ah , vuo' dì Siciune ? Gnoressine .

E cchè

V.

E cche bonno da nuie? Mo ve lo ddico :
 Chiste ccà fanno guerra a l'Ambraciuote ,
 Chille de la Prevasa . Atta de nnico ,
 Comme mme le stroppe! Mme le rrevuote
 De manera , che non se sa l'ammico ,
 Nè cquà sia lo nnemmico . Addò te vuote ,
 Co sso pparlà , nne faie cadè na casa :
 Se chiamma la Prevesa, e non Prevasa.

VI.

Scusateme, ca songo n'anemale ,
 E dde ste ccose maie nn'aggio saputo.
 Chiste songo nemmice capetale ,
 E nfra lloro semp'hanno commattuto :
 Ma , da poc'ha , pe se fa propio male ,
 Era ncampagna ll'uno , e ll'auto asciuto ;
 E steano tutte duie tanto ncanate ,
 Che pparevano vufere stezzate .

VII.

Ora mo li Secciune , pe ppegliare
 Li povere Ambraciuote a la gajola ,
 De notte tiempo se jleno a schiaffare
 Dint'a no vosco ; e steano a ffa la cola ,
 Aspèttanno into llà , pe le stagliare
 Li passe , e ppe ncapparle a la tagliola .
 Nchesto , venne a ppassà pe cchella via
 No ciuccio , e n'Ambraciuoto ncompagnia.
 Nnan-

VIII.

Nnanz' a lloro venea no ciucciariello ,
 Che ghiea pascenno sulo pe la strata ;
 E mmederse ; ncignaïeno no greciello,
 Che pparea, se movesse già n' armata .
 Li Secciune , ch' a ffa lo trajeniello
 Steano dintò a lo vosco , a st' arragliata
 D' esse state scopierte se penzajeno ,
 E a ggamme ncuollo subbeto scappajeno .

IX.

Accuortose de chesto l' Ambraciuoté ,
 Le dieno ncuollo , e ttutte l' accedettero ;
 E ppecchè songo gente assaie devote ,
 Na statoa d' oro a lo ciuccio facettero .
 Chille sapenno po , ca ste revote
 Pe ccaosa de no ciuccio soccedettero ,
 Pe se nne vennecare , hanno jorato
 A fferro , e ffuoco de mannà sso Stato .

X.

E già mo tutte se vanno movenno
 Pe benì quanto primmo chesta via :
 Io , nche ll'aggio saputo , a la ncorrenno
 So benuto ccà a ddirlo , azzò ch Uscia
 Nce trova quà rremmedio . Sentenno
 Chesto lo Rrè , tremmanno , arrasso sia,
 Cala le rrecchie , allonga lo mossillo ,
 Schiaffa nterra , e pperdiè lo speretillo .

Re-

XI.

Revenuto che fluie, senz' aspettare
 La Guardia de lo cuorpo, s'abbiaje
 A Lettere, pe ghirse a cconzortare
 Co Selleno; e arrevato, se jettaje
 Nnante a la staoa, e la ncignaie a ppregare,
 Che l'avesse sarvato da sti guaje:
 Chiagnie tanto, che stracquo s'addormette:
 Nzuonno chillo l'apparze, e le decette:

XII.

Figlio, lo ssaccio; ma non dobbetare,
 Ca è ppiso mio de te sarvà sso Stato:
 Vattenne allegramente, e llassa fare.
 Ora sacce, ca 'n Cielo è ddecretato,
 Che sta razzimma toja aggia a rregnare
 Sempe a lo Munno. Accossì bbò lo Fato:
 Torn' a Gragnano, e statte llà a ssentire
 Chello, che ppo te mannarraggio a ddire.

XIII.

Nchesto dì, Varvajanca se scetaje,
 Rengrazzie Selleno, e a la ncorzera
 Mmiero Gragnano se l'appalorciasse;
 E ssi mbè llà trovaie, che già se nn' era
 Spasa la nova, e agnuno s'agghiajaje,
 Mmederne ascì lo Rrè co cchella cera;
 Puro tornanno co no pizzo a iriso,
 Fice allegrà chi se chiagnea pe mpiso.

H

Sel-

XIV.

Selleno ntanto , pe se confarfare
 Co Giove de lo muodo , che ttenere
 S'avea a sto mbruoglio, e cche s'avea da fare,
 Sagliette 'n Cielo; e mmente fa a bbedere
 Si nce stev' a la casa , e ttozzolare ,
 Uno da dinto le fice a ssapere ,
 Ch'era juto a lo Tempio de la Gloreja ,
 Pe ffa la festa de na gran vettoreja .

XV.

Era lo juorno , che scompeva ll'anno ,
 Che 'n Cielo li Giagante nforejate
 Saglieno , pe le dà no gran malanno ;
 Ma da llà ncoppa , a bbotta de vrecciate
 Comme sapite , jeno vrocioianno
 Tanto pe cchella via , che nche arrevate
 Fuieno abbascio , atterrate rommanettero
 Da li munte , che ncuollo le cadettero .

XVI.

Pe sta vittoria , accossi ssegnalata ,
 Se fa ogn'anno a sto tempio na gran festa,
 For' a la porta se nce fa n' arcata ,
 Tutta de lauro , e sciure de jenesta ;
 A lo primm' arco , ch'è nfacce a la strata,
 Nce stà na Screzzione , e creo , ch'è cchesta:
Venite ccà a bbedere , capòtuoste ,
Comme se tratta co li pare vuoste .

Tra-

XVII.

Trasute dinto , nfacce a no pontone ,
 Da la banna deritta , se trovava
 Na tenna co na banca de terrone ,
 Addò Giove , trasenno , s'assettava ;
 E , pprimmo de ncegnà la fouzione ,
 Agnuno de li Deie se nc' azzeccava :
 Isso a cchi deva no sosamelluccio ,
 O na zitola , e a cchi no martelluccio .

XVIII.

A mmano manca nc'era no ntaolato ,
 Auzato apposta pe li sonature :
 Ncoppa stea lo Cortese , e lo Cecato
 Da ccà , e da llà , a li primme sedeture ;
 Chisso a na tromma , e cchill'auto dea sciato
 A no connutto de ntofolature ;
 Ma pecchè chella è bbecchia , e chisso è nuovo ,
 Se sentea meglio chisso , e ddeà a lo chiuovo .

XIX.

Dereto a lloro , Rota , e Sannazzaro
 Sonavano , nconzierto , no sconciglio ;
 E no poco cchiù ncoppa , a pparo a pparo
 Teocreto , e Bergilio , patre , e figlio ,
 Co na zampogna de no pecoraro
 A bere na meza a lo Cerriglio
 S'erano desfedate ; e appriesso a lloro
 Nc'era de sonature n'auto coro .

XX.

E ssonavano nzì che Giove steva
 Assettato a la banca, e ddespenzava;
 Ma subbeto che cchillo se soseva,
 Tutta ssa mmorra abbascio vrocio lava,
 E nnanze a isso, e a ll'aute se metteva;
 E ssonanno sonanno le pportava
 Dint'a lo tempio, addò, pe la vettoreja,
 Scampanejava la campana a groleja.

XXI.

Scomputo chello, che s'avea da fare
 Dint'a lo tempio, se nn'ascièno fore,
 E ss'assettaieno, pe bedè jocare
 Le ppapare; ca caccia de li tore
 Non se pò 'n Cielo manco nnommenare:
 Pocca, da che ncappaie Giove a n'arore,
 Deze a sta caccia li quatto de Maggio,
 Sotta coperta, ca facea dammaggio.

XXII.

Co sto juoco no piezzo se spassajeno
 A bbedè chi sapea taglià cchiù nnietto;
 Ma nfra l'adaccature, che ghiocajeno,
 Tre bbecchiune nce dezero de pietto,
 Che bberamente se nc'ammortalajeno:
 Ll'aute venì le fecero l'appietto,
 Ca non correano, e cquanno erano sotto,
 Nce volea n'anno, pe le dà na bhotta.

Lo

XXIII.

Lo primmo de li tre fù Ghiovenale ,
E le dea de manera , ch'ogne bota ;
Che la cogliea , chella n' avea cchiù mmale:
Ll'auto fù Perzio ; ma , da vota a bbota,
No nce lassava manco lo nzegnale ,
E ppe ttrovà la botta , se jea mmota:
Ll'utemo Arazio , che la capozzella
Le facea netta co na resarella .

XXIV.

Ghiste ; e ttutte chill' aute , che ssonavano ,
Nce le pportava Febbò sta jornata ;
E dda Parnaso , addò se la scialavano ,
Ogn' anno nne venea na ncarrozzata ;
Ma , nche aveano scomputo , appalorciavano
Subbeto abbascio pe la stessa strata :
Ca co ssa gente non se pazziava ,
E nnante nnante Giove nne tremmava .

XXV.

Nce mancaie , pe ffortura de li vecchie ,
Settano , 'e ll' Ariosto ; ch'acciarrato
La Corte tenea chisto pe le rrecchie ,
E ncase ll'avea fatto lo mannato :
L'auto , pecchè pegliare a ppezze vecchie
Na paparona schitto avea jorato ,
Nche la vedette spetacciata , e mmorta ,
La cortella appennje reto a la porta .

XXVI.

Fatta ssa festa, primmo che s'anzasse
 Giove da lo barchetto, s'accostaje
 Selleno, e le decette li fracasse,
 E tutto lo niozio le contaje.
 Nzentirl'isso: Che bbonno sti smargiasse,
 Disse, da ll'asenielle? Non sia maje,
 Ch'aggia a sortì st'arore: vi che ccosa!
 Le volimmo fa fa na bona ntosa.

XXVII.

Fa accossine: mo mmò nuie nce ne jammò
 Tutte a la casa, a ffare li festine,
 Viene tu puro, ca llà conzurtammo
 Che ll'avimmo da fa a sti babbuine;
 E botato a li Deie: Via su ammarciammo;
 Disse a tutte, ca già pe le ccantine
 Va votanno lo Sole; ch'aggio a ccaro,
 Che mmagnate na zuppa a lo pagliaro.

XXVIII.

Nzentì zuppa, toccaeno tutte quante
 A la casa de Giove a la ncorrenno;
 Ma Selleno lè ffice passà nnante,
 Ca pateva de jorde, e ghiea attegnenno;
 E ppe la via trovaie n'auto tardante,
 Che se la jleno nziemo trascorrenno:
 Era chisso Vorcano sfortunato,
 Che cco na coscia stea miezo sciancato.

Tan-

XXIX.

Tanto che cquanno lloro po venettero,
 Trovaieno li festine già scompute;
 Ch'era longa la strata, che ffacettero;
 E lloro adaso adaso erano jute;
 Otra ca nquanno nquanno se nce jettero
 Fremmanno, comme cierte addebbolute
 Vanno facenno spisso pe la strata,
 Che te fanno ascì ll'arma ogni pposata.

XXX.

Co tutto chesto asciaieno na resuglia
 De presutto, e no po de sottestato,
 Che Dejana, co n'aota rommasuglia,
 Pe li cane de caccia avea stipato.
 Lloro nce l'abbistaieno, e cco la bbuglia
 Se l'asciuttaieno miezo arrefreddato;
 E stotate di lampe d'amarena,
 Pe n'esse viste, votaieno carena;

XXXI.

E sse mettettero a bbedè jocare
 Certe, che se faceano n'Aseniello;
 Ma nche arrevaieno, s'appe a ssorzetare;
 Pe na mala jocata, no greciello,
 Che ssi non se vedea Giove spontare,
 Certo nce soccedea no gran maciello:
Vi che ffa lo ghiocà, quanno lo mmusto
Ncigna lo primmo vullo int' a lo fusto!

XXXII.

Se spassavano a ll'Aseno sti sette;
 Mercurio, Febbo, Pallade, Gionone,
 Vennera, Marte, e Bacco; e sse scoprette
 Lo trejunfo a ddenaro. A no pontone
 Stea Bacco, e avea la mano. Joca, e scette
 Co Rrè de coppa. Mercurio mbroglione,
 Che ll'Assò mmano a Pallade allommaje,
 Co tutto ch'avea coppa, lo fagliaje:

XXXIII.

Ponticcio a ll'ogna. Essa se fa corriva:
 Ched'è Ssegnora? E cche bbo esse? Aveva
 St'Asso, e mme ll'aie fagliato. Ora v'arriva
 A ssapè chesto, ca no l'accedeva.
 Benissemmo: jocate. Spata. E bbiva;
 Se vota Marte, chesta ccà voleva,
 Ca nc'aggio tanto n'Asso. Spata, spata;
 Tutt' hanno spata, e bbene la jocata,

XXXIV.

Sette mazza. Gionone mette ll'Asso;
 E Bacco nce lo faglia. Che ccrejanza?
 Ch'era lo vuosto? V! ca no nce passo
 Pe sta carata, sa Si Sancio Panza:
 Ca si va a ccoffejare, ve repasso
 Quanta site, e bedimmo chi nc'avanza;
 E' stato sbaglio. Dì, ch'è stato vino,
 Ca fiete, che nc'ammuoibe, e nne staie chino.
 Bac.

XXXV.

Bacco ha Rrè de denaro , e sse lo vatte:
 Torna pe ccoppa; e Bennera nce passa
 Cavallo de denaro , e ffa ciert'atte
 A Marte; isso avea ll'Asso , e nce lo lassa.
 Gionone , c'ha la Donna , s'auza , e sbatte
 Le ccarte: De malizia no mm'appassa
 Manco patremo . E Bacco: No strellare;
 E' flemmena , e bisogna rispettare.

XXXVI.

N'abbasta ll'esse femmena: bisogna
 Essere tale femmena , respone
 Gionone: la sia Vennera! E bbreogna,
 Che cca ncoppa se sentano ste ccose,
 S'auza Febbo. Isso vo , ch'io lo sbreogna,
 Lebbreca chella , e pprimmo che se sose,
 Te lo janchejo. Zitto , ca n'è nniente:
 Vi ca nc'è lo marito , che te sente.

XXXVII.

Che mmarito , e mmogliera? Aggio a li bbene
 A essa , e a cchi nne vo peglià le pparte.
 Giù la mano , ca nc'è chi te nce tene
 Vattutta , e rrebattuta ; (sferra Marte)
 Si la defenno , è mmeglio assaie de tene.
 Jodicio de Pacchiano. Atta de ll'arte!
 Si non mme vene voglia de . . . Ma venne
 Giove a tiempo da dinto , e sse mantenne.

XXXVIII.

Selleno, che bbedetto ntrovolato
 Ll'ario de mala chella, pe ppaura
 De sgarrà co sta bbuglia lo ffelato,
 Se fa unanze: Avarraggio la fortuna
 D'essere pe sta sera conzolato?
 Sì, disse Giove: Eilà? Stamm'a la scura?
 Luce. Teratè seggè. Via Segnure,
 Ch'aggio besuogno ecà de conzurture.

XXXIX.

Mente stèa Giove pe ccontà lo fatto,
 E già fatta nc'avea na gra frascata;
 Sè vedie trasì dinto, nñitto nfatto,
 Na Ddea vecchia, che benèa appojata
 A no Ddio vraccolillo, e cehiatto chiatto.
 Che bella cocchia! Chella fizesetata
 Steva pe la vecchiaja, e ghiea cadentio:
 Chisso stea nzallanuto, e ghiea mmestenna.

XL.

La primma era la granne Asenetate,
 Che pportava na coda de seie canne
 Dereto a lo mantò: ncapo nzeppate
 Doie recchie aveà, ch'a mmesufa de ll'anne,
 Ch'avea campato, s'erano allongate.
 Ll'auto era Baccò, ch'a li strille granne
 De Marte, e dde Gionone, a ffa licette
 Era juto nzi abbascio, e la sagliette.

Mme-

XLI.

Mmederla Giove, subheto s'auzaje
 Da lo pizzo, assetato addove steva;
 Agnun' auto, passanno, la ncrenaje:
 Ma chella mmala pena se moveva;
 Po se nne jte deritto, e ss'assettaje
 A cchella stessa seggia, che sserveva
 Pe lo Rrè de li Deie: fice assettare
 Tutte ll'aute, e ccossì ncignaie a pparlare:

XLII.

Figlie (ca figlie mieie pozzo chiammareve;
 Mente sulo pe mme vuie site nate.)
 Io fuie chella, ch'a ll'omino d'adorareve
 Le mise ncapo, e ppe mme ccà ve state:
 Ca si non era io, ch'a ffravecicareve
 Ste ccase nzerretava ssi cecate,
 Ll'uocchie avarriano apierte, e ccanosciute
 L'arrure, vuie sarrissevo perdute.

XLIII.

Mimperzò a d'Asenetà vuie mo devite
 Tutto chello, che ll'uommene ve fanno;
 Anze ll'essere stisso, e cquanto avite,
 Chi ve l'ha ddato? io schitto, e nno ve nganno;
 E pe mme assecorà ve potarrite,
 Ca pe nzì a ttanto ch'asene sarranno
 Ll'uommene nterra, vuie sarrite annmate;
 E comm'a Ddeie servute, e bbenerate.

XLIV.

Si chesto è bero, comm'è cchiù che bero,
 E mmaie da nullo ndubbio s'è mmettuto;
 Vo la jostizia, ch'io da vuie nne spero
 Chello, che buie da me nn'avite avuto.
 Ma io non boglio tanto: auto mpenziero
 Non aggio, che d'avè no po d'ajuto:
 Si chesto puro mme sarrà nnegato,
 Ll'avere fatto a bbuie, che mm ha frottato?

XLV.

Mara me, ch'aggio ditto! Dobbetare
 Comme maie pozzo de sti figlie mieje?
 Che lo ffacciano ll'uommene, assa fare,
 Ma ccà non se sa manco che ccos'eje;
 Ch'ogn'ato vizio se ponno vantare
 D'avè mparato lloro da li Deje,
 Fore che cchisso, d'esse scanosciente
 Co li benefatture, e li pariente.

XLVI.

Pe cchesto mo, sicura de la razia;
 Ve preo a tutte quante de soccorrere
 Li ciucciarielle mieie, che na desgrazia
 Da li Griecce mo mmo stanno pe ccorrere.
 Venite, e non facite, che se saria
 L'arraggia lloro, e a llav'aggia da scorrere
 Lo sango de ssi povere asenielle,
 Che ssi a mme figlie, a bbuie ve so ffratielle.
 Mam-

XLVII.

Mamma mia, quanno maie, le responnette
 Giove, nuje aute simmo state sgrate
 Co cchi na bona razia nce facette?
 E cco tte, che nc'aie propio ferrettate,
 Comme se dice, co ccippe, e mmanette,
 Vuo' che ssimim' accossì? Simm' obbrecate
 De spennerce lo sango, e cquanto avimmo,
 Ca quanto nc'è, da te lo ccanoscimmo.

XLVIII.

E ppe te fa a bbedè quanto nce mporta
 De sarvà li fratielle, aie da sapere,
 Ca primmo, che spontasse da la porta;
 Nuie nc'eramo acchiettate, pe bedere
 Che s'aveva da fare, e dde che sciorta
 Trattà ssi guitte; e ffarle no piacere,
 Che no l'è stato fatto da la mamma;
 Ch'abbesogna che ssia na gran Quarchiamma.

XLIX.

No, nce vo niente, se votaie Vorcano:
 E' ppiso mio de te le ccastecare.
 Mo na rezza de fierro, mano mano,
 Da li Cecrope mieie faccio stampare,
 E tte le nchiappo abbista; e cquanno mmano
 Po ll'avarraie, fa chello, che te pare.
 Che rrezza, e ttrezza? aie da ncappà n'auciello?
 (Repreca Marte) sempe simmo a schello.

Zit-

I.

Zitto, Vavone mio, ca n'è ppe ttene
 De parlare de machene de guerra:
 Va a ffa tripete e spite; e llassa a mmene;
 Ch'è arte mia, de manejà la sferra.
 Tu co rrezze, e ggajole te nne viene,
 E ccà nce vonno mazze, comme terra:
 Lassa fa a mmene, ca nfra capo, e ccuollo
 Le schiaffo na cagliosa, e tte le zollo.

II.

Annettateve, già ch'avite fatto,
 Guappune mieie, Giove le responnette:
 Si Marte mio, non serve sso sbaratto,
 Pe ccastecà ssi cacapozonette.
 Sarraggio muorto già, che nmitto nfatto,
 Co na quatra de frùole, e ssajette,
 Non pozza fa canosce a ssi smargiasse,
 Ca uce stongh'io, pe le staglià li passe?

III.

Lo guaie n'è cchisso; e già ve site puoste
 A mpennere, e squartà, senza penzare,
 Ca s'ha da fa co ccierti capotuoste,
 Che un'ogne ccunto la vonno spontare:
 S'io mo, peglianno ssi conziglie vuoste,
 Manno sse cquatto gatte a ccarrejare
 Lotamma co na bbotta, se starranno
 Ll'autu cojete? E' llesto: peo farranno.

Lo

LIII.

Lo fanno? (disse Marte) e nnuie che ssimmo
 Ciunche, ch'abbista non te le sgorgiammo?
 Sì, Giove lebbrecaie, jammo, accedinmo
 Tutto lo Munno, e ppo comme restammo?
 E non saie, ca si ll'uommene perdimmo,
 Nuie deritto a lo ponte nce ne jammo
 A bbotà ossa? Si n'avimmo a floro,
 De chi restammo Deie? de l'antecoro?

LIV.

Otra ca pò, cò ttutto ca no Munno
 Avite sano sano de perzune,
 Co cchi spassà vuie ve potite attunno;
 Quanno patite de male de lune;
 Co ttutto chesto, sempe no zeffunno
 Siente ccà ncoppa; sempe a ccostejune
 Facite nfra de vuje: e cche floria,
 Si lo Munno pè buie no nce sarria?

LV.

Dice buono lo Gnore veramente,
 S'auza Mercurio, è no gran cervellone.
 E ppo ve pare cosa da prodente,
 Che fiaccia uno de nuie st'accesione?
 Quanno fa grazia, mosta allegramente
 La mako, che la fa, no saracone;
 Quann'ha da castecà, lo llassa fare,
 Issu puro lo ffa, ma no nce pare.

Pc

LVI.

Pe cchesto , pe ssarvà , commie se dice ,
 Li cavole , e la crapa ; da na banna ,
 Si s' hanno a ccastecà comm'a nnemmicce ,
 E dda n' aota , n' è buono , che le scanna
 Uno de nuie ; pe mmantenerle ammice ,
 Che s' ha da fa ? bisogna , che se manna
 N' ommò , che sserva pe ffare lo bboja ,
 Ca tutta la disgrazia sarrà soja .

LVII.

E' lo vero , pe ll' arma de Messere ,
 Disse l' Asenetate , dice buono .
 Accossì s' ha da fa : ma sti penziere ,
 Chi se lo ppiglia , d' accordà sto suono ,
 Azzò che st' ommo abballa ? Stà a bbedere ,
 Disse Mercùrio : io carreo sto truono ,
 E buie ve sentarrite da ccà ncoppa
 La bbotta , che ffarrà , quanno po schioppa .

LVIII.

Chesto non po jì meglio pe nà via ,
 Se vota Giove , ma pe n' aota sgarra :
 Se ll' ha da dà na bbotta , ma che ssia
 Na botteccchia de mazza ; e non de varra .
 Che bboglio dì ? La ntenzione mia
 E de toccarle schitto la zimarra :
 E' buono , che nnuie simmo rispettate ,
 Ma n' è buono , che restano scannate .

A ccche-

LIX.

A cchesto so cco ttico: si te pare,
Potimmo fa nà cosa, le respone
Mercurio. E cche ssarria? Jammo a ttrovare
Una de chelle, che co ccerte ddose,
Co ccerte magariie, che ssanno fare,
E cco ddi parolelle, e aote ccose,
Te fanno n'ommo arreventà porciello,
Na vrecchia, no cavallo, o n'arvosciello;

LX.

E dda cheste, pe scagno de la ntosa;
Che le vorriamo fa, te le ffacimmo
Trasformà tutte nciucce; co sta cosa;
Nuie co ll'annore nuosto rommanimmo,
Lloro se sentarranno sta cagliosa,
Nce restarranno ammice, comm' apprimmo,
E lloro, co li ciucce conzarvate,
Staranno, e ss'amarranno comm' a ffrate.

LXI.

Bene, bene, resposero, bellissemmo;
Tutte li Deie: ll'aie propio annevenata.
Oh comm'è bbona! Via jammo a ppelissemo.
No nce vo auto. Certo, ll'aie ncarrata.
Non se pò fa cchiù bella. Va bravissemo.
Quanto la truove meglio? Ll'aie nzertata.
Si no mmalora. O bravo! Va ne' arriva.
Viva sempe Mercurio, Viva Viva.

E, ccon-

LXII.

E, cconcruso accossine, se scompette
 Sto gran conziglio. Giove s' accostaje
 Nnanze a l'Asenetate, le projette
 La mano, e nzi a le ggrade l' appojaje.
 Vasta nzi ccà. No mporta. Eh Uscia me mette
 Nzoggezzione. Nol farraggio maje.
 Via mo, ca mme ne scenno chiano chiano,
 P' obbedireye. E le vasaie la mano.

LXIII.

Tutte ll' aute, nche bbeddero scompute
 Ste zeremonie, se lecenziajeno;
 E ppecchè steano tutte mieze jute,
 Ca fue brutta la scigna, che ppigliajeno,
 Nche arrevaieno a le ccase, appagliarute
 Ncopp' a li matarazze se jettajeno;
 E llà chi se mettette a bbommecare,
 E cchi, comm' a scannato, a rronfejare.

LXIV.

Sulo Mercurio, che se mantenette,
 S'abbiaie co Selleno a mmano a mmano;
 E ppe la via lo tutto le decette,
 Ch'avea da fa lo Rrè dinto Gragnano:
 Po le die no vasillo, e sse nne jette
 Chillo addò Varvajanca chiano chiano;
 Isso cchiù llioggio de chillo, che squaglia,
 Co no vuole fue dinto a la Tessaglia.
Scompetura de l'Arragliata XII.

DE LA
 CIUCCCEIDE
 ARRAGLIATA XIII.



ARGOMENTO.

*Mercurio arriva dinno a la Tessaglia,
 E bba a pparlare co na vecchiarella
 De chelle, che itenè chillo, che squaglia,
 Soleno nchiuso intr' a na carrasella.
 Le dice, che pe ncopp' a la moraglia
 De Gragnano le faccia na cosella.
 Arrivano li Grieci, e hanno attuorno
 Pe ddà l' assauto, nninche schiara juorno.*

I.

*T*essaglia è nò pajese de lo Munno,
 Che stà propio a lo Guorso de Zitunno,
 Attuorno ha de montagne no zeffunno,
 Che cquase nnommenà manco se ponno:
 Ne'è Otirre e Pinno, che lo Ddio, ch'è ghiunno,
 Sgargeia, quanno stà mpierno e quanno à suonno;
 E dda do scioscia la Terrazzanella,
 Nce so ll'aote mmontagne d'Ossa, e Pella.
 A sto

II.

A sto luoco, da tanno che nce stette.
 Chella bonora nera de janara,
 Che, pe ggabbà lo Suocro, lo vollette,
 Comm'a bballana, dint'a na caudara;
 Da chillo tiempo no nce rommanette
 Na vecchia, che non fosse fattocchiara.
 Che ddico, vecchia? nzi a le ppeccerille
 Se mmezzaieno de fa le ppopatelle.

III.

E ffuieno tanta le ffattocchiarie,
 Che, scurisso, chi schitto se nzonnava
 De notte prattecà pe cchelle bie,
 Ch'auciello auciello, abbasta nce ncappava;
 E ghiuto mmano a cchelle brutte Arpie,
 Chi da ccà, chi da llà lo storzellava
 De muodo, e dde manera, che lo scuro
 Non servea manco pe ttrapanaturo.

IV.

Po de chi nne faceano no cavallo,
 No voie, na vaccarella, o no vetiello:
 Cert'aute arreventavano no gallo,
 Na vreccia, na cestunia, o n'arvosciello:
 Chi na seggia, chi ciuccio, o pappagallo,
 E cchi no pappamosca, o no porciello,
 E ttutte nzomma d'uommene perdevano
 E bboce, e ccuorpo, e n'auto nne vestevano.
 Mper-

V.

Mperzò si cammenanno , pe ffortura
Pe cchelle bie trovave na Cajazza ,
Potive dì : Sta bella criatura
Fuie na femmena cierto ; e sta vociazza ,
Co ttutto ca n' è ffemmena , le dura :
E ssi a rrevota te mettea na chiazza ,
Quanno stea a ttatanà co le ccompagne ;
Mò te nfetta ste ssirve , e ste ccampagne .

VI.

Si scontrave no Ciuccio a no pontone
Carreco de lotamma , e dde mmonnezza ,
Potive dì : Chist' era no reccone ,
Vi addò so li zecchine , e la rrecchezza ?
Si vedive volà no Sporteglione :
No mbì chist' auto ? e ssa che ffina pezza
Era lo bene mio ? lo marranchino
Ascea de notte , pe ghiocà d' ancino .

VII.

Si le ttele facevano li Ragne ,
Pe ncappà li moschille , che ppassavano ;
Puro accossì faceano a li compagne
Chiste , che mmo so rragne , e le ggabbavano.
Si lo ggrano pe mmiezo a le ccampagne
Le Fformiche arroccchiavano , e stepavano ;
St' avarune porzì accossì ffacevano ,
Quann' a ll' aute arrobbavano , e nchiudevano.
Nzom-

VIII.

Nzomma , s' nfenfejava no Froncillo ,
 Si zecchejava llà no Marvezziello ,
 Si zio zì facea no Sorecillo ,
 Si mbè mbè responnea no Pecoriello ,
 Si t' abbajava ncuollo no Canillo ,
 Si sentive arraglià no Ciucciariello ,
 Potive dire : Tutte st' anemale
 Eran' uommene primmo , e mmo so tale.

IX.

Na cosa schitto nc' era , che ppoteva ,
 Co lo tiempo , sarvà sti sfortonate ;
 Ca si a ll' auti cazune se nne jeva ,
 Primma de lloro , chella , che mmotate
 Ll' avea d' uommene mmestia ; se rompeva
 Subbeto la fattecchia , e rrèturnate .
 A la forma de primmo , se nne jevano ,
 Senza che cchelle cchiù le ttrattenevano .

X.

Comm'a cchi na Tarantola ha schiàffato
 No muorzo , siente d' a le becchiarelle ,
 Ch' ogn' anno ha d' abballà lo sbentorato ,
 Tutto chino de nocche , e ziarelle ,
 Pe nzi che cchella , che l' ha mozzecato ,
 No le faccia passà le ttarantelle ;
 E nce le ffa passà , quanno na gatta
 Le fa no carezziello , e tte la schiatta .

Ma.

XI.

Ma si mbè chilli scure retornavano
Uommene, comm'a pprimmo, se vedevano
Fa certe ccose, che s'allecordavano,
Che, quann'erano bestie, facevano.
Ca si de chillo scuorzo se spogliavano,
Chille costumme sempe mantenevano;
Tanto che cchi era stato n'anemale,
Ommo, e buono era puro bestejale.

XII.

Chist'era lo pajese, addò volanno
Da lo Cielo Mercurio se nne jette;
E ssenza che lo jesse revotanno,
Pe ttrovà chelle fjemmene mmardette,
Tutt' aonite l'asciaie, che ghiusto tanno
Steano facenno cierte descurzette
De lo cchiù, e de lo mmanco, sotto voce,
De notte, ncopp'a n'arvolo de noce.

XIII.

Sta noce era lo luoco, addò st'Arpie
Se nne jeano de notte a cconfarfare,
Pe bedè de che mmuodo, e ppe cche bie
Potessero lo Munno sconquassare;
E ppe ffa meglio ste ffrabbottarie,
Senza farene ll'uommene addonare,
Quanno chille dormevano, pegliavano
Deverze forme, e sse l'appalorciavano.

Chi

XIV.

Chi venea nforma de na Coccovaja ,
 Chi pegliava de n' Ascio la fegura ,
 Chi da Cuculo te faceva la baja ,
 Chi da Cevetta te mettea a ppaura ;
 E ttutte nzomma jeano a ffa ssa baja
 Nforma de chill' aucielle , ch' a la scura
 Te le bide ronnà pe ssi portune ,
 Luccare , Varvajanne , e Sportegliune .

XV.

Ma chillo , ch' era aucielo cchiù de llo ,
 E ssapeva da ll' A pe nzi a lo Rummo ,
 E , a ffa nziemo co cchelle sto lavoro ,
 Te ll' avarria portate summo summo :
 Ca mmano a isso se colava ll' oro ,
 Anz' oro te faceva parè lo cchiummo ,
 E ppe ffa mbroglie nne venea da metere ,
 Tanto che nullo nce potea competere .

XVI.

Nche n' uocchio nce jettaje , e le bedette ,
 Le ecanoscette a cchella ncornatura ,
 E cco no ppizzo a rriso le decette :
 Schiavo , Signore meie ; che ggran fortuna
 E' dde Mercurio vuosto ! Nche ssentette ,
 Ch' era Mercurio , agnuna pe ppaura
 Restaie fredda , e ghielata ; se schiaffaje
 Lo pizzo int' a le scelle , e ss' accovaje .

Ched'

XVII.

Ched' è stato, che buie v' aanasconnite?
(Le lebbrecaie Mercurio) so benuto
A sservireve a ttutte, ca mm' avite
Da fa no gran piacere, e ddarme ajuto:
Saccio quanto mm'ammate, e cche ppotite,
Ca da no piezzo v' aggio canosciuto;
Mperzò stammo nfra nuie da frate, e ssore,
Azzeccateve tutte, anemo, e core.

XVIII.

Co sto pparlare agnuna jle caccianno
La paura da dinto a le bodelle;
E ccomme se nce jeva assecoranno,
Jea caccianno lo pizzo da le scelle:
A lo rreto, zompanno, e scellejanno
Da ccà, e dda llà pe cchille ramoscielle,
S'aonieno tutte ncopp' a cchillo rammo,
Addò Mercurio stea, comm' a rrechiammo.

XIX.

Nche le bidde azzeccate, le contaje
Chillo la guerra de li Siciune,
E ttutto chello, che se confarfaje
Nfra isso, Giove, e ll' aute Satrapune;
E all' utemo le disse: S' appontaje,
Ch' una de vuie, co cchelle mmenzejune,
Che so ssolete voste, avesse fatto
Deventà agnuno ciuccio nnitto nfatto.

XX.

Pe c'hesto chi se fida, e lo ssa fare,
 Lo ffaccia primmo, che se schiara juorno.
 Via su, mano a li fierre. A sto pparlare
 Tutte l'aucielle se yotaieno attuorno;
 Po se mesero fitto a sgargejare
 N'Ascio, che stea cchiù ttuosto de no cuorno,
 Comm' avessero ditto: Chist' è isso,
 No nc' accorr' auto, no nte cagnà chisso.

XXI.

Panfela s'è chiammava, ed era chella,
 Ch'a lo scuro Apoleio fice la festa,
 Ma senza corpa; ch' a la carrafella,
 Che c'hella tenea fore a la fenesta,
 Si isso non avea l'artetechella
 De se ncè jì a ssedognere, da chesta
 Desgrazia fuorze nne sarria scappato,
 E n'avarria lotamma carreato.

XXII.

Ma, fosse soia la corpa, che ccredeva
 De fa no volo co chell' onzione:
 Fosse de la Vajassa, che ddeveva
 Nformarse meglio de la mmenzione:
 Fosse de la Patrona, che ssapeva
 Quanto sti duje aveano ntenzione;
 Vasta, ca essa avea st'artè a le mmano
 De fa arreventà ciuccio no pacchiano.

Ora

XXIII.

Ora chësta vedènno, ca da 'essa
 Steano tutte aspettanno la risposta,
 Votatase a Mercurio, disse: Chessa
 E' na fatica, che ppoco mme costa;
 Ma n' è ccosa de farla co ssa pressa,
 Ca Febbo co lo carro già s' accosta;
 E ccà bisogna, che la notte stia
 Secotanno li grille a mmeza via.

XXIV.

Mperzò dimano a ssera vienetenne,
 Ca nce nne jammo a ffa sta fonzione;
 E ssi non puoie venire, vavattenne,
 Ca resta a ppiso mio sta mmenzione:
 Mme nne vao co no vuole int' a le ttenne,
 E ssedognenno co no carrafone,
 Che mme porto co mmico, lo tterreno,
 Te le mmanno volanno a mmagnà fieno.

XXV.

Nò, facimm' accossì: (le responnette
 Mercurio) azzò che ttoccano co mmano,
 Ca ncuollo sto malanno le chiovette,
 Pecchè bozero jì dinto Gragnano;
 Sto zuchillo bisogna, che lo jiette
 Ncopp' a le mmura, azzò che mmano mano,
 Comme chille le beneno zompanno,
 Vengano tutte ciucce arreventanno.

XXVI.

Chesto mo a gusto tuo, le disse chella,
 Già che tu vuò accossì, accossì bogl'io.
 Governate. Orsù fa, che rresca bella
 La mmenzione. E' penziero lo mio
 De servireve a tutte a barda, e ssella.
 Schiavo. Obbrecato. A lo commanno. Addio.
 E bolato Mercurio, se scompette
 So pisse pisse, e agnuna se nne jette.

XXVII.

L'Aurora ntanto, che s'era addonata,
 Ca li cavalle co lo carrettone.
 D'Apello già s'avevano pigliata
 La mano, p'ascì fore a lo portone;
 Non sapenno che ffa, s'era affacciata
 Tutt'arrossuta ncopp'a no barcone,
 E stea da llà nfettanno miezo Munno:
 Aparate, aparate sto zeffunno.

XXVIII.

Quanno li Siciune comparettero
 Sott'a Gragnano, mmiezo a na chianura;
 E ffuieno tanta, che nce nne venettero,
 Che ccreo, no nce restaie na criatura
 Dint'a le Terre lloro. Nce correttero
 Le mmogliere, e le figlie; e ppe ffortura,
 Nzì a cchi non potea scì senza stanfella,
 Nce fuie portato a mmammara, e nnocella.
 E nn'

XXIX.

E nn'aveano ragione , ca penzavano
 De nce jì a ffa na festa into Gragnano :
 Pocca lo mmanco , che se smacnavano ,
 Era d'avè co cchille a ccaccià mano ;
 E dd'auto pe la strata non parlavano ,
 Che de banchette , e farse no tiano
 Tutto de capezzale , e ffecatielle
 De pollaste de ciuccio , e stentenielle.

XXX.

Ma li papurchie , che s'aveano fatto
 Male lo cunto senza tavernaro ,
 Non sapeano , ca jevano de chiatto ,
 Quanno credeano agliotterse lo maro :
 Penzavano de fa no buono accatto ,
 E ghiocarse li ciucce a pparo , e sparo ;
 Ma po co na codella se trovajeno ,
 Che pe cquarch'anno se la strascenajeno.

XXXI.

Musa tu , che lo mese , e ssaie lo juorno ;
 Che ssocedette sto caso de chiappo ,
 E ssaie ll'anne , la facce , e lo contuorno
 D'agnuno , che nce jette a ffa lo guappo ;
 Fa , sore mia , ch'io scompa sto taluorno.
 Che mm'ha storduto , e llevame sto tappo :
 Ca si sta vota me nne veo asciuto ,
 Te mpromecco da mo de farne vuto .

XXXII.

Era justo lo primmo de lo mese;
 Che ffa mette nzoperbia li Vastase;
 Ca lo carrino tuio va no tornese,
 Quanno le cchiamme, pe sfrattà le ccase;
 E pp'uso, e ccostomanza a sto pajese.
 Se janchejano puro le pprevase,
 E strellà pe le strate, nzi a le pprete,
 Non sint'auto, che: Ghiettalò, ca fete.

XXXIII.

Quanno li ciucce vedderò da fore
 Spontà n' alarbaria de spellecchiune;
 Che beneano facenno no remmore,
 Comme fosserò vespe, o moschegliune.
 Chi jea ncammissa, e cchi a lo cosetore
 Ave lassato mpigno li cauzune,
 Chi scauzo, chi ncaruso, e cchi portava
 Na tabbauella, che te pernejava.

XXXIV.

Venea primmo na mmorra de sordate;
 Ch'avarria fatt' a ppunia cò la morte;
 Gente dè fazzejone, e ddesperate,
 Che ssubbeto veneano a ll' arme corte;
 Deceano, ch' a lo mmanco erano state
 N' anno ncomposta int' a l'acito forte;
 E, ccomm' a ppeparuòlo, russo russo
 Portavano lo naso co lo musso.

Chi.

XXXV.

Chiste jeano ncammisa , e non sêrvevano ,
 Ch'a ffarese na bona ponejata ;
 E mmare a li nnemnice , che mmestevano ,
 Ca , nche ll'erano ncuollo , na granfata
 A pprimma botta nfacce le mettevano ,
 E a ccauce , e a mmuorze po , a la desperata ,
 Nne faceano na pizza , e l'ammallavano ,
 Tanto che mmieze muorte le llassavano .

XXXVI.

Secotejava po na compagnia
 De gente de tracolla , e dde scoppetta ;
 E arreto a cchiste n'ata frattaria ,
 Tutta d'arranca , e ffuie , de scippa , e ghietta ;
 Veneva appriesso la cavallaria ,
 Ch'era de mariuole na scoglietta :
 , Viate a cchelle tterre , pe ddò passa ,
 Ca manco lo tterreno no nce lassa .

XXXVII.

Passata chesta , miezo nfracetato
 Venea lo Capetanio Cennerale :
 Tenea ncapo na pezza pe ttocato ,
 Ch'uno asciuto pareva da lo Spetale :
 No pede , co na gamma avea nfasciato ,
 E ncanna le pennea no varvazzale
 Chino de nozzolelle ; e cchi le bedde ,
 Le ppassaie tutte pe pposteome fredde .

XXXVIII.

Lo teravano dinto a na carretta
 Na mula, e no cavallo scortecone :
 Tenea accanto la spata, e la moletta,
 Lo scuto, l'aurinaro, e lo pistone :
 Nzomma dinto nce stea nzi a la cascetta
 Lesta, chi sa, pe cquarche accasione,
 Che dda dinto no sciauro nne scappava
 Da quanno nquanno, che te conzolava.

XXXIX.

Attuorno a isso se vedea lo sciore ;
 L' accoppatura de li smargiassune ;
 Tutte jeano vestute a no colore :
 Tutte aveano le spate, e li bastune ;
 E ttutte, nche ssentevano l' addore
 De lo zuchillo co li maccarune,
 Menavano le mmano a ttunno a ttunno ;
 Nzi che no nne vedevano lo funno .

XL.

Mmiezio a lloro de Grecia la bannera
 Venea, comm'a no luoco cchiù ssecure ;
 Ch' era na pezza nquatro, de manera ,
 Che pproprio te pareo no moccaturu ,
 Ma de chille a ddoie facce ; sotto nc' era
 Na lenza de colore chiaroscuro ,
 Che ddinto sta sentenza nce stea scritta :
Non se sa qua è la smerza, o la deritta.
 Chiu-

XLI.

Chiudeva po st'aserzeto na folla
 De femmene, de viecchie, e ppeccerille:
 Chi portava no citolo nfasciolla,
 Chi se spassava co li strommolille,
 Chi venea arrepezzanno na tracolla,
 Chi jea cosenno, e cchi facea pezzille;
 Chi pazzejava co no pecoriello,
 E cchi s' accarezzava no porciello.

XLII.

Chist'erano li Griecce, che benettero
 Pe se magnà li ciucce sbentorate;
 Ma nche nfacce Gragnano se vedettero;
 Posaieno tutto nziemo; e rreterate
 Da ll'aote li Qualisse, se mettettero
 Sott'a ciert'arvoscielle, addò assettate
 Se stettero no piezzo a cconfarfare,
 Pe bedè chello, che s'avea da fare.

XLIII.

Decea lo primmo: Io songo de parere;
 Che s'aggia a ddà l'assauto a sta pedata;
 Azzò che ppo no nc'aggia a ddespiacere
 D'avè perza, pe nniente, sta giornata:
 Ca certe bote, pe lo stà a bedere,
 Se sole sgarrà tonna la colata;
 Mperzò mo propio, comme nce trovammo,
 Movimmoce, corrimmoce, e zomparammo.

XLIV.

Ched' è ssa pressa? (responneva n'auto)
 Sotta correzzione, no mme pare,
 Che s'aggia mo da corre a ddà st'assauto:
 Nuie stammo stracque pe lo ccammenare,
 Ncè vò no po de forza a ffa sso sauto;
 Si non facimmo primmo arreposare
 Pe no juorno, a lo mmanco, sti sordate,
 Comme ponno zompà, si so spedate?

XLV.

Ch'avimmo da zompà carche Castiello?
 (Repegliava lo tierzo) no le bide
 Sse ggra mmoraglie? co no zompetiello
 L' accuoppe meza canna, che te cride?
 Non so sseie parme; e cco no passetiello
 Si de trasirce dinto no nte fide,
 Sarraie siseto, ciunco, e stroppejato,
 O da tre ghiorne n'avarraie magnato.

XLVI.

Segnure mieie, decea lo Caporale,
 Pe mme non saccio, che bonora avite?
 State a ssenti. La cosa prencepale
 De non dà mo st'assauto, che ddecite,
 Non è, ch' a li sordate le fa male.
 Ll' uosso pezzillo, comme ve credite;
 Ca a zompà chelle mmura è na freddura;
 E lo ffarria porzi na criatura.

Ma

XLVII.

Ma , p' ogni bona regola de guerra ,
 Besogna primmo , che ghiammo vedemmo
 La desposezione de la Terra :
 - Ca a mme , pe ve la di , comme la ntenno ,
 Mme dà che sospetà , ca no nne sferra
 No ciuccio da llà ddinto ; e non comprenno ,
 Comme a ttanta remmure , che ffacimmo ,
 Non s' affaccia uno , pe bbedè chi simmo .-

XLVIII.

Chi sa che nce po esse lloco ssotta ?
 Chi sa che marcangegna vonno fare ?
 Mperzò non s' ha da correre de botta ,
 Ma bisogna aspettà , pe la ncarrare .
 Stammo ccà pe tutt' oggi a ffa la scotta ,
 Pe bedè che pò esse , e pp' asservare
 Li motive , che ffanno ; e ppo dimano
 Nne cacciammo nne n' attemo le mmano .-

XLIX.

Ment' isso stea parlanno , se vedevano
 Calà tutte la capo , e l' approbbavano ;
 Po , quanno appe scomputo , le decevano ,
 Ca non potea di meglio , e lo ncentzavano ;
 A lo rreto affollate le correivano
 Ncuollo , e tte l' abbracciavano , e basavano ;
 E isso mmiezo puosto mperecuoccolo ,
 Pe la prejezza se nne jeva nzuoccolo .-

L.

Po se nne jìeno tutte, e sse mettette
Agnuno pe spià chello, che nc'era;
Ma nce perdìe lo tiempo, ca nce stette,
A ffa stà penetenzia nzi a la sera,
E dda dinto Gragnano no nn'ascette
Manco na gatta. E dde chesta manera,
Avìe la fattocchiara tiempo, e lluoco
D'addecrejarle a ttutte pe lo bruoco.

Scompetura de l'Arragliata, XIII.



DE LA
 CIUCCCEIDE
 ARRAGLIATA XIV.



ARGOMENTO.

*Panfela se fa n'Ascio; e a mmeza notte
 Va la fattecchia a ffa ncopp'a le mmura.
 Se dà a ghiuorno l'assauto, e nquatto bbotte
 So ncappate li Griecce a la fattura,
 E nc' abbuscano certe ppoco zotte.
 Ncapo de riempo cagnano fortuna,
 Tanto, che ppuoste ncasecavallucee,
 Conzervano la Reggia de li Ciucce.*

I.

I A Notte, che mpararse de pettura
 Maie a la scola non avea potuto,
 Vedenno, ca nc'avea na gran fortuna
 Lo Sole, e cch' a ppettà nc'era rescuito;
 Pe ffarle no despietto, er' a la scura
 Juta nfacce a no quatro, addò scomputo
 Nc'avea chillo de pittà lo Munno,
 E scacanno lo jea da capo a funno.

Quan-

II.

Quanno la fattocchiara , ch' aspettanno
 La meza notte stea co ll' ova mpietto ,
 Vedenno , ca' già n' ora stea toccaio ,
 Se sosle , zitto e mmutto , da lo lietto ,
 Addò stea lo marito ronfejanno ,
 Ed a la nnuda s' accostaie depietto
 A na fenesta , addò tenea stipate
 Tutte le ccarrafelle percantate .

III.

Nne piglia una , nne leva lo stoppaglio ,
 E nne devaca dint'a n' arvariello
 No po d' agniento , verde comm' a n' aglio :
 Po dà de mano a no carrafonciello ,
 Se cala , e cco no capo de sguinzaglio
 Se l' attacca a no pede , s' auza , e echello ,
 Che ddinto a l' arvariello avea colato ,
 Lo mmesca co n' at' uoglio mmalorato .

IV.

E ssedontane ll' una , e ll' autà mano ,
 Se le scerega nziemo ; e nche le bede
 No poco caudolelle , chiano chiano
 Se nn' onta da la capo nzi a lo pede .
 Fatto chesto , scommoglia no tiano ,
 Piglia no po de grasso , e cco no pede
 D' aruta secca , che ttenea a la chiocca ,
 Se nne fa na stezzella cadè mmocca .

E bbec-

V.

E bbecco , nnitto nfatto , che ttremmanno ,
Pecune , e ppenne pe la vita ll'esceno :
S' arronchiano le braccia , e sse nne fanno.
Doie scelle , che se schiegano , e ss'aonescono:
Ll' ogne a li piede se vanno allonganno ,
E mponta , comm'a ccrocco , s'appezzesceno:
Se le ntosta lo naso , e scenne abbascio ,
Le commoglia la vocca , e sse fa n' Ascio.

VI.

Fa no zumpo , e bà ncopp' a la fenesta ,
Po se lanza de botta , e scappa fore :
Rape , e nzerra le scelle , e llesta lesta
Se jetta co no vuole , che nquatt' ore
La porta , addò s'avea da fa la festa .
Nchè ffo arrevata , senza fa remmore ,
Piglia co ll' ogne lo carrafonciello ,
Che s' attaccaie , primma de farse auciello :

VII.

Nne scippa l' appelaglio , e cco lo pizzo
Lo scioglie da lo pede ; e ppo volanno
Pe ttutte chelle mmura , p' ogne ppizzo ,
Pe ddo cammina , nce ne va scolanno
No pocorillo , anzi ch' a stizzo a stizzo .
Se jle lo carrafone devacanno :
Devacato che ffuie , lo jetta nterra ,
Ammarcia , torna femmena , e sse nzerra .

Mente :

VIII.

Mente la fattocchiara attuorno attuorno
 Se nne jeva facenno sta fattura;
 Li scure Siciune, che lo juorno
 N' aveano visto nullo pe le mmura,
 Dapò d'avè gerato lo contuorno,
 Assecorate, ca pe la paura
 Chille stevano nchiuse, se mettertero
 A ffa no scialatorio, e ss'addormettero.

IX.

E nche ghiuorno schiaraje, nche se sentette
 Lo tappa tappa de li tammorrine,
 E lo ntantarantà de le trommette;
 Zompaïeno leste da li strappontine,
 E ccevatese tutte le scoppette,
 Confortatese primmo le stentine,
 Se mettertero tutte nn'ordenanza,
 Pe ddà l'assauto, e rrompere sta lanza.

X.

Ma nnante, che nnesciuno se movesse,
 Le voze fa lo Capo nà parlata,
 Azzò ch'agnuno de li suoie corresse
 Co cchiù spireto a ffa sta gran frettata;
 E mmiezo a tutte, pecchè lo sentesse
 Tutta la gente, che stèa squatronata,
 Ncopp' a no montonciello se mettette,
 S'acconciaie lo toccato, e ppo decette:
Figlie,

XI.

Figlie, ammeziune mieie, cammaratune;
(Sordate nò, ca sempe simmo state
Anema, e ccuorpo) quanta secozzune,
Quanta schiaffune nuie nc' avimmo date
Da ch' eramo tantillo? e ppo, guagliune
Vi si nn' avimmo fatt' a pretejate
A lo pajese nuosto? e quanta notte
Nce l' avimmo scialate int'a ssi cotte?

XII.

Simmo cresciute nziemo, e mmo ccà ppurò
A ccommattere nziemo nce trovammo,
Ma a ccommatte co cchi? no po de muro
S' ha da zompare, e ppo nc' arrecettammo.
Eccolo llà. Llà dinto a lo ssecuro
Credeno stà li Ciucce: e nnuie, che ghiammo
Scalejanno le ccase, notte, e ghiuorno,
Nce potarrimmo aggliotttere sto scuorno?

XIII.

Nuie, che ppe no crapiccio simmo jute
A scannarece puro co la Morte,
Mo sbentrà quatto ciucce addebbolute
Non potarrimmo, o nc' ha da sapè a fforte?
Pe cchisse lloco avimmo nuie perdute
Tanta compagne; pe cchisse so mmorte
Tanta povere gente; e nnuie, ch' avimmo
Da vennecarle, no lo ffaciarrimmo?

Ecco

XIV.

Ecco ccà attuorno (e ssi no le bedite,
 Creditemello a mme, ca le bbed'io)
 Cecio , Fonzo , che ttutte le ssapite ,
 Mase , Micco , Renzullo , e ttata mio ,
 Che so muorte pe lloro ; e ttutte aonite
 Strillano : Che ppenzate ? Che ggolio
 Avite de sarvà chi nc'ha scannaté ?
 Corrite , vennecatece , e zompate .

XV.

Accossì ve scongiurano , e cchiagnenno
 Ve mostano lo sango , e le fferute :
 Jate , dice la Patria , a la ncorrenno .
 A vennecà sti figlie mieie perdute .
 Jate , dice .. Ma già ve vao vedenno
 Sghizzà sango da ll'uocchie , e rresolute
 De nne fa na venaccia : jate , figlie ,
 Jate , sparafonnate ssi cconiglie .

XVI.

Ment'isso stea parlanno , chille avevano
 L'arteteca , geravano , e botavano :
 Mo jevano pe cchiagne , e sse tenevano .
 E mmo co ll'uocchie'n Cielo sosperavano :
 Quanno se schiaffejano , e cchiagnevano ;
 Quanno se mozzecavano , e sbafavano ;
 E , nche avette scompute , se lassajeno
 Tutte de furia , e sse precepetajeno .

Jea

XVII.

Jea nnanze uno strellanno: Mo vedimmo
 Chi sa zompà cchiù llieggio, e cchi cchiù bale;
 E ccorze tanto, ch' isso fuie lo primmo
 A ghirse a dderropà: bell' anemale!
 Jogne a le mmura, fa no zumpo, e pprimmo.
 De tutte ll' aute, pe non farse male,
 Schiaffa na mano ncoppa a la muraglia,
 Se jetta dinto, e ba a ttrovà la paglia:

XVIII.

Pocca, nninchè la mano nce mettette.
 Ncopp' a cchillo zuchillo, e lo toccaje;
 Correre pe le bene se sentette
 Na cosa fredda fredda, e ss' agghiajaje:
 Na setola ogne pilo se facette,
 La pella comm'a ccuoiero se ntostaje:
 Se ntorzaieno lle ddetta, comm'a spogna,
 E dd' ogne ccinco se nne fice n' ognà.

XIX.

Le rrecchie, che pprimm'erano tantillo;
 S'anchiettero de pile, e ss' allongaieno:
 Lo naso sprofelato, e peccerillo
 Se le squaquaracchiaje; e sse ngrossaieno
 La vocca, le mmascelle, e lo mussillo:
 De le mmano duie piede se formajeno:
 Ll' ascie da reto no scoppetteniello,
 E dd' omno arreventaje no ciucciariello:

Ma

XX.

Ma pecchè cchesto no le ntravenette
 Ncopp' a le mmura, ma a la via de sotto,
 (Pocc' a cchillo grau sauto, che sfacette,
 Nche le ttoccae, se derropaie de bbotta)
 Nullo de li compagne lo vedette;
 E ccredenno, che chillo avesse rotta,
 A lo mmanco, la capo a Barvajanca;
 De fa lo riesto le venea l' allanca;

XXI.

E a ddiece, a bbinte, a ttrenta se mettevano
 Tutte nziemo a zompà: ma nche ttoccavano
 Chelle mmura mmardette, se vedevano
 Co ttre pparme de coda, e ss' attassavano.
 Veneano ll' aute appriesso, e ccomme jevano
 Cadenno, accossì ciucce arreventavano.
 Vennero tutte nzomma, e dde portante
 Se jettero a ffa ciucce tutte quante.

XXII.

Jea caccuno pe ddì: Chesso, ch'è stato?
 Se nce spremmeva, e non potea dì niente;
 Ma ll' uno a ll' auto, comm'a no ncantato,
 Non facev' auto, che ttenerse mente.
 Jeva pe ssosperà, ma chillo sciato
 Se lo sentea mbrogliare pe li diente:
 Lo volea scapolà, ma sentea nata,
 Ncagno de lo sospiro, n' arragliata.

Chi-

XXIII.

Chisto fuie lo prencipio de li guaje ,
Ma no scompieno ccà ntutto , e ppe ttutto ;
Pocca sott'a le mmura se trovaje
Na quantetà de Scigne , ch'a lo butto ,
Che fface agnuno , quanno scravaccaje ,
Co no capo de funa , zitto e mmutto ,
A uno a uno te l'accapezzajeno ,
E nnanze a Barvajanca le pportajeno .

XXIV.

Tutto chesto ll'avea , lo juorno nnaite ,
Fatto allestì Selleno a lo ncorrenno ;
Quanno , lassato chillo gra birbante
De Mercurio , co cchi stea trascorrenno ,
Corrette de galoppo , e dde portante
A cconzola lo Rrè , che stea chiagnenno ;
E ppo , comme Mercurio le deceva
Cacch' autà cosa , subbeto correva .

XXV.

Junte llà nnanze st'Asene novielle ,
Lo Rrè ordenaie , che ffossero attaccate
Tutte quante de musso a l'arvoscielle ,
Che steano pe llà ntorno pastenate :
Addò chelle co ccierti mazzarielle
L'ammatoraieno bone le ccostate ;
Po , pe le fa passà lo mal'ammore ,
Tre ghiurne le ttenettero llà fiore .

E la

XX.

Ma pecchè cchesto no le ntravenette;
 Ncopp' a le mmura, ma a la via de sotto;
 (Pocc' a cchillo grau sauto, che ffacette,
 Nche le ttoccae, se derropaie de bbotta)
 Nullo de li compagne lo vedette;
 E ccredenno, che chillo avesse rotta,
 A lo mmanco, la capo a Barvajanca;
 De fa lo riesto le venea l' allanca;

XXI.

E a ddiece, a bbinte, a ttrenta se mettevano
 Tutte nziemo a zompà; ma nche ttocchavano
 Chelle mmura mmardette, se vedevano
 Co ttre pparme de coda, e ss' attassavano.
 Veneano ll' aute appriesso, e ccomme jevano
 Cadenno, accossì ciucce arreventavano.
 Vennero tutte nzomma, e dde portante
 Se jettero a ffa ciucce tutte quante.

XXII.

Jea caccuno pe ddì: Chesso, ch'è stato?
 Se nce spremmeva, e non potea dì niente;
 Ma ll' uno a ll' auto, comm'a no ncantato,
 Non facev' auto, che ttenerse mente.
 Jeva pe ssosperà, ma chillo sciato
 Se lo sentea mbrogliare pe li diente:
 Lo volea scapolà, ma sentea nata,
 Ncagno de lo sospiro, n' arragliata.

Chi-

XXIII.

Chisto fuie lo prencipio de li guaje ,
Ma no scompieno ccà ntutto , e ppe ttutto ;
Pocca sott'a le mmura se trovaje
Na quantetà de Scigne , ch'a lo butto ,
Che ffice agnuno , quanno scravaccaje ,
Co no capo de funa , zitto e mmutto ,
A uno a uno te l'accapezzajeno ,
E nnanze a Barvajanca le pportajeno .

XXIV.

Tutto chesto ll'avea , lo juorno nnante ,
Fatto allesti Selleno a lo ncorrenno ;
Quanno , lassato chillo gra birbante
De Mercurio , co cchi stea trascorrenno ,
Corrette de galoppo , e dde portante
A cconzola lo Rrè , che stea chiagnenno ;
E ppo , comme Mercurio le deceva
Cacch' autà cosa , subbeto correva .

XXV.

Junte llà nnanze st' Asene novielle ,
Lo Rrè ordenaie , che ffossero attaccate
Tutte quante de musso a l'arvoscielle ,
Che steano pe llà ntorno pastenate :
Addò chelle co ccierti mazzarielle
L'ammatoraieno bone le ccostate ;
Po , pe le fa passà lo mal' ammore ,
Tre ghiurne le ttenettero llà ffore .

E la

XXVI.

E la matina , quanno se sosevano ,
 Pe la marena te l' arrefrescavano :
 A ora de magnà se nne venevano ,
 E n' ata vota te le cconzolavano :
 La sera po , che mmanco se rejevano ,
 Co no poco de paglia le nforzavano ;
 E a lo ppartire , co quatt' aute zotte ,
 Le tornavano a ddà la bonanotte .

XXVII.

Passate li tre ghiurne , le sciogliettero ,
 E le mmesero tutte a ffatecare :
 A cchi ncuollo na stola le facettero ,
 Pe le fa pezzolamma carrejare :
 A ccierte lle ccancelle le mettettero ,
 E le pprete le ficero portare ;
 Nzomma a tutte toccaie no vejaggiello ,
 Pe ffravecà le mmura , e lo Castiello .

XXVIII.

E ddoraieno sta vita spremmentata
 Pe anne , e anne , tanto che scomputo
 Vedettero lo muro , e ffravecata
 Tutta la Terra : veddero fornuto
 Lo Castiello , e le Turre ; e mmaie la strata
 Non se vedea d' avè no po d' ajuto .
 Ma l' ajuto da chi volea venire ,
 Si la Janara non bolea morire ?

Seie

XXIX.

Seie vote a bisetà li Parzonare
Era tornato lo Conciatanielle,
Pe bbedè , primmo de se vennegnare ,
Li tenacce , le butte , e li copielle ;
E autè tante , pe li Potecare
S'erano viste ascì li carosielle ,
Che sserveno , pe ffarte nzallanire
Dint'a la casa , e ppeo , quanno vuo' ascire.

XXX.

Quanno , nà notte , mente stea dormienno
Varvajanca , Selleno l'apparete ,
E ddisse : Figlio , se nne va venenno
Chillo tiempo , ch'io sempe te decette ,
Ca poteva venì : già stà facenno
Le ppose chella scirpia , che ffacette
La fattecchia a sti Griece ; e cco sta morte
Li poverielle cagnarranno sciorte .

XXXI.

Pe cchesto no nte mettere a ppaura ,
Che t'aggiano da fà tanto de male ;
Ca si mbè tornarranno a la fegura
De primmo , li costume bestejale
Non ponno maiè lassare ; e gran fortuna
Credarranno la lloro , si pe tale
Sarranno canosciute ; e v'amarranno ,
Comme v'ammano mo , che co buie stanno .
Ma ,

XXXII.

Ma, azzò sta cosa n'aggia a ssorzetare,
 Pē sta Terra, quà ppoco de remmore,
 Dimano falle tutte scapolare,
 E dda le Scigne falle caccia fore
 Co na scusa, ca nò nc'hanno che ffare
 Cchiù lloco dinto; e, ppe mmostarle ammore,
 Dalle a mmagnà, falle na bona cera,
 Mannannille contiente, e bona sera.

XXXIII.

Se scetaie Varvajanca, e rrommecanno
 Chello, che già Selleno ll'avea ditto;
 Co tutto, ca le dea no po d'affanno
 Sta mala nova, e lo facea stà affritto;
 Puro, fattose core, e cconfedanno
 A lo Vavone suio, se stette zitto,
 E le pareva mill'anne, che scompesse
 La notte, e cche caccia nne le ppotesse.

XXXIV.

E nno ntanto lo Sole s'era fatto
 A bedè pe le Turre, che cchiammaje
 Tutte le Scigne, e le ntemaie lo sfratto
 De li Ciucce: ma primmo ll'ordenaje
 Che ll'aveano da dà: po, co no tratto
 Veramente da Rrè, l'accarezzaje,
 E cco cciento parole nzoccarate
 Nne le mmannaie contiente, e cconzolate.
 Ma

XXXV.

Ma subbeto , che cchilli poverielle
 Se vedettero fora de la porta ,
 Ncignattero a ffa ll' uocchie a ppesciarielle.
 Chiagneano , e ghiastemmavano la sciorta,
 Che spartì le ffacea da li fratielle ,
 E ccagnà luoco . Vide quanto mporta
 Chello , che ddisse chillo Varvajanne,
Ca ll' aosà , e straosà so dduie malanne.

XXXVI.

Jeano pe ccammenà li sbentorate ,
 Ma devano duie passe , e sse sentevano
 Tutte quatto li piede mpastorate :
 Nne devano duje aute ; e sse vedevano
 Votà tutte la capo a la Cetate ;
 E ppenzanno , ca llo ro se nn' ascevano
 Senza speranza de nce retornare ,
 Ncignavano da capo a ppeccejare .

XXXVII.

Tanto jleno facenno sso taluorno ,
 Ch' a ppoco a ppoco se n' allontanajenò ;
 E ghiusto a ll' ora de lo Miezajuorno
 Stracque , dinto a no vosco , se trovajeno ;
 E bedenno , ca nullo pe llà ntuorno
 Le ppotea sconcecà , s' abbarrucajeno ,
 Chiagnenno , ncapp' a l' erva tennerella ,
 E sse mesero a ffa la nonnarella .

XXXVIII.

A la stess' ora , a cchillo stisso punto ,
 Che llo ro s' addormettero , schiattaje
 Panfela la janara , e ghle a ffa cunto.
 Co Mmennosso de quanta nne mpecaje .
 Caronte , co lo vuzzo unto , e bbesunto ,
 Nche la vedde spontà , se nc' azzeccaje ,
 La lanzaie co lo crocco , e nzicco nzacco
 La corze a ghiettà mmocca a Pparasacco.

XXXIX.

Morta chella , 'va trova la fattura ,
 E bba a ttrovà cchiù ll'Asene addò stanno.
 Nnenattemo le torna la fegura ,
 Ch'aveano apprimmo , ed uommene se fanno.
 Se scetano ; e ffuie tanta la paura ,
 Che le venette ncuorpo , che tremmanno
 Restaieno nterra mieze addebbolute ,
 E stieno pè no piezzo nzallanute.

XL.

A ll'utemo se jettero p' auzare .
 Lloco te voglio , e mmo comme facimmo?
 Non sapeano li scure comme fare ,
 E ghieano a cquatte piede , comm' apprimmo.
 Se tenevano mente , e nfrocecare
 Auto non se sentevano : Addò simmo ?
 Che nc'è ssocciesso ? Ch'è sta mmenzione?
 Chesto ch'è stato ? E' ssuonno , o vesejone?
 Ma

XLI.

Ma puro tanto jettero facenno;
 Tanto se jìeno l' uocchie scereganno;
 Che s' auzaieno a l' allerta; e ccanoscenno
 Chello, ch' era, se jìeno allecordanno,
 Ch' uommen' erano state; e non sapenno
 Comme ll' era socciesso sto malanno,
 Deceano nfra de lloro: Ched' è stato?
 Ch'avimmo fatto? e mmo chi nc' ha sarvato?

XLII.

Po, a la nnuda, comme se trovavano;
 Ascieno da lo vosco, e se nne jettero;
 Chi a na baña, e chi an' auta; e addò arrevavano
 Cchiù de no compremiento recevettero:
 Addò aveano vestite, addò abbuscavano
 Denare, e rrobbe; e ttanta nne facettero,
 Che nfra poch'anne (accossì bbà lo Munno)
 Se troyattero ricche, e rricche nfunno.

XLIII.

Arrevate a sso stato, nnitto nfatto
 Se vedettero auzà na nnommenata;
 Ch'agnuno er' ommo de dà schiacco matto
 A cchi puro la Legge avea stampata.
 De poleteca po, no nc' era fatto,
 Che no lo decedeano a na pedata:
*Quanto fa sta zellosa de Fortura,
 Pe ffa mette no Ciuccio mposetura!*

XLIV.

Ma fa, che bbuò ; chillo mmarditto addore,
 Chillo sciauro ciuccigno, che tant'anne
 Neuollo aveano portato, e nzi a lo core
 Ll'era trasuto, da sott'a li panne
 Sempe ll'ascea, comm'a no tradetore ;
 E dda chi, comm'a lloro, ricchiepanne .
 Non erano a lo Munno, erano abbista
 Canosciute pe Ciucce, e ppuoste a llista :

XLV.

Chiste fecero figlie, e ppo li figlie
 Fecero ll'aute, e ll'aute ll'aute appriesso ;
 E ppecchè da la chianta int' a li sguiglie
 Passa lo stiss' ammore, nn'è ssocciesso
 Che pe tutto lo Munno, si te piglie
 Gusto de revotarlo, muore ciesso
 Primmo de trovà n'ommo ; e, cquase tutte
 De chella chianta là, puoie di, sò ffrutte .

XLVI.

Ma non contiente d'esse canosciute
 Pe ciucce a li costumme, e a lo trattare,
 P'esse propio da tutte reverute,
 Ciucce puro se vozero chiammare ;
 E lo primmo, che ntese la vertute
 De sto nomme famoso, e ssengolare,
 Fuie no Rrè de la Perzia, che lassaje
 Lo nomme d'Oco, e Ciuccio se chiammaje.

Ven-

XLVII.

Vennero po li Grieco, e li Romane,
E ffaceano nfra lloro a ssecozzune
Ll'uommene, e le Cetate sane sane,
P'avè sto nomme. A tutte li pontune,
Non dico li forise, e li pacchiane,
Ma ll'uommene d'azzò, e li capezzune
Scanosceano lo Vavo, e lo Sivavo,
Pe ssentirese di: Si Ciuccio schiavo.

LXVIII.

Mperzò n' Grecia Cleante, e Giunio Basso
A Romma Ciucce fujeno chiammate,
Ma chisto, Ciuccio janco, che lo spasso
Era de tutta chella gran Cetate.
Nce fuie po no streverio, e no sconquasso
Nfra tutte le strepegne cchiù stimate,
Ch'agnuna nne volea piglià lo nomme,
Agnuna la casata, e lo cognomine.

LXIX.

Cornelio Scepejone, che ddoie vote
Fuie Cuonzolo, e sse vedde trejonfare,
P'assecorà a la figlia na gran dote,
Le die n' Asena chiena de denare;
E boze, che lo figlio, e lo nepote
Asene se facessero chiammare.
Cossì ciert' aute da na Ciucciarella
La casata pegliattero d' Asella.

Da

L.

Da la fameglia Asinia nne sguigliaje
 Asinio Gallo, Asinio Capetone,
 E cchillo, ch' arraglianno sbreognaje
 A Catelina, Asinio Pollione.
 E dda l' Aselliune nne scappaje
 Lo famuso Sempronio Asellione,
 Chillo, che pe ccantarla pe le strate,
 Die la Storia de Romma a li Cecace.

LI.

De le Ccetate po, Sciumme, e Casale;
 Che nce so mmo a lo Munno, o so già strutte,
 E dda sto nobelissemo anemale
 Asene, e Ciucce se chiammaieno tutte,
 Chi nne pò dì lo nummero? Asenale
 Nc'era 'n Grecia na Tribbu; e nzì a li frutte,
 Nzì a li pisce, (chi maie lo ccredarria?)
 P'avè sto nomme jevano mpazzia.

LII.

E nn'aveano ragione; ca vedevano
 Tutto quanto lo Munno revotato,
 Pe ffarle annore: 'n Grecia se facevano
 Feste asenarie: a Romma destenato.
 Era no juorno apposta, che nchiudevano
 Le mmolina, e le ffora; e ncoronato
 No Ciuccio int' a lo tempio de Vesta,
 Lo portavano attuorno co gran festa.

No

LIII.

No Rrè de Perzia a n' Aseno facette
No tempio, e ll' adoraie tutto l' Agitto.
Nzì a n'ogna de no Ciuccio, che benette
Da le pparte de ll' Asia, co no scritto
Alisantro a lo tempio la mettette
D' Apollo 'n Derfo: e cchillo vraccio mmitto,
Ché dde tutto lo Munno trejonfaje,
Ll' ogne puro de n' Aseno ncenzaje.

LIV.

Ma no nce lo pperdle, pocca obbretrato
Vedennose lo Ciuccio, pe ccomprire,
Da n' auto ciuccio lo fice avésato,
Ca lo tiempo venea de se partire;
Ed isso pe mmorì cchiù cconzolato,
Fattase n' acqua jaccia llà benire,
Dint'a cchell' ognia, ch'avea tanto ammata,
Se nne voze fa primmo na sciacquata.

LV:

Tage, che ffuie lo primmo, che mparaje
De fa la zingarella a li Toscane,
Da chi po st' arte leggja trapassaje
A cchill' aute imposture de Romane,
Nfra ll' aote belle cose commannaje,
Che ttutte li massare, e li pacchiane
Nnanze a le mmassarie pe no reparo
Mettessero na capo de sommaro.

LVI.

Attavio, Attavio stisso, (che mmaie dire
 Se pò cchiù de no Ciuccio?) pe mmostare
 Quanto voze sta razza favorire,
 Fice vecino ad Azzio fravecare
 No tempio apposta; e sse vedea trasire
 Dinto llà spisso spisso, p' adorase,
 Chi ve penzate maie? no Ddio noviello,
 Che nc' avea fatto fa, no Ciucciariello.

LVII.

Pe cchesto po a Préjapo, Apollo, e Marte
 Auto, che Ciucce, non sacrefecavano;
 Pe chesto pe lo Munno, p'ogne parte
 Le ggrolie de li Ciucce se cantavano;
 E Plauto puro nne voz'esse a pparte,
 Pocca vedенno quanto se prezzavano.
 Li Ciucce a Romma, fice ll'Asenaria,
 Che pe sto nomme schitto jle pe ll'aria.

LVIII.

E ppe cchesto, no ntanto pe le mmura,
 Che le Scigne facettero a Gragnano,
 Manco pe lo Castiello, che non dura;
 Ma pe sta razza, che da mano a mmano
 S'è spasa da pe tutto, e la Tortura
 Ll'hà aizata nzi a le stelle chiano chiano,
 Sarrà sempe a lo Munno, comm'è stata,
 LA REGGIA DE LI CIUCCE CONZARVATA.

LA SCOMPETURA.

20447







BIBL